

SAN LUCAS

San Lucas Alli Willacuyta Gellgangan

Cay librutam médico San Lucas gellgangan Señor Jesucristo rurangancunatawan willacungancunata musyanantsicpag. Tsaymi San Lucasga Señor Jesucristopag willacun Dios Yaya änicurnin Israel naciunllapa Salvagnin cachamungantatsu, sinöga llapan runacunapa Salvagnin cananpag cay patsaman shamunganta.

San Lucasllam masga willamantsic Señor Jesucristo cay patsachö cawangan witsay llapan imayca rurangancunata. Tsaymi payga librunpa gallananchöpis willacun Señor Jesucristo imanö cay patsachö cawangantawan llapan imayca rurangancunata averwar tapupacurnin shumag musyapacusrquir Teofilo shutiyog runa gastuncunawan yanapaptin gellganga (1.1-4). Tsaynöpam San Lucasga San Mateopitapis mas willamantsic Señor Jesucristo yuringantawan wamra canganta y San Juan Bautista puntata willacungantapis (1.5-2.52). Cay libru llachömi waquincagcunapitapis mas Señor Jesucristo cay patsachö imanö cawanganta musyatsimantsic.

San Mateowan San Marcos librunchö gellgayangannöllum San Lucaspis San Juan Bautista willacur puringanta (3.1-20) y Señor Jesucristo bautizacungantawan Supay tentanganta y Galileachöpis imata ruranganta musyatsimantsic (4.14-9.50). Tsay ishcan gellgayangannöllum San Lucaspis Señor Jesucristopag willacun, Galileapita Jerusalénman ultimu viäjita aywanganta (9.51-19.27), cruzta matancarcatsir puritsiyanganta (19.28-23.56) y cawacamur discipuluncunata yuripunganta y cieluman aywacungata (capítulo 24).

San Lucasllam masga cay librunchö Señor Jesucristo cay patsachö llapan imayca rurangatapis manyapita musyatsimantsic Nazarethö goricäyänan waquicunaman aywangatapis. Cay libruhöga musyantsic masga quiquin Señor Jesucristo “Cushicuyay umilde limpiu shongoyocuna” nir willacungantam. Tsaynöllum musyantsic Alli Willacuyninwan mana servigpag churashga wactsacunatawan despreciashgacunata alläpa cuyangata.

San Lucaspa librunllachömi musyatsimantsic Samaritänö llaquipäcug runapagwan taytan tsurinta cuyarnin perdonanganta. Tsaynöllum payga musyatsimantsic Dios Yayaman imaypis mañacushga Espíritu Santo yanapamänapag, jutsantsicpita perdonashga canapag y warmicunapis Señor Jesucristopa Alli Willacuyninta willacur yanapacuyänapag.

Tsaynöllum San Lucasga gellgangan “Hechos de los Apóstoles” ningan librutapis. San Lucaspag masta musyanayquipag liyinqi Hechos 16.10-17; 20.5-15; 21.1-18; 27.1-28.16, Colosenses 4.14, Filemón 24 y 2 Timoteo 4.11.

**San Lucas Señor Jesucristo
yachatsicunganta gellangan**

1 ¹Cay patsachö Diospa Tsurin Señor Jesucristo cawangantam atscag runacuna gellgayayta munayargan. ²Tsay gellgayanganga discipuluncuna yachatsimangantsicnöllam. Paycunam Señor Jesucristowan pagta purirnin, gallanganpita wiyashga y ricashga car, Diospa Palabranta willacur rasumpa servignin cayan. ³Tsaymi nogapis discipuluncuna yachatsicuyanganta wiyarnin gellgayangancunata leyishga car, gallananpita llapanta allipa musyarnin, alläpa cuyay respetashga Teofilo gamman llapan shumag musyangäta gellgamü. ⁴Tsaynöpam gampis cayta leyirnin següru musyanqui, yachatsiyäshungayqui rasumpa alli canganta.

Zacariasta angel yuripun

⁵Judea provinciachö Herodes rey caycaptinmi, juc sacerdoti Zacarias shutiyog cargan y warminpanam Isabel shutin cargan. Ishcanpis Dios Yayata servig unay sacerdotícunapa ayllun: Zacarias Abiaspa, Isabelna Aaronpa. ⁶Ishcanpis Dios Yaya mandacungancunata firmi cäsucurmi, alli rurag cayargan. ⁷Pero manam wamrancuna cargantsu, Isabel gollog captinmi ishcanpis yashgayäcushgana cayaptin.

⁸Tsaypitanam juc cuti Zacariasta, sacerdotimajincunatawan templuchö Dios Yayata serviyänan töcargan. ⁹Costumbrincunamannö sacerdotícunata sortiyayaptinmi, Zacariasta töcargan altarchö incienciuta goshnitsinanpag. Tsaymi templuchö ruri sagrädu cuartuman yaycargan. ¹⁰Tsay cuartuchö incienciuta goshnitsinganyagnam, wagtachö atscag runacuna Dios Yayata adorarnin mañacur caycäyargan.

¹¹Tsaynö caycaptinmam, incienciuta goshnitsiyänan altarpa derëchucag lädunchö Dios Yaya cachamungan angel yuripurgan. ¹²Angelta ricaycurnam, Zacarias alläpa mantsacar ni imanö caytapis puedirgantsu. ¹³Pero angelnam nirgan: “Zacarias, ama mantsacaytsu. Dios Yayam wiyashga mañacungayquicunata. Warmiqui Isabelchömi juc olgo tsuriqui yuringa. Paypa shutinmi ‘Juanta’ churanqui. ¹⁴Tsuriqui yurisquiptinmi, alläpa cushicunqui y waquincunapis alläpam cushicuyanga. ¹⁵Dios Yayapa puntanchöpis mas alli rurag runam canga. Manam imaypis vinotawan washcuta ni juc machätsicug trägucunata upyangatsu, manarag yuringanpita Espiritu Santowan cashgana car. ¹⁶Pay yachatsicuptinmi, Dios Yayata atscag Israel runacuna yapay cäsuyanga. ¹⁷Diospa Tsurin shamunanpagmi, Espiritu Santopa poderninwan unay profëta Elíasnö willacunga. Tsaynö yachatsicuptinmi, taytancunawan tsurincuna alli päscuyachö cawayanga. Puntata mana cäsucunam, Dios Yayapa yachayninwan imaycatapis allillata rurarnin cäsucuyanga. Tsaynöpam runacuna listuna cayanga, Dios Yayapa Tsurinta alli chasquiyänanpag.”

¹⁸Zacariasnam angelta tapurgan: “¿Imanötan tsay nimangayqui canga? Nogaga alläpa auquinnam cä y warmipis chacwannam.”

¹⁹Angelnam nirgan: “Nogaga Angel Gabrielmi cä, Dios Yayapa puntanchö servignin. Paymi cachamashga gamta cay alli noticiata willanagpag. ²⁰Dios Yaya dispöningan tiempuchömi tsuriqui rasumpa yuringa. Pero mana criyimangayquipitam, asta tsuriqui yuringanyag parlayta puedinquitsu” nir.

²¹Tsaynö angel parlapanganyagnam, wagtachö runacuna Zacariasta shuyarar niyargan: “¿Imanöparag sas yargamuntsu?” nir. ²²Zacarias

yargosquirnam, shimin mana pashtaptin parlayta pue dirgantsu. Runacunanam ninacuyargan: “iRuri templuchöchi Dios Yaya imatapis ricätsishga!” Zacariasnam parlayta mana pue dirnin, señasllapa willacurgan.

²³Templuchö serviyta ushasquirnam, wajinman cuticurgan. ²⁴Tsaypitanam warmin Isabel geshyag cargan. Pitsga quillam wajillanchö cacurgan. ²⁵Tsaymi nirgan: “Dios Yaya munapinmi caynö geshyag caycä. Cananga rasumpa cuyacuyinintam musyatsimashga, mananam runacuna, ‘Mana wachacug warmi’ nir, musyapäyämanganatsu.”

Maríata angel yuripun

²⁶Isabel sogta quillayog geshyag caycaptinnam, angel Gabrielta Dios Yaya cachamurgan Galileachö Nazaret marcaman, ²⁷María niyangan virgenman. Tsay jipashga casarananpag parlashganam cargan, unay rey Davidpa ayllun José shutiyogwan. ²⁸Angelnam María caycanganman yurisquir nirgan: “iCushicuy, María! iDios Yayapa alläpa cuyay acrashganmi canqui! Quiquin Diosmi gamwan caycan.”

²⁹Tsaynö angel niptinnam, María mantsacar shongollanchö nirgan: “iImanirtan tsaynö angel niman!” nir.

³⁰Angelnam nirgan: “María, ama mantsacaytsu. Dios Yayam cuyarniqui gamta acrashushcanqui. ³¹Tsaymi geshyag canqui. Wawayqui yurisquiptinnam, shutin churanqui Jesústa. ³²Paymi alläpa poderöso canga, cieluchö japallan poderöso Dios Yayapa rasumpa Tsurin car. Paypa unay awilun Davidta mandacug rey churayangannöllum, Señor Jesucristotapis quiquin Dios Yaya mandacug rey cananpag churanga.

³³Israel runacunapa mandacug reyninmi imayyagpis canga. Tsaymi paypa

Mandacuy Reynonga ni imaypis ushacangatsu.”

³⁴Tsaypitanam angelta María tapurgan: “¿Imanötan tsay nimangayqui canga, nogaga manarag piwanpis täcuptiga?”

³⁵Angelnam nirgan: “Espiritu Santom gamman shamurnin, juc wamrata camanga Dios Yayapa poderninwan geshyag canayquipag. Tsay Santo wawayquim cieluchö alläpa poderöso Dios Yayapa Tsurin canga. ³⁶Musyay, prämayqui Isabelpis chacwan cayninchörag sogta quillana geshyag caycanganta, ‘mana wachacug warmi’ nicäyapinpi. ³⁷Tsaymi Dios Yayapagga ni imapis ajatsu.”

³⁸Maríanam nirgan: “Nogaga Dios Yayapa servigninmi callä. Gam nimangayquinö callätsun.”

Tsaypitam angel aywacurgan.

María präman Isabelta watacagnin aywan

³⁹Tsaypitanam María saslla alistacusquir, Judea marcapa jallganchö präman Isabelcagta aywargan.

⁴⁰Zacariaspa wajinman yaycusquirnam präman Isabelta tarisquir saludargan: “¿Yamayllacu caycanqui präma?” nir.

⁴¹María tsaynö rimaycusquiptinmi, Isabelpa pachanchö wamra cushicurnin cuyurgan. Isabelnam Espiritu Santopa poderninwan ⁴²jinchipa nirgan: “iLlapan warmicunapitam Dios Yaya gamta cuyashurniqui bendisar acrashurgoyqui y wawayquipis benditom! ⁴³¿Pitan nogalla cä, Señorlläpa maman watacaycallämānanpag?”

⁴⁴Rimaycamangayquita wiyasquiptimi, pachächö wamra cushicurnin cuyurgan.

⁴⁵Dios Yaya nishungayquim rasumpa cumplinga. Tsayta criyirmi, ialläpa cushishga cawacunqui!” nir.

Dios Yayata María alaban

- ⁴⁶Maríanam nirgan:
“Dios Yayatam llapan shongöwan
alläpa alabä.
- ⁴⁷Salvamagni Dios Yayapagmi
yarpaynichöpis alläpa cushicü.
- ⁴⁸Umilde alli shongoyog servignin
cangätam ricämashga.
Cananpitaga llapan runacunam
cushishga willanacuyanga,
Dios Yaya alläpa cuyamarni
acramanganta.
- ⁴⁹Dios Yayam poderöso cayninwan
nogapag llapan allícunata
rurashga.
Payga Santo carmi, alläpa alli.
- ⁵⁰Mandacuyinincunata respetarnin
cäsucugcunatam llaquipanga.
Tsaynöllam llapan mirag
aylluncunatapis llaquipanga.
- ⁵¹Poderöso cayninwanmi imayca
ajacunatapis ruram.
Orgullöso allitucugcunatam mana
välepgag churan.
- ⁵²Mandacugcunatam
mandacuyanganpita gargosquir,
jormal alli shongoyogcunata
mandacuyänanpag churargan.
- ⁵³Wactsacunatanam llapan alli
imaycancuna juntanganyag
garaycurgan.
Pero ricucunataga mana imannagtan
aywacuyänanpag dejashga.
- ⁵⁴Servignin Israel runacunatam
llaquiparnin yanapargan.
Tsaynöllam llaquipäcuyninwan
cuyacuynintapis gongargantsu,
- ⁵⁵unay awiluntsic Abrahamta
äninganta yarpasquirmi,
paypita mirag ayllun
awiluntsiccunata imayyagpis
yanapanga.”

⁵⁶Tsaychö María priman Isabelwan
quimsa quilla pärasquirnam, wajinman
cuticurgan.

Juan Bautista yuringan

⁵⁷Tsaypitanam Isabelpa quillan
pagtasquiptin, juc ollgo wamrata
geshyacurgan. ⁵⁸Tsayta vecinuncunawan
aylluncuna musyasquirmi, Isabelman
aywar alläpa cushicuyargan, “Dios Yayam
llaquiparnin wawan garaycushga” nir.

⁵⁹Tsay wamra semänayog caycaptinam,
pengayninchö señalatsiyargan.
Tsaychönäm taytan Zacariaspa shutinta
churayta munayargan. ⁶⁰Mamannam,
“iManam! Shutinga Juanmi canga” nirgan.

⁶¹Pero runacunanam niyargan:
“¿Imanir? iAlluyquicunachöga manatsag
ni pipis Juan shutiyogga cantsu!”

⁶²Tsaynö nirmi, Zacariasta señasllapa
tapuyargan: “¿Tsuriquipa shutin
imatatan churanqui?” nir.

⁶³Zacariasnam ichic tablata
macyayänanpag mañasquir, “Shutinga
Juanmi canga” nir, gellgargan. Tsayta
liyisquirnam tsaychö runacuna
mantsacashga cayargan. ⁶⁴Tsaypitanam
Zacarias jina öra parlarnin gallaycurgan,
Dios Yayata alabarnin. ⁶⁵Tsaychö llapan
vecinuncunam alläpa mantsacashga
cayargan. Tsaymi maytsay Judea jallga
estanciacunachö runacuna
mantsacashga parlapacuyargan, tsay
llapan päsangancunata. ⁶⁶Tsayta
runacuna wiyasquirnam yarpachacur
tapunacuyargan: “Tsay wamraga
¿imanöpagra canga?” Dios Yayapa
alläpa cuyacuy poderninwan caycarga.

**Salvador shamunanpag
Zacarias willacun**

⁶⁷Tsaypitanam taytan Zacarias,
Espiritu Santopa poderninwan nirgan:

Lc 1.59 Puntatam tsaynö señalacuyargan judiu cayanganga musyayänanpag Lc 2.21.

- 68 “¡Israel marcamañicunapa Diosninta agradëcicur llapantsic alabashun! Paymi shamurnin yanapamarnintsic rasumpa salvamashcantsic.
- 69 Shamurnin salvamänapagmi Dios Yayapa servignin unay rey Davidpa ayllunchö, juc poderöso Salvador yurinanpag caycan.
- 70 Tsay Salvador yurinanpagmi Diosnintsic änicurnin, unay willacug profëtancunatawan willacatsirgan.
- 71 Conträmarnintsic chiquimagnintsiccunapa maquinpitam jorgor salvamashcantsic.
- 72 Unay aylluñticcunata llaquiparmi, tsay sagrädu änicunganta Dios Yaya canan yarpar cumplinga.
- 73 Unay awiluntsic Abrahamtam Dios Yaya jurarnin niran: ‘Diosmi cä. Äningagtam imaypis cumplishag’ nir.
- 74 Tsaymi chiquimagnintsiccunapa maquinpita salvamäshun, Payllatana mana mantsacur servinapag.
- 75 Pay munangannö allicunallata ruramin, llapan cawaynintsicchö jutsannag shumag servishun.
- 76 Gam llullu wamrallä, cieluchö poderöso Dios Yayapa willacug profëtanmi canqui. Diospa Tsurin shamunanpagmi, puntata aywarnin runacunata alistarnin prevenir willacur,
- 77 ninqui: ‘Israel runacuna jutsa rurayangayquicunapitam, Dios Yaya perdonar salvayäshunqui.’
- 78 Poderöso Dios Yayaga alläpa cuyacuyninwanmi llaquipämantsic. Tsaymi yurinanpagna caycan Dios Yayapa Tsurin,

imayca rupay yargamugnörag llapanman actsicyar cielupita yachatsimänapag.

- 79 Llapan runacuna tutapaychönö imaypis wañuyta mantsacurnin, cawaycagcunatam imayca actsicyagnörag yachatsinga. iTsaymi quiquin Dios Yaya cushicuy nänipa pushamäshun, shumag alli päyacuychö cawacunapag!”

80 Tsaypitanam Juan wiñarnin, criyicuyninchö mas firmi tsaracur imaycacunatapis allicunallata rurargan. Tsaynöllam tsunyacunachö täcurgan, Israel runacunata manarag llapanpa puntanchö willacurnin.

Señor Jesucristo Belen marcachö yurin
(Mateo 1. 18-25)

2 ¹Tsaypitanam María geshyacunanpag quillan chaycämuñtinna, Cesar Augusto niyangan rey Romachö, maytsay mundupa mandacugnin caycargan. Paymi mandacurgan llapan runacuna censochö apuntacur yupashga cayänapag. ²Cay censotam rurayargan, shutincunata apuntatsir Siria marcachö Cireneo mandacug niyangan gobernador caycaptin. ³Llapan runacunam unay aylluncunapa marcancunaman shutincunata apuntatsig aywayargan.

⁴Tsaynöllam Galileachö Nazaret marcapita, Joséwan Mariäpis alläpa caruta aywayargan. Tsay Judeachö Belen marcamanga aywayargan, Josépa unay awilun rey David yurishga captinmi. ⁵Joséwan Mariäm Belenman apuntacug aywayargan, yupashga cayänapag. Casarayänanllapagrag parlashga caycarmi, Mariäga geshyacunanpagna caycargan. ⁶Tsaychö caycäyaptinmi, Mariäpa quillan pagtasquiptin geshyacunanpag

tsaripucurgan. ⁷Posadacuyänapag wajita mana tarirmi, wätacuna wataräyanan ramädallahö, llullu ollgo wawanta geshpicurgan. Tsaymi inchanawan piturcurnin, wätacunapa micucuyänanllaman ujuycatsirgan.

**Üsha mitsicugcunata
angelcuna yuripun**

⁸Tsay pagasmi Belenpa washaläninchö üshancunata mitsicug runacunapis täpaycäyargan. ⁹Tsaymanmi illagpita angel yurisquir, Dios Yayapa poderninwan imayca illagonö atsicuyaptin, üshata täpacugcuna mantsacashga cayargan. ¹⁰Pero angelnam nirgan: “Ama mantsacäyaytsu. Llapan runacunawan cushishga cayänayquipagmi canan willayäshayqui. ¹¹Unay rey Davidpa marcan Belenchömi Salayäshugniqui canan yurishga caycan. iPaya Señornintsic Cristom! ¹²Dios Yayapa Tsurin canganta musyayänayquipag, canan aywarmi llullu wamrata tariyanqui, wätacunapa micucuyänanchö inchanawan pitushga ujuraycagta.”

¹³Angel tsaynö mitsicugcunata niycaptinnam, cielupita maytsicag angelcuna yurisquir, Dios Yayata alabarnin niyargan:

¹⁴ “iCieluchö caycag poderöso Dios
Yayalläcuna,
alläpa cushishgam alabaycuyag!
iCananpitaga alli päyacuychö
cawacuyay,
Dios Yayapa cuyacuyinwan cay
patsachö cushitsirnin
cawacugcuna!”

¹⁵Tsaynö nisquirnam, cieluman angelcuna cuticuyargan. Mitsicugcunanam ninacuyargan: “iDios

Yaya willatsimangantsicnö, acu jina öra, Belenman aywar ricämushun!” nir.

¹⁶Impëñulla aywarnam Josétawan Mariata y llullu wamratanam wätacunapa micucuyänanchö ujuraycagta tariyargan. ¹⁷Tsaynö ricaycurnam mitsicugcuna llullupag angel llapan ninganta willacuyargan. ¹⁸Mitsicugcuna willacuyanganta wiwarnam, runacuna cushicurnin mantsacashganö cayargan. ¹⁹Tsaynö niyaptinnam, Mariaga shongollanchö catsirnin yarpachacurgan. ²⁰Mitsicugcunanam angel willacungannölla llulluta ricaycur, cushishga alabarnin cuticuyargan: “iDios Yayaga alläpa poderösom, agradëcicunantsicmi!” nir.

Niño Jesústa templuman apayan

²¹Wamra semänayog caycaptinnam, tayanwan maman pengayninchö señalatsiyargan. Shutinnam churayargan Jesústa, angel Mariata yuripur ningannölla.

²²Moisés mandacungan ley ningannömi María limpiu cananpag, chuscu chunca junagtarag shuyargan. Tsaymi tsay junag chäriptinrag, Mariawan Josépis Jerusalénchö templuman aywayargan, Jesústa Dios Yayata entregayänanpag. ²³Tsaynö rurayänanpagmi Diospa Palabran gellgashgachö nirgan: “Llullu ollgo tsuriquitaga Dios Yayata entregaycunqui servignin cananpag.” ²⁴Dios Yaya mandacungan ley mi gellgaraycan: “Nogata ishca y culcushta o ishca llullu palomacunata garaycayämanqui.” Cay leytapis cumpligmi Joséwan María aywayargan.

²⁵Tsay Jerusalén marcachömi Simeón shutiyog runa täcurgan, Dios Yayata alläpa

cuyag alli runa. Paymi imaycatapis allacunallata ruramin, israelcuna Cristo shamuptin libracashga cayänanta shuyaragan. Payga Dios Yayapa Espiritu Santonwanmi cargan. ²⁶Tsaymi Espiritu Santo jucpun musyatsir nirgan: “Dios Yaya cachamungan Cristota ricarragmi wañunqui” nir. ²⁷Tsaynam Espiritu Santo pushaptin, tsay junag templuman aywargan. Tsaymannam Niño Jesústa Joséwan María chátsiyargan, ley mandacungancunata cumpliyänanpag. ²⁸Simeónnam llullu wamranta ricaycurnin margarcur, Dios Yayata alabar nirgan:

²⁹ “Dios Yayallä, noga servigniquita äñillämangayquitam canan cumplirgoyqui.

Cananmi sïga, tranqüilona cushishga wañucülläshag.

³⁰ ¡Salvayämagnï Tsuriqui Cristo ricaycur!

³¹ Quiquiqui ningayquinömi maytsaychö llapan runacunapa ricänanchö payga salvanga.

³² Mana Israelcag runacunatapis actsi cuentanömi actsirmin, gam Diosta regetsishunayquipag pushamunga.

Pay poderöso canganraycum servigniqui israelcunapis imayca actsinörag alläpa cushishga cayanga.”

³³Tsaynö Niño Jesúspag Simeón ninganta, taytanwan maman wiyarmi mantsacashga niyargan: “¿Tsaynösurag canga?” nir. ³⁴Simeónnam paycunata nirgan: “Dios Yaya gamcunam bendiciunninta churaycamutsun.” Tsaypitanam Jesúspa maman Mariata nirgan: “Cay wawayqui jatunyaruptinmi, llapan Israel runacuna payman mana criyicurnin condenacäyanga. Pero payman rasumpa firmi criyicurmi sïga, salvacashga cayanga. Quiquin Dios Yayapita shamushga captinmi, runacuna chasquiyangatsu. ³⁵Tsaynöpam llapan

runacunapa shongoncunachö yarpaynincunata imanö cangantapis musyatsicunga. Yarparanqui, María. Imayca cuchillowan shongoyquita tucsiyämuptin nanatsicugnöragmi, tsay wawayquiraycu llaquicurnin sufrinqui.”

³⁶Tsaychömi juc chacwanpis cargan, Diospa Palabranta parlag Ana shutiyog. Unay awilunmi Aser shutiyog runapa ayllun y taytannam Fanuel cargan. Jipashlla casaracunganpita ganchis watallam gojanwan täcuyargan. ³⁷Gojan wañucusquiptinmi, pusag chunca chuscu watana japallanlla täcurgan. Tsaymi templupita mana yargor pagasta junagpa ayunamin, Dios Yayata adorar mañacurgan.

³⁸Tsayman Ana chärirnam wamrata ricaycur nirgan: “Dios Yaya, gantam alläpa agradécicug cay Tsuriquita nogacunaman cachamungayquita.” Tsaychö criyicug runacunatanam nirgan: “Cay wamram nogantsic Israel runacuna, unaypitana Cristota shuyangantsicnö salvamäshun.”

³⁹Tsaypitanam Dios Yayapa leyninchö llapan mandacungancunata Joséwan María cumplisquir Galileachö Nazaret marcancunaman cuticuyargan. ⁴⁰Niño Jesús wiñarnam Dios Yaya cuyarnin yanapaptin, alläpa yachayyog cargan.

Jesús ley yachatsicugcunawan templuchö parlan

⁴¹Wata watam Jerusalénman Joséwan María Pascua semäna fiestata pätag aywayag. ⁴²Tsaymi Jesús chunca ishca watayog caycaptin, Israel runacunapa costumbrincunamannö Pascua semäna pätag Jerusalénman aywayargan. ⁴³Tsay Pascua semäna ushacasquiptinmam, marcancunaman cuticuyargan. Joséwan María mana musyayanganyag Jesúsga Jerusalénchö quédasquirgan. ⁴⁴Paycunaga yarpäyargan “Cay atscag runacunawanchi shamuycan” nirmi. Näñita goyatna aywaycarmi, pullan nänichö

tardiyaycaptinna Jesústa watucasquir aylluncunatawan regeshancunata tapupacunin ashiyargan. ⁴⁵Tsaychö mana tarirnam, tsayllapita Jerusalénman ashignin cutiyargan.

⁴⁶Cutiycurnin quimsa junag ashiyanganchöragmi, templuchö ley yachatsicugcunapa rurinchö paycunata wiyarmin tapupar, Jesús jamaycagta tariyargan. ⁴⁷Jesús alläpa alli yachayyog carmi, tapuyangancunata imanö shumag contestaptin, wiyagnin runacunapis mantsacäcur ni ima niyta puediyargantsu. ⁴⁸Jesústa ricasquirnam, taytanwan maman mantsacäyargan. Mamannam nirgan: “Á wawa, ¿imanirtan caynö rurayámar, mana willayámarni quédargoyqui? Alläpa llaquishgam taytayquiwan ashirmi qui puriyargö.”

⁴⁹Jesúsnam nirgan: “¿Imanirtan ashiyámargoyqui? ¿Manacu gamcuna musyayanqui Dios Taytäpa wajinchö canäta?”

⁵⁰Pero tsaynö ningantaga paycunaga manam ni ichicllatapis entendiargantsu.

⁵¹Tsaypitanam paycunawan Nazaret marcancunaman cuticur, llapan mandayangancunata rurarnin cargan. Mamannam shongonllachö llapan pásangancunata yarparar catsirgan.

⁵²Jesúsnam wiñarnin jatunyar, alläpa allish yachayyog cargan. Dios Yayapagwan runacunapagpis cuyashga alläpa allim cargan.

**Juan Bautista Jordan mayu
cuchuncunachö bautizarnincuna
yachatsicun**

*(Mateo 3.1-12; Marcos 1.1-8;
Juan 1.19-28)*

3 ¹Tiberio Cesar shutiyog runa, chunca pitsga watana Roma runacunapa mas mandacug reynin caycaptinmi, Judea

marcachö Poncio Pilato mandacug cargan. Galilea provinciachönám Herodes, Iturea y Traconite provinciacunachönám Herodespa waugen Felipe y Abilinia provinciachönám Lisaniás. ²Jerusalénchönám llapanta mandagnin sacerdotícuna Anaswan Caifas caycäyargan. Tsay witsaymi tsunyacunachö Zacariaspa tsurin Juan Bautista päraptin, quiquin Dios Yaya Palabranta willacunanpag mandargan. ³Tsaymi Jordan mayu cuchun marcacunapa purimin, runacunata yachatsir nirgan: “Jutsayquicunapita déjasquir arepenticurnin bautizacuyay, Dios Yaya perdonayáshunayquipag” nir.

⁴Tsaynö Juan Bautista willacunanpagmi, Diospa Palabranta parlag Isaías gellgarnin nirgan:

“Tsunyacunachö purirmi juc runa willacurnin ninga:

‘Dios Yayapa Tsurin shamunanpag ichicllanam faltan.

Alli nänipa purignö alistacurnin shumag prevenicuyay.

⁵Mana alli nänicunata parijarnin jircacunata pampatsagnö, wicsu nänicunata derëchar rumi ruminta limpiagnö alistacuyay, shongoyquicunachö mana alli rurayniquicunata déjasquir.

⁶Entëru munduchö maytsay marcacunachömi llapan runacuna musyayanga, Dios Yayapita Salvador shamunganta.’”

⁷Tsaynö bautizacuyänapag maytsicag runacuna Juanman maytsaypita shayámuptinmi nirgan: “Gamcunaga, venenösa víborapa castan caycar, ¿imagtan nogaman shayámunqui? ¿Tsaynö caycarga, imanörög Dios Yayapa rabiayninwan condenacionpita geshpir salvacäyanqui? ⁸Llapan jutsayquicunata déjasquir arepenticurnin,

allicagcunallatana rurayay. Ama gamcunaga niyaytsu, ‘Unay Abrahampa ayllun carmi, Diospana cantsic’ nirga. Tsaymi niyag: Dios Yaya munarga cay rumicunapitapis Abrahampa ayllunman tigratsinmanmi. ⁹Imayca mana alli wayug jachacunata wallusquir ninachö waycangantsicnömi, Dios Yaya listo caycan mana criyicuyangayquipitawan mana alli rurayniquicunapita castigayäshunayquipag.”

¹⁰Tsaynö niptinmi runacuna tapuyargan: “Tsaynö captinga, ¿imatatan rurayäshag?”

¹¹Juannam nirgan: “Ishcay camisyauquicuna captinga, juccag camisyauquicunata camisannagcagta garaycuyay. Tsaynölla micuyniquicuna captinpis, mallagaycagcunata garaycuyay” nir.

¹²Contribucion cobragcunanam Juanman witrnin bautizacur, tapurnin niyargan: “Maestru, ¿imatatan nogacunaga rurayäshag?” nir.

¹³Juannam nirgan: “Contribucionpita mastaga ama cobracuyanquitsu.”

¹⁴Tsaynöllam soldäducunapis witiycur tapuyargan: “Nogacunaga, ¿imatatan rurayäshag?”

Paycunatanam nirgan: “Ama runacunapa imancunatapis amälasga gechuyanquitsu ni amenasarnin calumniäyanquitsu gellaynincunaraycu. Pägayäshungayquillawan conformacuyanqui.”

¹⁵Juan yachatsicunganta runacuna wiyarmi, alläpa cushishga quiquillancunachö niyargan: “Diospa Tsurin shuyangantsic Cristoch cayga.”

¹⁶Tsaynö niyanganta musyasquirnam, Juan Bautista nirgan: “Nogaga yacullawanmi bautizayag. Pero jucmi shamunga nogapita mas poderöso. Manam nogaga paypa llangenpa watunta umpuycur pascanällapagpis

servitsu. Payga Espiritu Santota garayäshurniquim bautizayäshunqui lunyaycag ninawannö. ¹⁷Ichicllanam faltan, ërata limpiarnin rurasquir trüguta wayragnö runacunata acrananpag. Trüguta gorisquir churagnömi criyicug runacunata apacunga. Pero mana criyig runacunatam siga, imayca päjata waycagnö mana wañug ninachö rupatsinga.”

¹⁸Tsaynö nisquirnam, Dios Yayapa Alli Willacuynta tucuyläyapa alverticur willacurgen.

¹⁹Tsaypitanam mandacug Herodesta Juan Bautista piñapar nirgan: “Ama waugeyquipa warminwan täcuytsu. Tsayga alläpa mana allim. Tsaynölla amana tucuyläya mana allicunata ruraynatsu.”

²⁰Tsaynö ninganpitanam, mana allita rurangacunapita mas peor mana allita rurarnin, Herodes Juanta carcelman gaycascatsirgan.

Juan Bautista

Señor Jesucristota bautizan

(Mateo 3.13-17; Marcos 1.9-11)

²¹Rey Herodes manarag prësu achcutsiptinmi, llapan runacuna bautizacuyanganchö Señor Jesucristopis bautizacurgen. Tsaychö Señor Jesucristo Dios Yayaman mañacuycaptin cielu quichacasquiptinmi, ²²imayca palomanö Espiritu Santo ricaraycäyaptin urämur, Señor Jesucristoman chämurgen. Tsaynam cielupitanam Dios Yaya nimurgen: “Gamga cuyay Tsurimi canqui. Gamtam quiquí acrashcag cushitsimänanpag.”

Señor Jesucristopa

puntacag aylluncuna

(Mateo 1.1-17)

²³Señor Jesucristo quimsa chunca watayog caycarnam, Dios Yayapa Alli

Willacuyinta willacur gallaycurgan.
Tsaymi runacuna yarparnin
criyiyangannö Señor Jesucristoga
Josépa tsurin cargan.

- Joséga Elípa tsurinmi.
²⁴ Elíga Matatpa tsurinmi.
 Matatga Levípa tsurinmi.
 Levíga Melquípa tsurinmi.
 Melquíga Janapa tsurinmi.
 Janaga Josépa tsurinmi.
²⁵ Joséga Matatíaspa tsurinmi.
 Matatíasga Amósipa tsurinmi.
 Amósiga Nahúmpa tsurinmi.
 Nahúmga Eslipa tsurinmi.
 Esliga Nagaipa tsurinmi.
²⁶ Nagaiga Mahatpa tsurinmi.
 Mahatga Matatíaspa tsurinmi.
 Matatíasga Semeipa tsurinmi.
 Semeiga Josecpa tsurinmi.
 Josecga Judápa tsurinmi.
²⁷ Judága Joanánpa tsurinmi.
 Joanánga Resapa tsurinmi.
 Resaga Zorobabelpa tsurinmi.
 Zorobabelga Salatielpa tsurinmi.
 Salatielga Neripa tsurinmi.
²⁸ Neriga Melquípa tsurinmi.
 Melquíga Adipa tsurinmi.
 Adiga Cosampa tsurinmi.
 Cosamga Elmadampa tsurinmi.
 Elmadamga Erpa tsurinmi.
²⁹ Erga Josuépa tsurinmi.
 Josuéga Eliézerpa tsurinmi.
 Eliézerpa Jorimpa tsurinmi.
 Jorimga Matatpa tsurinmi.
³⁰ Matatga Levípa tsurinmi.
 Levíga Simeónpa tsurinmi.
 Simeóngaga Judápa tsurinmi.
 Judága Josépa tsurinmi.
 Joséga Jonampa tsurinmi.
 Jonamga Eliaquimpa tsurinmi.
³¹ Eliaquimga Meleapa tsurinmi.
 Meleaga Menapa tsurinmi.
 Menaga Matatapa tsurinmi.
 Matataga Natánpa tsurinmi.
³² Natángaga Davidpa tsurinmi.

- Davidga Isaípa tsurinmi.
 Isaíga Obedpa tsurinmi.
 Obedga Boozpa tsurinmi.
 Boozga Salmon tsurinmi.
 Salmon Nahasónpa tsurinmi.
³³ Nahasóngaga Aminadabpa tsurinmi.
 Aminadabga Adminpa tsurinmi.
 Adminpa Arnipa tsurinmi.
 Arniga Esrompa tsurinmi.
 Esromga Farespa tsurinmi.
 Faresga Judápa tsurinmi.
³⁴ Judága Jacobpa tsurinmi.
 Jacobga Isaacpa tsurinmi.
 Isaacga Abrahampa tsurinmi.
 Abrahamga Tarépa tsurinmi.
 Taréga Nacorpa tsurinmi.
³⁵ Nacorga Serugpa tsurinmi.
 Serugga Ragaupa tsurinmi.
 Ragauga Pelégpa tsurinmi.
 Pelégga Heberpa tsurinmi.
 Heberga Salapa tsurinmi.
³⁶ Salaga Cainánpa tsurinmi.
 Cainángaga Arfaxadpa tsurinmi.
 Arfaxadga Sempa tsurinmi.
 Sempa Noépa tsurinmi.
 Noéga Lamecpa tsurinmi.
³⁷ Lamecga Matusalénpa tsurinmi.
 Matusalénga Enocpa tsurinmi.
 Enocga Jaredpa tsurinmi.
 Jaredga Mahalaleelpa tsurinmi.
 Mahalaleelga Cainánpa tsurinmi.
³⁸ Cainángaga Enóspa tsurinmi.
 Enósga Setpa tsurinmi.
 Setga Adánpa tsurinmi.
 Adángaga Dios Yaya camanganmi
 cargan.

**Señor Jesucristota Satanas
 prueban tentayta munar**
(Mateo 4.1-11; Marcos 1.12-13)

4 ¹ Señor Jesucristo
 bautizacusquirnam, Espiritu
 Santopa poderninwan Jordan mayupita
 cuticurgan. Tsaynam Espiritu Santo
 tsunyaman pushargan. ²Tsay tsunya

mana imacagchömi chuscu chunca junag cargan. Tsaymi Señor Jesucristota Supay pruebarnin tentayta munargan. Tsay lapan junagcuna mana ni imatapis micurmi, Señor Jesucristo mallagargan. ³Tsaymi Supay nirgan: “Diospa Tsurin carga, mä cay rumita manday tantaman ticrayänanpag.”

⁴Señor Jesucristonam nirgan: “Diospa Palabran gellgashgachömi nin: ‘Runaga namam tantata micurllatsu cawanga, sinöga Dios Yayapa Palabran mandacunganta rasumpa cäsurmi mas alliga cawacunga’ nir.”

⁵Tsaypitanam jirca puntanman Señor Jesucristota Satanás pushaycur, entëru munduchö maytsay naciuncunata ricätsir, ⁶nirgan: “Cay lapan jatusag shumag marcacunatawan lapan mandacuyniquipis garaycugmanmi. Cay lapan imayca riquësancunata chasquishga carmi, munarga pitapis garaycūman. ⁷Si gongorpacuycurnin adoramaptiquiga, cay imayca ricaycangayquim lapan gampa canman.”

⁸Pero Señor Jesucristonam nirgan: “iCaypita witiy, Satanás! Diospa Palabran gellgashgachömi nin: ‘Juc japallan Diosllayquitam adorarnin servinayquiga.’”

⁹Tsaypitanam Supay Jerusalénman Señor Jesucristota pusharcur, templupa jananman lätarcatsir nirgan: “Diospa Tsurin carga, mä caypita jegarpuy.

¹⁰Diospa Palabran gellgashgachömi nirgan: ‘Gammanmi Dios angelnincunata cachamunga alcäbu cuidarnin, ¹¹maquincunawan ahcuyäshuptiqui, rumicunachö chaquiquita mana tacacunayquipag.’”

¹²Señor Jesucristonam nirgan: “Diospa Palabran gellgashgachömi

nirgan: ‘Diosniquitaga ama ni ima pruebamanpis churanquitsu.’”

¹³Tsaynö tentarnin Señor Jesucristota mana allita ruratsiyta mana puedirmi, Supayga “Yapaychönam cutimushag” nir, aywacurgan.

**Señor Jesucristo Galileachö
yachatsicur gallarin**

(Mateo 4.12-17; Marcos 1.14-15)

¹⁴Tsaypitanam Espíritu Santopa poderninwan Señor Jesucristo Galilea provinciaman cuticurgan. Maytsay enstanciacunachö runacunam Señor Jesucristopa ruraynincunata musyayargan. ¹⁵Llapan marca changanchömi, Dios Yayaman mañacuyänanpag goricäyänan wajicunachö Señor Jesucristo yachatsicurgan. Tsaynö yachatsicuptinmi, runacunapis alabarnin niyargan: “iPayga alläpa allim!” nir.

**Señor Jesucristo Nazaret
marcanchö cangan**

(Mateo 13.53-58; Marcos 6.1-6)

¹⁶Tsaypitanam wiñangan marcan Nazaretman Señor Jesucristo cutiycur, costumbrinmannö sabado jamay junag goricäyänan wajiman aywargan. Tsaychömi Diospa Palabranta liyinanpag sharcurgan. ¹⁷Tsaynam Diospa Palabranta willacug Isaías gellgangan libruta Macyayargan. Señor Jesucristonam libruta quicharcur, gellgaraycagta tarisquir liyirnin nirgan:

¹⁸“Dios Yayapa Espírituunmi nogachö caycan.

Paymi acramashga wactsacunata
Alli Willacuyta willanäpagwan
llaquishgacunata cushitsinäpag.
Tsaynöllam Supayta servig
runacunapa jutsancunapita
libranäpag,

gapracunatapis cuticätsinäpag,
llaquipaypag servicug
esclävucunatapis libranäpag
manana sufriyänanpag.

¹⁹ Tsaynöpam ‘Canan cushicuy
tiempuchö Dios Yaya alläpa
cuyayarniqui,
salvayëshungayquita’ willayänagpag
mandamashga.”

²⁰ Tsaynö liyisquimam, libruta wichgarcur
goricäyänan wajichö yanapacug runata
cutiyatsimin jamaycurgan. Tsaychö
caycagcunanam Señor Jesucristota
ricaräyargan. ²¹ Tsaynam nirgan:
“Wiyaycayangayqui libruchö nogapag
gellgaraycagmi, canan öra cumplirgon.”

²² Tsaymi Señor Jesucristo alläpa
shumagta parlar yachatsicuptin, llapan
runacunapis cushicurnin mantsacashga
ninacuyargan: “Cay Jesusga alläpa allim.
¿Pero, imanörag Josépa tsurinlla caycarga,
tsayläya shumagta parlan?” nir.

²³ Señor Jesucristonam runacunata
nirgan: “Gamcunaga masran
niyämänqui: ‘Jampicug carga,
quiquiquirag jampicunquiman.
Capernaumchöga geshyagyashacunata
cuticätsirgoyqui, mä canan cay
marcayquichöpis tsaynö ruraymuy.’

²⁴ “Rasuncagtam niyag: Manam ni
maygan profëtatapis marcanchöga
chasquirnin respetar cäsuyantsu.
²⁵⁻²⁶ Yarpäyay Elíaspa tiempuchö
imanö canganta. Manacu quimsa wata y
sogta quilla pasaypa usyarnin
tamyargantsu. Tsaymi maytsay Israel
marcachö runacuna mallagaywan
sufriyargan. Israelchö atscag viudacuna
sufriycäyaptinpis, Eliástam Dios Yaya
cachargan caru Sidonpa lädun Sarep
marcachö täcug viudallaman.

²⁷ Yarpäyay imanömi Eliseo
cawaycangan tiempu cargan. Israel

marcanchö atscag runacunam
melanaypag wicuwän geshyagyashga
cayargan. Tsaymi caru Siria marcachö
Naaman shutiyog runallata Eliseo
cuticätsirgan, manam Israel marca
majincunatatsu.”

²⁸ Señor Jesucristo tsaynö niptinnam,
Dios Yayaman mañacuyänan wajichö
goricashgacuna alläpa piñacuyargan.
²⁹ Tsaynö piñacurmi llapan sharcurnin,
Señor Jesucristota Nazaretpita cunjar
garachar, tsay marcapa jircannin
cunjarpuyänanpag apayargan. ³⁰ Pero
payga atscag runacunapa rurin
pita ullusquirmi aywacurgan.

**Señor Jesucristo juc runapita
supayta gargon**
(Marcos 1.21-28)

³¹ Tsaypitanam Galileachö Capernaum
marcaman uraypa aywargan. Jamay
sabado junagchömi, Dios Yayaman
mañacuyänan wajichö runacunata
yachatsicurgan. ³² Poderöso
willacuyninta yachatsicuptinmi,
runacunapis mantsacashga cayargan.

³³ Tsaychömi supayyog runa jinchi
gayaraypa nirgan: ³⁴ “¡Au Jesús, Nazaret
runa! ¿Imananquitan nogacunawan?
¿Ushacätsiyämagnücu shamurgoyqui?
¡Noga regegmi, Diospa Santo Tsurin
cangayquita!” nir.

³⁵ Tsaymi Señor Jesucristo supayyog
runata piñaparnin nirgan: “¡Upälla cay!
¡Canan cay runapita yargoy!” nir.

Niyucuptinnam, llapanpa puntanchö
runata patsaman ishquiscatsirnin, mana
imananlla supay yargorgan. ³⁶ Llapan
runacunanam mantsacashga
ninacuyargan: “¿Imanötan cay
yachatsicuyninga? ¡Poderninwan
mandaptillan, supayyog runacunapita
supaycunapis yargoyan!”

³⁷Tsaynö Señor Jesucristo rurangantam, maytsay Galilea marcacunachö runacuna musyasquiyargan.

**Señor Jesucristo Pedropa
suegranta cuticätsin**

(Mateo 8.14-15; Marcos 1.29-31)

³⁸Tsaypitanam Dios Yayaman mañacuyänan wajipita yargosquir, Simón Pedropa wajinman Señor Jesucristo aywargan. Tsaychömi Simónpa suegran fiebrewan geshyaycargan. Señor Jesucristo chaycuptinan “Cuticaycätsillämuy” nir, rugayargan.

³⁹Señor Jesucristonam geshyaycagman witiyurnin umpuycur nirgan: “Amana fiebreynatsu.”

Tsaymi jina öra fiebrenpita tsay warmi cuticasquirnin sharcur, paycunata servirin gallaycurgan.

**Atscag geshyagyashacunata Señor
Jesucristo cuticätsin**

(Mateo 8.16-17; Marcos 1.32-34)

⁴⁰Tsaypitanam rupay jegaycaptinna, tucuyläya geshyagyashacunata Señor Jesucristoman apayämurgan. Señor Jesucristonam juc juella paycunaman maquina churar, llapanta cuticätsirgan.

⁴¹Tsaynöllam atscag supayyog runacunapita supaycunapis yargornin, gayaraypa niyargan: “iGanga Diospa Tsurinmi canqui!” nir.

Pero Señor Jesucristonam nirgan: “Upälla cayay.” Tsaynö piñaparmi payga parlayänanta änirgantsu, Dios Yayapa Acrashgan canganta musyayaptin.

**Señor Jesucristo tsunyachö
quiquillan Dios Yayaman
mañacungan**

(Marcos 1.35-39)

⁴²Tsaypitanam patsa atsicyaycaptinna, Señor Jesucristo tsunyaman japallan

aywacurgan. Tsaynö aywasquiptinmi runacuna Señor Jesucristo caycanganman ashirin aywar tarisquir niyargan: “Täcushunrag ama aywacuyragtsu” nir.

⁴³Pero Señor Jesucristonam nirgan: “Maytsay marcacunachömi Dios Yayapa Alli Willacuyninta willacur yachatsicunä. Cay patsamanmi cachamashga, Mandacuy Reynon imanö canganta runacuna musyayänanpag willacunäpag.”

⁴⁴Tsaypitanam Judea marcachö maytsaypa purirnin, Dios Yayaman mañacuyänanpag goricäyänan wajicunaman aywar yachatsicur willacurgan.

**Señor Jesucristo Pedrota gayarnin
discípulun cananpag acran**

(Mateo 4.18-22; Marcos 1.16-20)

5 ¹Juc cutinam Genesaret niyangan Galilea lamar cuchunchö Diospa Palabranta Señor Jesucristo yachatsicuycargan. Wiyayta munarmi, maytsicag runacuna goricar quichquinacurrang tangayargan.

²Tsaynam yacuchö ishca y büqui caycagta Señor Jesucristo ricargan.

Pescädo achcugcunanam büquincunapita yargosquir, pläyachö ataräyancunata mayllaycäyargan.

³Tsaynam Simónpa büquinman lätarcur nirgan: “Simón, cay yacu chunpita mas ruriman yaycushun.”

Yaycusquiyaptinnam, büquiman jamaycur runacunata yachatsirgan.

⁴Yachatsicur ushasquirman Simóna nirgan: “Cananga mas ruriman aywarnin ataräyayquicunata jitayay, pescädota achcuyänayquipag.”

⁵Simónnam nirgan: “Maestru, waratnam pescayargö. Pero manam ni jucllayllatapis achcuyargötsu. Mä gam nimaptiqui ataräyata jitashag.”

⁶Ataräyanta yacuman jitaycurnam, alläpa atsca pescädota achcuyargan, ataräyancunapis rachinganyag. ⁷Tsaypitanam jucnin büquichö compañeruncunata yanapayänapag sēnasllapa gayayargan. Paycuna chäriyaptinnam, pescädota ishcan büquiman wiñayargan. Tsayläya atsca pescädocaptinmi, ishcan büquicunapis cäsü jundicäyargan. ⁸Tsayta Simón Pedro ricaycurnam, Señor Jesucristopa puntanman gongoricuycur nirgan: “iTaytay, nogalläga jutsasapa runam callä! iNogalläpita witicurcullay!”

⁹Compañeruncunawan tsayläya atsca pescädota achcuyanganpita mantsacashga carmi, Pedro tsaynö nirgan. ¹⁰Zebedeopa tsurincuna Santiagowan Juanmi, Simónpa companeroncuna cayargan. Paycunapis mantsacashgam cayargan.

Señor Jesucristonam Simóna nirgan: “Ama mantsacaytsu. Cananpitan pescädota achcungayquinö runacunata yachatsirnin gorimunqui, nogaman rasumpa firmi criyicayämunanpag.”

¹¹Tsaynö niptinnam, jina öra büquincunata gochapita jorgosquir, tsaychö llapanta dējasquir Señor Jesucristota gatircur aywacuyargan.

Señor Jesucristo melanaypag wicuwan geshyagyashata cuticätsin
(Mateo 8.1-4; Marcos 1.40-45)

¹²Jucpunnam juc marcachö Señor Jesucristo caycaptin, melanaypag wicuwan entëru cuerpun geshyagyasha runa chargan. Señor Jesucristota ricaycurnam, patsayag umpuycur gongoricuycurnin rugargan: “Taytay, voluntäniqui captinga melanaypag mana canäpag limpiar cuticaycatsillamay.”

¹³Tsaypitanam Señor Jesucristo tsay runapa jananman maquina churaycur

nirgan: “Noga munämi. iCananga limpiu cuticashga canayquita!”

Tsaynö niptinnam, tsay runaga jina öra geshyayninpita cuticasquir, sänu püru ticasquirgan. ¹⁴Tsaypitanam runata Señor Jesucristo nirgan: “Ama ni pitapis willacunquitsu cuticätsingagta. Mas bien sacerdotiman aywar, unay Moisés mandacungannö cuticangayquipita Dios Yayapag garaynin apay. Tsaynöpam sacerdotícuna musyayanga rasumpa limpiu cuticashgana cangayquita” nir.

¹⁵Tsaynö “Ama willacunquitsu” nicaptinpis, runacunaga masmi musyasquiyargan Señor Jesucristo cuticätsinganta. Tsaypitanam maytsicag runacuna goricäyargan yachatsicuyninta wiyayänapagwan geshyagyashacunatapis cuticätsinanpag. ¹⁶Pero Señor Jesucristoga imaypis paycunapita raquicarmi, tsunyacunapa aywar Dios Yayaman mañacug.

Señor Jesucristo invälidu mana purig runata cuticätsin
(Mateo 9.1-8; Marcos 2.1-12)

¹⁷Juc junag Señor Jesucristo yachatsicuycaptinnam, fariseocunawan ley yachatsicucuna maytsay Galilea marcapitawan Judeapita y Jerusalénpita shamurnin, goricasquir jamaycurnin wiyayargan. Quiquin Dios Yayapa poderninmi, Señor Jesucristochöga cargan. Tsaymi tucuyläya geshyagyashacunatapis cuticätsig. ¹⁸Tsaymannam runacuna mana purig invälidu runata tsacrancawan wintushga apayämurgan. Chäratsirnam, waji rurinchö Señor Jesucristo caycanganpa puntanman yaycatsiyta munayargan. ¹⁹Pero maytsicag runacuna quichqui cayaptinnam, yaycatsiyta puediyargantsu. Tsaynö mana yaycatsiyta pueDIRMI, waji jananman

lätarcur tejacunata jurgosquir, geshyaycag runata tsacrancantawan shumagllalla Señor Jesucristopa puntanman bájatsiyargan. ²⁰Tsaynö rurarnin payman rasumpa criyicyuanganta musyarmi, geshyaycag runata Señor Jesucristo nirgan: “Amigo, llapan jutsayquipitam perdonag.”

²¹Tsaynam fariseocunawan ley yachatsicugcuna quiquincunalla yarpachacuyargan: “Cay runaga Diospa contran, iimanirtan tsaynö Diostucur parlan! Quiquin Dios Yayallam jutsantsictaga perdonan.”

²²Tsaynö yarpäyanganta Señor Jesucristo musyasquirnam nirgan: “¿Imanirtan shongoyquicunallachö tsaynö yarpäyanqui? ²³¿Maygantán mas fácil ninäpag canman:

‘Jutsayquicunapitam perdonag’ ningäcu o ‘Cuticashganam canqui; canan aywacuy’ ningäcu? ²⁴Pero cananmi ricätsiyäshayqui Diospita Shamushga Runa car, poderöso cayniwan runacunapa jutsanta perdonangäta.”

Tsaymi geshyagyasha runatana Señor Jesucristo nirgan: “Gamtam nig: Cuticashganam canqui. Sharcur tsacrancayquita apacurcur wajiquiman cuticuy.”

²⁵Tsaypitanam jina öra sharcurnin llapan ricäraycayaptin, tsacrancanta aparcur wajinpa cuticurgan Dios Yayaga cushishga alabarnin. ²⁶Tsaychö runacunapis mantsacürmni alabayargan: “iDios Yayaga alläpa alli poderösom! iManam ni imaypis canannö imayca alli ruragtaga ricashgatsu cantsic!” nir.

Señor Jesucristo

Levita acarnin gayan

(Mateo 9.9-13; Marcos 2.13-17)

²⁷Tsaypitanam Señor Jesucristo aywacuycar, Leví shutiyog contribucion

cobrag runata ricargan, cobracunan wajichö jamaycagta. Paytam nirgan: “Canan nogata gatimay” nir.

²⁸Tsaynam Leví runaga sharcurnin, llapan imaycanta dējasquir Señor Jesucristopa discipulun cananpag gepanta aywacurgan.

²⁹Tsaypitanam Señor Jesucristopag Leví wajinchö juc jatun banquëtitä ruratsirgan. Tsaychönam atscag contribucion cobragcunawan waquincag runacunapis Señor Jesucristowan pagta micupacuyargan. ³⁰Pero tsaynö micuycagta ricarmi, fariseocunawan ley yachatsicugcuna Señor Jesucristopa discipuluncunata musyapar niyargan: “Contribucion cobragcunawan y jutsasapacunawan ¿imanirtan gamcuna micucäyanqui?”

³¹Señor Jesucristonam nirgan: “Geshyagyashacunallam mëdicotaga wanayan, sänucagcunaga manam wanayannatsu. ³²Tsaynöllam nogapis cay patsaman shamushcä, manam jutsannag alli ruragcunata ashigtsu, sinöga jutsasapacunata ashigninmi shamushcä, jutsancunapita arepenticurnin Dios Yayaman cutiyänapag.”

Señor Jesucristota ayünopag tapuyan

(Mateo 9.14-17; Marcos 2.18-22)

³³Tsaypitanam runacuna Señor Jesucristota tapuyargan: “Juan Bautistapawan fariseocunapa discipuluncunaga imaypis ayunarmi, Dios Yayaman mañacuyan. Pero gampa discipuluyquicunaga mana ayunarmi, imaypis upyaycäyan y micuycäyan.”

³⁴Señor Jesucristonam nirgan:

“¿Acäsü casamientuman convidashgacunaga noviowan pagta caycar ayunarcu mallag cayanman?

³⁵Tsaynöllam nogawan pagta caycarga,

discípulucunapis ayunayänantsu. Pero imayca noviotanö nogata apascayämaptinmi sïga, paycunapis mallaglla ayunarnin cayanga” nir.

³⁶Tsaynö nisquirnam, yachatsicur nirgan: “Mushog tëlapita rutusquir, manam macwa llatapata remendashwantsu. Tsaynö rurarga ishcantam perdiscatsintsic. Si tsaynö ruraptinga, mushogcag tëla gentirmi macwacag llatapata mas peor rachiscatsinga. ³⁷Tsaynöllam tsayrag rurashga aswatapis, macwa mana servig puyñumanga jirpurnin wiñantsicstu. Si tsaynö wiñashgaga aswa pogornin macwa puyñuta paquiscatsiptinmi, aswapis jicharnin jancat perdisquina. Tsaymi puyñuwan aswapis jancat ushacasquiyanga. ³⁸Manam tsaytaga tsaynöga rurashwantsu. Tsaymi tsayrag rurashga aswataga mushog puyñuman jirpurnin wiñantsic. ³⁹Pipis pogoshganacag mishqui aswata yawarcurga, tsayrag rurashgacag aswataga mananam upyayta munantsu, ‘pogoshgacag aswam mas mishquiğa.’ Tsaynömi cay runacunapis, yachatsicunga mushogcaptin entendiya munayantsu.”

Señor Jesucristo yachatsicun alli rurayta jamay sabado junagchö
(Mateo 12.1-8; Marcos 2.23-28)

6 ¹Juc sabado jamay junagnam Señor Jesucristo trïgu murushga rurinpa discípuluncunawan aywaycargan. Discípuluncunam tríguta quiptusquirnin cupasquir uchuyargan. ²Fariseocuna tsayta ricaycurnam piñacur niyargan: “¡Leynintsicga manam permitintsu cay jamay sabado junagchö gamcuna tsaynö rurayänayquipag!”

³Señor Jesucristonam nirgan: “¿Manacu Diospa Palabranta liyiyashcanqui, unay rey David yanagencunawan puriyar mallagarnin rurayanganta? ⁴Davidmi Dios Yayata adorayänan wajiman yaycusquir, Diospa puntanman churashga sagrädu tantata jorgosquirnin, yanagencunawan micusquiyargan. Leynintsic mandacungannöga sacerdotícunallam tsay sagrädu tantataga micuyänan cargan. Tsaynö caycaptinpi, David yanagencunawan mana sacerdoti caycar micurnin, manam ni ima mana allitatsu rurargan.”

⁵Tsaynö nisquirnam nirgan: “Diospita Shamushga Runa carmi, sabado jamay junagchöpis mandacuyta puedi.”

Señor Jesucristo cuticätsin maquin genticashga runata

(Mateo 12.9-14; Marcos 3.1-6)

⁶Tsaypitanam yapay juc sabadochö goricäyänan wajiman Señor Jesucristo aywarnin yachatsicurgan. Tsaychömi juc runa derëchucag maquin pasaypa genticashga caycargan.

⁷Fariseocunam ley yachatsicugcunawan Señor Jesucristota ricaraycäyargan “¿Mä canan sabado junagchö leynintsicga mana cäsür, cay runata cuticätsingacush? Cuticätsiptinga quëjacushunmi” nir. ⁸Pero tsaynö yarpäyanganta tantiyasquirmi, gentishga maquiyog runata nirgan: “Sharcur, cay lllapanpa puntaman ichiy” nir. Runanam sharcurnin lllapanpa puntanman ichirgan. ⁹Tsaynam fariseocunata Señor Jesucristo nirgan: “Jucta tapuyäshayqui, ¿Imanötan leynintsic mandacun jamay sabado junagchö: Allita rurashwancu o

Lc 5.37 Tsay tiempuchö Señor Jesucristo parlargan imanö runacuna vïnota suelapita rurashga bolsacunanaman wiñäyanganta.

manacu? ¿Geshyaycag runata cuticätsishwancu o wañunaycaptinpis ricaraycashwancu?” nir.

¹⁰Tsaynam llapanacunata ricasquir, tsay runata nirgan: “Maquiquita macyamuy.” Maquina pallarcuptinnam, jancat cuticascatsirgan. ¹¹Pero fariseocunanam piñacurnin, quiquincuna pura ninacuyargan: “Jesúspa contran imatatan ruraycuntsic.”

**Señor Jesucristo chunca ishca
runacunata apostolnin
cayānanpag acran**

(Mateo 10.1-4; Marcos 3.13-19)

¹²Tsaypitanam Señor Jesucristo juc jircaman aywasquir, Dios Yayaman warat mañacurgan. ¹³Patsa waräsquiptinnam, discipuluncunata gayasquir chunca ishca gta acrarin churargan apostolnin cayānanpag. Paycunam cayargan:

¹⁴ Simón (paytam shutitsirgan “Pedro” nir)

y waugen Andrés,
Santiago,
Juan,
Felipe,
Bartolome,

¹⁵ Mateo,
Tomas,
Alfeopa tsurin Santiago,
Zelote grüpupita Simón,

¹⁶ Santiagopa tsurin Judás
y Judás Iscariote.

Judás Iscariotem Señor Jesucristota traicionarnin ranticurgan.

**Señor Jesucristo atscag
runacunata yachatsin**

(Mateo 4.23-25)

¹⁷Discipuluncunawan Señor Jesucristo jircapita urāmurmí, pampachö atscag gatiragnincuna caycagta tariyāmurgan.

Tsaymanmi maytsay Judea marcacunapitawan Jerusalénpita, lamar cuchunchö Tiro y Sidon marcacunapitapis, maytsicag runacuna shayämushga cayargan. ¹⁸Tsaymi maytsaypita Señor Jesucristo yachatsicunganta wiyayta munarnin y geshyagyashacunata cuticätsinanta unar shayämurgan. Supaycunawan sufricunatapis Señor Jesucristo cuticätsirgan. ¹⁹Llapan runacunam Señor Jesucristota yatayta munayargan, poderöso cayninwan llapan geshyagyashacunata cuticätsiptin.

**Señor Jesucristo
cushicuycunapagwan
llaquicuycunapag willacun**

(Mateo 5.1-12)

²⁰Tsaypitanam discipuluncunata Señor Jesucristo ricaycur, yarpachacuyānanpag nirgan:

“Cushicuyay, nogaman criyicug wactsacuna.

Gamcunapagmi Dios Yayapa Mandacuy Reynonga.

²¹ “Cushicuyay, imayca mallagagnö Diosta ashigcuna.

Gamcunatam Dios Yayaga pacha juntata wätayāshunqui.

Cushicuyay, canan llaquicur wagacugcuna.

Cananpitaga cushishga asicurnam cayanqui.

²² “Cushicuyay, chiquirnin gargar allgotsacuyāshuptiqui, mana alli ruragtanö insultar calumniarnin levantayāshuptiqui.

Tsaynö rechazarga rurayāshunqui Diospita Shamushga Runaman rasumpa criyicuayangayquiraycum.

²³“Tsaynö rurayāshuptiquiga cushicuyanqui. Wac vidachömi Dios Yaya imayca juc premiutanö llapan

bendiciunninta garayashunqui.
Tsaynöllam paycunapa unay
awiluncunapis Dios Yayapag
willacugcunata maltratayargan.

²⁴ “Pero, ¡Allau rícu runacuna!

Cay vídallachömi gamcunaga
shogashga cushicuychö cayanqui.

²⁵ “¡Allau, cay patsachö

imaycayquicuna
cayäpushungayquicunallaman
criyicugcuna,

gamicuna imaycarpis mallagarmi
llaquishga cayanqui!

“¡Allau, mana allicunata ruraycar,
cushicur asicachagcuna,

tsaynö rurayangancunapitam
llaquicur wagacuychö cayanqui!

²⁶ “¡Allau, gamcunata runacunalla

aläbayashuptiqui,

tsaynöllam paycunapa
awiluncunapis unay tiempuchö,
Dios Yayapa profétantucugcunata
aläbayargan!

Chiquiyashugniquicunata cuyayay

(Mateo 5.38-48; 7.12)

²⁷ “Pero cananmi llapayqui

wiyayämänayquipag niyag:
Chiquiyashugniquicunata cuyar,
despreciayashugniquicunata
llaquiparmin yanapayanqui.

²⁸ Contrayqui imatapis rurar mana
allicunata mañacuyaptinpis, gamcunaga
paycunaman Dios Yaya bendiciunninta
churaycunanpag mañacuyanqui.

Tsaynölla ashar allgotsacuyashugniqui
runacunapagpis Dios Yayaman
mañacuyanqui. ²⁹Si pipis juccaglä
gagllayquicunachö

lagyaycuyashuptiquiga, juccaglätapis
camapucuyanqui. Mas bien
umillacuycurnin ama imanayanquitsu.
Punchuyquicunata gechuyashuptiquiga,
camisayquicunatawan
llushtipucuyanqui. ³⁰Imatapis

mañayashungayquita garaycuyanqui. Si
imayquita gechuyashuptiquipis ama
‘Cutitsimay’ nir, gechuyanquitsu.

³¹Imanömi runamajiquicuna
gamicunapag allita rurayänanta
munayanqui, tsaynölla gamcunapis
paycunapag allicunallata rurayanqui.

³²“Cuyayashugniquicunallata cuyarga,
manam ni ima allitatsu ruraycäyanqui.
Jutsasapacunapis cuyagnincunallataga
cuyanami. ³³Llaquira

yanapayashugniquicunallata yanaparga,
manam ni ima allitatsu ruraycäyanqui.

Jutsasapacunapis llaquignincunallataga
yanapayanmi. ³⁴Si gamcuna següru
cutitsiyashunayquipag runacunallata
prestarga, ¿ima allitatan ruraycäyanqui?

Tsaynö llapanta cutitsiyänanllapagga
jutsasapacunapis prestacuyanmi.

³⁵Tsaypa rantinga

chiquiyashugniquicunapag allicunallata
rurarnin cuyayanqui. Mana

cutitsiyashunayquita shuyararlla,
imatapis prestaycuyanqui. Tsaynö

rurayaptiquiga, quiquin Dios Yayam
prestayangayquipitapis masta

cutitsiyashunqui. Dios Yayaga mana
agradëcicugcunatawan

jutsasapacunatapis llaquiparmin
yanapan. Gamicunapis paynölla rurarga,
cieluchö poderöso Dios Yayapa rasumpa

wamranmi cayanqui. ³⁶Tsaymi alläpa
cuyacur llaquipäcug cieluchö

Taytaquicunanölla, gamcunapis
llaquipäcug cayay.

Runamajiquicunata ama

juzgayaytsu.

(Mateo 7.1-5)

³⁷“Runamajicunata ama juzgayaytsu,
gamicunatapis Dios Yaya mana

juzgayashunayquipag. Calumniarnin
ama ni pitapis levantayaytsu, tsaynölla

gamicunatapis Dios Yaya mana
condenayashunayquipag. Mas bien

perdonanacuyay, gamcunatapis Dios Yaya perdonayashunayquipag.

³⁸Runamajiquita garaycuptiquiga, Dios Yayam gamcunatapis mas atscata garaycushunqui, tupuman juntat tupurcur jichatrag garacugnö. Atscata o ichicllata garacuyangayquinöllum, gamcunapis chasquiyanqui.”

³⁹Tsaynö nisquirnam, Señor Jesucristo iwalatsicuyapa yachatsicurnin nirgan: “¿Acäsu juc gaprataga gapramajincu pushan? Gapramajin pusharga, iishcanmi sanjaman jegarpuyanman!
⁴⁰Manam ni maygan yachacugpis maestrupita mas yachagga cantsu. Pero tsay yachacug shumag alli yachacur ushasquirga, maestrunnöllum canga.

⁴¹“¿Imanirtan runamajiquipa ñawinchö ichic shumpatagnö mana alli rurayninta musyapanqui? ¿Pero quiquiquicunapa jutsayquicunaga imayca ñawiquicunachö jatun gerunö caycagta, manacu tantiyanqui?
⁴²Jutsayquita imayca ñawiquichö jatun gerutanö mana ricaycarga, ¿imanörag ‘Wauge, ñawiquipita shumpata jipiscamushag’ ninquiman? iÄ, allitucug janan shongo! Quiquiquirag puntata ñawiquichö caycag geruta jorgonquiman. Tsaymi síga mas shumag ricanquiman jucpa ñawinpita shumpata jipinayquipagpis.

Wayuyninpitam jachataga regentsic

(Mateo 7.17-20; 12.34-35)

⁴³“Allicag früta allitam wayun. Pero mana allicag frütaga mana allitam wayunpis. ⁴⁴Wayuyninpitam imanö früta canganta regentsic. Manam casha montipitatsu igostawan üvata pallantsic. ⁴⁵Tsaynöllum allicag runaga shongon allicaptin, imaycatapis allicunallata ruran. Pero mana allicag runanam síga shongon mana allicaptin, mana

allicunallata imaypis ruraycan. Shongonchö mana allicunata yarparmi, tsaynö mana allicunallata parlanpis. Tsaymi runaga shongontsicchö allita o mana allitapis yarpangantsicta parlantsic.

Ishcayläya cimientu

(Mateo 7.24-27)

⁴⁶“¿Imanirtan gamcunaga Señor, Señor niyämänqui, mandamientücunatapis mana cäsucuyar? ⁴⁷Cananmi iwalatsicuywan entenditsiyashayqui: Nogaman shamur yachatsicungäta wiyarnin cäsucugcunaga, ⁴⁸imayca alli junduyag ogtiycurnin, gaga jananchö cimientuta patsätsir wajita shäratsignömi cayan. Tsaynö rurasquiptinmi mangädawan atsca lloglla yacu tsay wajiman charpis cuyutsintu, gaga jananchö allich rurashga captin. ⁴⁹Pero yachatsicungäcunata wiyaycar, mana cäsucug runaga allpa janallanchö cimientunnag wajita shäratsignömi cayan. Tsaymi mangädawan atsca lloglla yacu tsay wajiman char, pasaypa jancat juchuscatsin.”

Roma capitanpa wätayninta Señor Jesucristo cuticätsin

(Mateo 8.5-13; Juan 4.43-54)

7 ¹Tsaychö wiyagnin runacunata yachatsir ushasquirnam, Capernaüm marcaman aywacurgan. ²Tsaychömi Roma capitanpa cuyay wätaynin runa antsa geshyaycargan. ³Tsay capitanam Señor Jesucristo rurangacunata musyarnin, judiucunapa mandacugnincunata cachargan: “Señor Jesucristoman canan aywaycuyälay. Shamuyüllätsun wätaynita cuticaycatsillämunanpag” nir. ⁴Paycuna aywarnam Señor Jesucristota niyargan: “Tsay capitan

alläpa alli canganraycu, geshyaycag wätayninta cuticaycatsillay. ⁵Payga alläpa marcantsicta cuyarmi, Dios Yayaman mañacunapag goricänantsic wajitapis ruratsishga.”

⁶Tsaynö rugayaptinnam, Señor Jesucristo paycunawan aywargan. Pero wajiman chaycäyaptinnam, capitán amigoncunata cachargan Señor Jesucristota niyänanpag: “Señor, amana afanacallämuytsu, mana Israel runa carmi, wajiman yaycunayquita pengacullä. ⁷Tsaynö pengacurmi quiquiğa shallämürgötsu. Tsaymi cayllapita niycullay wätayni cuticasquinanpag. ⁸Nogapis mandagnipa mandädunchömi cä. Tsaynöllam soldädücunapis mandädüchö cayan. Soldädüta ‘Ayway’ niptiğa aywanmi. Jucninta ‘Shamuy’ niptipis shamunmi. Wätayniita ‘Cayta ruray’ niptipis ruranmi.”

⁹Tsayta wiyaycurnam Señor Jesucristo mantsacagnörag alläpa cushicur discipuluncunaman tumaycur nirgan: “Niyagmi, cay runa criyicungantanöga, manam ni imaypis Israel naciunchö tarishgatsu cä.” ¹⁰Capitanpa wajinman tsay cachacungan amigoncuna cutirmi, wätaynin jancat cuticashgatana tariyargan.

Señor Jesucristo juc viudapa ollgo wawanta cawatsin

¹¹Tsaypitanam Señor Jesucristo Nain niyangan marcaman aywacuptin, discipuluncuna maytsicag runacunawan gatirnin aywayargan. ¹²Tsay marcaman yaycuyarnam, Señor Jesucristo tincurgan wañushgata pampag apaycäyagwan. Tsay wañushga runata atscag pampagnin apaycäyanganga, juc viudapa japallallan ollgo wawanmi canag. ¹³Tsaypitanam Señor Jesucristo

warmita ricaycurnin, alläpa llaquiparnin nirgan: “Ama wagaytsu.”

¹⁴Tsaynö nirmi, aywarnin cäjata yataycuptin wintuycagcuna ichisquiyargan. Tsay wañushgatanam Señor Jesucristo nirgan: “Jöven, gamtam nig: ¡Sharcuy!”

¹⁵Señor Jesucristo tsaynö niycuptinmi, cawascamur jamaycurnin runacunawan parlargan. Tsay viudatanam Señor Jesucristo ollgo wawan cawashgata entregaycurgan. ¹⁶Tsayta ricaycurmi llapan runacuna cushicuynintinwan mantsacar Dios Yayata alabarnin niyargan: “Dios Yayapa juc poderöso profetanmi nogantsicman yurimushga. Alläpa llaquiparmi quiquin Dios Yaya cananga yanapamäshun” nir. ¹⁷Runacunanam entëru Judea provinciawan maytsay marcacunapa aywarnin, Señor Jesucristo rurangancunata willacuyargan.

**Juan Bautistapa discipuluncuna
Señor Jesucristoman aywayan
(Mateo 11.2-19)**

¹⁸Juan Bautistapa discipuluncunam Señor Jesucristo rurangancunata musyasquir Juanta willayargan. Tsaynam ishcag discipuluncunata gayasquir, ¹⁹tapucug cachar nirgan: “Diospa Tsurin Cristom jutsantsicipita salvamänapag shamunan cargan. ¿Gamcush canqui o juctaragcush shuyäyëshag?” nir.

²⁰Señor Jesucristoman chaycurnam niyargan: “Juan Bautistam mandayämargon. ¿Gamcush Diospita Shamushga Runa canqui o juctaragcush shuyäyällëshag?”

²¹Tsay öram Juan Bautistapa discipuluncunapa puntancunachö Señor Jesucristo tucuyläyawan geshyaycagcunata y supayyog runacunapita supaycunata gargornin

atscag gapracunatapis cuticätsirgan.

²²Tsaymi Juan cachamungancunata Señor Jesucristo nirgan: “Canan cutirnin, Juan Bautistata willayanqui, caychö wiyayangayquitawan llapan ricäyangayquita: ‘Gapracunam ricäyan; ratacunam puriyan; melanaypag wicuwän geshyagyashacunapis limpiu cuticäyan; mana wiyagcunam wiyayan; wañushgacunam cawayämün; y wactyacunatam mushog Alli Willacuyñinta willan’ nir. ²³Pipis nogapita mana raquicarnin confiamur firmi criyicurga, alläpa cushishgam cayanga.”

²⁴Juan Bautistapa discipuluncuna cuticusquiyaptinmi, tsaychö goricashga runacunata Señor Jesucristo Juanpag willargan: “Tsunyachö caycaptin, ¿imagtan Juanman caruta aywayargayqui? ¿Juc runa mantsacurnin juclä jucläpa imayca shogoshnö wayrawan cuyugta ricagcu? ²⁵Sinöga, ¿imagtan aywayargayqui? ¿Alli shumag llatapan shucushga runata ricagcu? Alli shumag llatapashga runacunaga micur, upyar, tushur ricucunapa palacioncunachömi cayan. ²⁶Tsaypunga, ¿imagtan aywayargayqui, Diospa willacug profëtanmi nircu? ¡Aumi! Payga, tsay willacug profëtanapitapis mas willacug profëtam. ²⁷Juanpagmi Diospa Palabran gellgashgachö nirgan:

‘Willacugñitam gampa puntayquita cachashag, runacunata willacuptin jutsancunapita arepenticurnin, alistacushgana shumag chasquiyäshunayquipag.’

²⁸Rasuncagtam niyag: Juannö poderyog alli runaga manam ni imaypis cashgaragtsu. Tsaynö captinpis, Dios

Yayapa Mandacuy Reynonchö caycag gollmi shongo runacunam Juanpita mas poderyogga cayan.”

²⁹Juan yachatsicunganta wiyarmi, llapan runacunawan contribucion cobracugcunapis “¡Dios Yayaga alläpa allim!” nir, tsay öra bautizacuyargan. ³⁰Pero fariseocunawan ley yachatsicugcunaga, paycunapag Dios Yaya munanganta mana cäsürmi bautizacuyargantsu.

³¹Tsaypitanam Señor Jesucristo nirgan: “¿Canan tiempu runacunataga imawanrag iwalatsishag? ¿Imanötan cayan? ³²Paycunaga imayca pläzacunachö pucllar, wamracuna gayaycachagnöllum yanagencunata niyan:

‘Lautata shumag tocyaptipis manam tushuyanquitsu ni llaquinaypagta cantayaptipis manam waganayquitsu.’

³³Tsaynömi Juan Bautista shamurnin, winota mana upyaptin y tantata mana micuptin gamcuna niyanqui: ‘Payga supayyogmi.’ ³⁴Diospita Shamushga Runa micug upyag captimi, gamcunaga niyämänqui: ‘Cayga alläpa micugmi y upyagmi. Contribucion cobragcunapawan jutsasapacunapa amigonmi.’ ³⁵Pero Dios Yayapa acrashgancag runacunaga, alli rurag caynincunawan Dios Yayapa alläpa alli yachayninta ricätsicuyan.”

Señor Jesucristo fariseo Simónpa wajinchö micun

³⁶Tsaypitanam juc fariseo wajinchö micuyänanpag Señor Jesucristota convidargan. Señor Jesucristonam wajiman yaycusquir, mësaman jamargan. ³⁷Tsay marcachönam juc lluta puricug warmi pärargan. Tsay

warminam fariseopa wajinchö Señor Jesucristo micuycanganta musyasquir, aywarnin yaycusquirgan alabastro niyangan pömuchö mushcug perfümin aptashga. ³⁸Chärirnam Señor Jesucristopa gepallanpa chaquinyag witiyurnin wagargan. Wegenwan chaquincunata mayllarnin agtsanwan tsaquiscatsirmi, chaquinta mutsaycur juc mushcug perfümita wiñargan. ³⁹Tsayta ricaycurnam, Señor Jesucristota convidag fariseo shongollanchö nirgan: “Cay runa Dios Yayapa rasumpa profëtan carga, musyanmanmi cay yatagnin warmi imanö mana alli rurag canganta.”

⁴⁰Tsaypitanam Señor Jesucristo nirgan: “Simón, jucta nishayqui.”

Paynam nirgan: “Maestru, niycallämay.”

⁴¹Señor Jesucristonam nirgan: “Ishcag runacunam juc prestacug runata gellaynin debeyargan. Juccagmi pitsga pachac junag arunapag debecurgan y juccagnam pitsga chunca junagllapag.

⁴²Tsaynö ishcanpis debecuyanganta mana pägayta puediyaptinmi, tsay gellayninta prestagnincuna runa ishanta perdonargan. Mä, canan nimay, Simón, ¿maygancag debecugtan tsay runata mas cuyanga?”

⁴³Simónnam nirgan: “Tsay pitsga pachac junag arunapag mas debecgag perdonanganchi.”

Tsaynam Señor Jesucristo nirgan: “Rasantam ninqui.”

⁴⁴Tsaynö nisquirnam, Señor Jesucristo warmita ricaycurnin Simóna nirgan: “¿Cay warmi ruranganta ricargoyquicu? Wajiquiman chäramupti, gamga manam yacuta garamargoyquitsu chaquita mayllanäpag. Pero cay warmiga quiquinpa wegenwan chaquicunata mayllasquirmi, agtsanwan tsaquitsimurgon. ⁴⁵Gamga

costumbrintsicnö manam mutsamargoyquitsu, pero cay warmim siga wajiquiman yaycamunganpita chaquita mutsamurnin dejargontsu.

⁴⁶Gamga manam costumbrintsicmannö umäman aceitita wiñämurgoyquitsu. Pero cay warmin siga, alläpa chaniyog mushcug perfümita chaquiman wiñämurgon. ⁴⁷Tsaymi gamta nig: Cay warmita tsaysicag jutsanpita perdonaptimi, alläpa cuyamarni tsaynö ruramargon. Pero waquinga ‘Ichiclla jutsätam perdonamashga alli rurag capti’ nirmi, ichicllata cuyayämanpis.”

⁴⁸Warmitanam Señor Jesucristo nirgan: “Llapan jutsayquim perdonashgana.”

⁴⁹Tsaychö caycag convidashgacunanam, quiquincuna pura ninacuyargan: “¿Pitan cay runaga, jutsacunapitapis perdonacunapag?”

⁵⁰Pero Señor Jesucristonam warmita nirgan: “Nogaman rasumpa firmi criyicurmi, condenacionpita salvacargoyqui. Cananga aywacuy shumag alli pásacuychö cawacunayquipag.”

Señor Jesucristota warmicuna yanapayangan

8 ¹Tsaypitanam Señor Jesucristo maytsay marcacunapawan estanciacunapapis aywar, Dios Yayapa Mandacuy Reynonpa Alli Willacuyñinta willacurnin yachatsurgan. Chunca ishca discipuluncunam gatiyargan. ²Geshyayanganpitawan supayyog cayanganpita cuticätsingan warmicunapis gatiyarganmi. Jucninmi María Magdalena cargan. Paypitam ganchis supaycunata Señor Jesucristo gargoshga cargan. ³Waquincagnam cayargan: Herodespa mayoralnin Cuza shutiyog runapa warmin Juanawan

Susana y mas warmicunawan.
 Paycunam imancunapis
 cayäpungancunawan, Señor
 Jesucristotawan discipuluncunata
 yanapayargan.

**Señor Jesucristo yachatsicun
 murucug runatawan iwalatsicur**
(Mateo 13.1-9; Marcos 4.1-9)

⁴Tsaynö maytsay marcacunapita
 atscag runacuna payman
 goricäyaptinmi, murucug runaman
 iwalatsicuyta yachatsicur nirgan: ⁵“Juc
 runam chacranman murucug aywargan.
 Muruta magtsiptinnam, waquincag
 murucuna näniman shicwayargan.
 Tsaytanam runacuna jaruyaptin
 pishgocuna upshasquiyargan.
⁶Waquincagnam ranracuna jananman
 shicwayargan. Tsaychö allpa mana
 captinmi, saslla jegascamur
 tsaquisquiyargan. ⁷Waquincagnam
 cashacuna rurinman shicwayargan.
 Cashacuna wiñarnam, pasaypa jancat
 tsapar ushasquiyargan. ⁸Waquincag
 murucuna alli allpaman
 shicwagcagnam, jegarcamur wiñarnin
 cada espigachö pachac gränuayag
 wayuyargan.”

Señor Jesucristo tsaynö yachatsicur
 ushasquirnam, jinchi nirgan: “iCanan
 willayangagta wiyarnin shumag
 entendicuyay!”

**Imanir iwalatsicuycunawan Señor
 Jesucristo yachatsicungan**
(Mateo 13.10-17; Marcos 4.10-12)

⁹Discipuluncunanam tapuyargan:
 “¿Ima ninantan tsay iwalatsicuyta
 yachatsicungayqui?” nir. ¹⁰Señor
 Jesucristonam nirgan: “Quiquin Dios
 Yayam Mandacuy Reynon imanö
 canganta nogawan musyatsiyäshunqui.

Pero waquincag runacunaga manam
 musyayantsu. Tsaymi paycunata llapan
 iwalatsicuyta yachatsicugta
 ‘ricaycar wiyaycäyämarpis
 entendiayantsu’” nir.

**Señor Jesucristo esplicarnincuna
 yachatsicun, murucug
 runawan iwalatsicur**
(Mateo 13.18-23; Marcos 4.13-20)

¹¹“Tsayga iwalatsicuywan yachatsicuyta
 caynö ninanmi: Muruga Diospa Palabran Alli
 Willacuymi. ¹²Näniman muru
 shicwashganömi waquincag wiyacugcunaga
 cayan. Dios Yayapa Palabrantam cushishga
 wiyayan, pero Supaynam shongonpita jancat
 gongascatsin. Supayga manam munantsu
 criyicurnin salvacäyänanta. ¹³Waquincag
 runacunanam imayca ranra chacranö cayan.
 Diospa Palabranta wiyar alläpa cushishga
 criyicuyan. Pero mana alli jawayog plantanö
 carmi, desgraciacuna päsaptinga dejasquir
 manana criyicuyannatsu. ¹⁴Waquinnam
 imayca casha chacranö cayan. Diospa
 Palabranta wiyarmi allish criyicuyan. Pero
 tsaypita capugyog caypag yapachacuywan
 cushicuyllachö cawayta munarmi, Dios
 Yayamanga manana firmi criyir ni imatapis
 rurayannatsu. ¹⁵Pero waquinmi siga imayca
 alli allpanö cayan. Paycunaga alläpa alli
 shongoncunawan Diospa Palabranta
 chasquirmin criyicuyan. Tsaynö rasumpa
 firmi criyicurni, imayca sufrimientuta
 päsarpi awantarnin Dios Yayapag
 imaycatapis allicunallata rurayan, imayca juc
 alli cosëchanö.

**Señor Jesucristo yachatsicun
 actsiwan iwalatsicur**
(Marcos 4.21-25)

¹⁶“Actsita sendircurga manam manca
 rurinmantsu ni catripa gopinmantsu
 churantsic. Sinöga altumanmi

churantsic yaucugcuna llapanta ricäyänanpag. ¹⁷Diospa Palabrana pacaragnö mana musyacycaptinpi, imaypi musyayangam. Tsaynöllam pacayllapa canan imata rurayangantapis, Dios Yaya llapan runacunapa puntanchö llapanta musyatsicunga.

¹⁸“Tsaymi canan shumag allipa wiyayämay: Diospa Palabranta wiyagcag runacunaga mas allim entendianga. Pero yachagtucug runacunaga, ichiclla yachayangantapis jancatmi gongasquianga.”

Señor Jesucristota mamanwan waugencuna ashian

(Mateo 12.46-50; Marcos 3.31-35)

¹⁹Tsaymannam Señor Jesucristopa mamanwan waugencuna ashirin chäyangan. Pero atscag runacuna goricashga cayaptinmi, Señor Jesucristo caycanganman yaucuyta puediyargantsu. ²⁰Tsaynam Señor Jesucristota juc runa willangan: “Wagtachömi mamayquiwan waueyquicuna ichiraycayan. Wanayashunquish.”

²¹Señor Jesucristonam nirgan: “Diospa Palabranta wiyarcu cäsucugcunam, mamawan waugëcunaga cayan.”

Señor Jesucristo wayrawan lamar mantsacaypag lagchicagta päratsin

(Mateo 8.23-27; Marcos 4.35-41)

²²Tsayman atscag runacuna juntapuyaptinmi, discipuluncunata Señor Jesucristo nirgan: “Gocha wac tsimpanman päsashun.”

Tsaynö niptinmi aywayangan.

²³Lamarpa aywaycayaptinmam Señor Jesucristo puñucasquirgan. Tsaynö puñucashga caycaptinmam, mantsacaypag llutaypa shucucuy wayra

yuringan yacutapis lagchicätsirrag. Büquincunaman yacu wiñacaptinmam, jundicayta gallaycuyangan.

²⁴Discipuluncunanam alläpa mantsacashga, ricchatsiyangan: “¡Maestru, Maestru ricchay! ¡Jundicaycantsicnam!” nir.

Tsaynam Señor Jesucristo sharcur nirgan: “Amana wayraynatsu ni yacupis lagchicaynatsu” nir. Tsaynö niptinmam, jina öra wayrawan yacu lagchicaypis patsallanchö pärasquiyan.

²⁵Discipuluncunatanam nirgan: “¿Imanirtan nogaman mana criyicuyanquitsu?”

Discipuluncunanam alläpa mantsacashga quiquincuna pura ninacuyangan: “¡Cayga imanö runatan, tsayläya wayrawan yacu lagchicagpis mandanganta cäsunanpag!”

Señor Jesucristo Gerasa marcachö runapita supayta gargon

(Mateo 8.28-34; Marcos 5.1-20)

²⁶Galileapita aywacurnam, lamarpa wac tsimpan Gerasa niyangan provinciaman chäyangan. ²⁷Büquipita yarpusquiayaptinmam, tsay marcapita juc supayyog runa yargosquir shamur tincupämurgan. Tsay runaga unaypitanam garapätulla purir, wajinchöpis manana täcur panteoncunallachöna päracurgan. ²⁸Señor Jesucristota ricaycurnam, cörrilla aywarnin puntanman gongorpacurgan. Tsaynam runapa shiminpa supay jinchi gayaraypa nirgan: “Dios Yayapa Tsurin Jesús, ñimatatan nogawan munanqui? ¡Gamtam rugag cay runapita gargomar mana sufritsimänayquipag!”

²⁹Tsaynöga nirgan, Señor Jesucristo supayta “¡Cay runapita yargoy!” nir, mandashgana captinmi. Tsay runapa shongonchö supay unaypitana carmi,

imayca achcuragnö catsirgan. Guardiacuna cuidarnin cadenacunawan tsarayta munanin chaquintawan maquina panquiyaptinpis, atasca cutim cadenata rachicachasquir supaypa munayninwan tsunyacunapa aywacur purirgan.

³⁰Supaytanam Señor Jesucristo tapurnin nirgan: “¿Imatan shutiqui?” Supaynam runapa shiminpa nirgan: “Nogapa shutiga ‘Sogta Warangam’ (6,000).” Tsaynöga nirgan, maytsicag supaycuna tsay runachö carmi. ³¹Señor Jesucristotanam supaycuna yapay yapay rugayargan: “Ama infernumanga garpuycayällamaytsu.” ³²Tsay jircachömi atasca cuchicunata mitsiyçayargan. Tsaynam supaycuna Señor Jesucristota rugarnin niyargan: “Cachaycayällamay tagay cuchicunallaman yaucucuyçayällänäpag.” Señor Jesucristo “Aywayay” niptinnam, ³³supaycuna runapita yargosquir, cuchicunaman yaucuyargan. Cuchicunaman yaucusquiyaptinnam löcuyar wacpa caypa acataycacharnin jircapita gochaman jegamur, cuchicuna shingarnin wañusquiyargan.

³⁴Mitsigcunanam tsaynö päsanganta ricaycur, marcacunapawan estanciancunapa cörrilla aywarnin llapanta willacuyargan. ³⁵Tsaynam runacuna ima päsanganta ricag shayämurgan: “¿Mä, imash päsashga?” Señor Jesucristo caycanganman çharinam, supayyog runa pasaypa jancat sänuna llatapashga juiciunchö Señor Jesucristopa lädunchö jamaycagta tariyargan. Tsayta ricaycurnam alläpa mantsacäyargan. ³⁶Tsayta ricashgacagcunam willacuyargan, tsay supayyog runata Señor Jesucristo imanö cuticätsinganta. ³⁷Tsaynam tsay Gerasa provinciachö llapan runacuna alläpa

mantsacurnin, Señor Jesucristota rugarnin niyargan: “Cay marcälläcunapita aywacullay.” Tsaypitanam Señor Jesucristo discipulucunawan büquiman lätarcur aywacurghan. ³⁸Supaycuna yargosquiyaptin cuticashga runanam Señor Jesucristota rugargan paywan pagta aywacunanpag. Pero Señor Jesucristoga runata despedirnin nirgan: ³⁹“Wajiquiman cuticuy. Tsaychö aylluyquicunata willanqui Dios Yaya gampag llapan ruranganta.” Tsaypita cuticurnam maytsaypa aywarnin willacurghan, Señor Jesucristo paypag llapan imayca rurangancunata.

**Jairopa warmi wamranwan Señor
Jesucristopa llatapanta yatag
warmi cuticangan**

(Mateo 9.18-26; Marcos 5.21-43)

⁴⁰Tsaypitanam Galileaman cutiyaptin, atscag runacuna shuyaraycayargan cushishga chasquiyänanpag. ⁴¹Tsaynam Dios Yayaman mañacuyänanpag goricäyänan wajichö mandacug Jairo shutiyog runapis chaycurnin, Señor Jesucristopa puntanman gongoricuycur wajinman aywananpag rugargan. ⁴²Tsay runapam chunca ishçay watayog japallan warmi wamran, pasaypa antsa geshyar wañuyçarganna.

Tsaypita Señor Jesucristo aywaptinnam, maytsicag runacuna gatirnin quichuinacurrug, çäsi llatiyarganpis. ⁴³Tsay runacunapa rurinchömi chunca ishçay watana yawar apaywan geshyagyasha warmipis aywargan. Jampitsicunanpagmi imaycantapis jancat ranticurnin ushashga cargan. Pero manam ni maygan jampicugpis cuticätsirgantusu. ⁴⁴Paymi Señor Jesucristopa gepanllapa aywar, llatapanpa cuchunta yataycurghan. Tsaynö llatapanpa

cuchunta yataycurllam, jina öra yawar apayninpita cuticasquirgan. ⁴⁵Señor Jesucristonam tapucurgan: “¿Pitan llatapäta yatamurun?” nir.

Runacunawan waquincag yanagencuna “Manam nogatsu” niyaptinnam, Pedro nirgan: “iMaestru, cayläya atscag runachöga jucnin jucninpis tangayäshunquim! Tsaycu gamga ‘¿Pitan llatapäta yatamurun?’ ninqui.”

⁴⁶Pero Señor Jesucristoga yapaymi nirgan: “iPiyacarpis yatamashgam! Poderni yargogtam sentirgö.”

⁴⁷Tsaynö yatanganta tantiyasquiptinnam, mana imanö pacayta puedirnin tsay warmi alläpa mantsacashga Señor Jesucristopa puntanman gongorpacuycur willargan, llapan runacuna wiyaycayaptin imanir yatangantawan cuticanganta. ⁴⁸Señor Jesucristonam warmita nirgan: “Ïja, nogaman rasumpa criyicurmi cuticargoyqui. Cananga alli päyacuychö tranquïlo cushishga aywacuy.”

⁴⁹Señor Jesucristo tsaynö parlaycaptinmi, Jairopa wajinpita juc runa shamur nirgan: “Tayta Jairo, wamrayquiga wañushganam. iAmana Maestrupa umantapis nanatsiynatsu!”

⁵⁰Tsayta wiyasquirmi Señor Jesucristo Jairota nirgan: “Ama mantsacaytsu, nogallaman firmi criyicamuyga, wamrayqui rasumpam cuticanga.”

⁵¹Jairopa wajiman chärirnam, discipulun Pedrota, Juanta, Santiagota y wamrapa taytantawan mamanta ruriman yaycatsirgan. Waquincag runacuna yaycuyänantaga manam munargantsu. ⁵²Wamra wañushgacaptinmi wagtachö runacuna gayaraycacher wagaycäyargan. Tsayta ricaycurmi Señor Jesucristo nirgan: “Ama wagayaytsu. Wamraga manam wañushgatsu puñucashgallam.”

⁵³Wamra wañushgana canganta musyarmi, Señor Jesucristota llapan runacuna asipäyargan. ⁵⁴Pero Señor Jesucristonam maquinpita achcurcur wamrata nirgan: “Wamra, sharcamuy” nir.

⁵⁵Wamranam jaynin cutiyauptin, jina öra cawasquir sharcamurgan. Señor Jesucristonam nirgan: “Wamrata micuynin garayay” nir. ⁵⁶Wamrapa taytanwan mamannam alläpa mantsacäcur cushishga cayargan. Señor Jesucristonam mandargan: “Ama cay ricäyangayquita ni pitapis willacuyanquitsu.”

Chunca ishca y discipuluncunata Señor Jesucristo mandan

(Mateo 10.5-15; Marcos 6.7-13)

9 ¹Tsaypitanam chunca ishca y discipuluncunata gayasquir, Señor Jesucristo podernintawan mandacuyñinta entregargan, supayyocunapita supaycunata gargornin geshyagyäshacunata cuticätsiyänanpag. ²Paycunatam mandargan Dios Yayapa Mandacuy Reynon imanö canganta willacurnin llapan geshyagyashacunatapis cuticätsiyänanpag. ³Tsaymi nirgan: “Aywarga ama tucruta, alporjata, millcapata, gellayta ni llatapayquicuna mödacuyänayquillapagpis apayanquitsu. ⁴May wajichö patsacurpis, tsayllachö cacuyanqui tsay marcapita aywacuyangayquiyag. ⁵Si juc marcaman chäyaptiqui runacuna mana chasquiyäshuptiquiga tsay marcapita aywacuyanqui. Tsaypita yargosquir aywacurga chaquiquicunachö polvutapis tapsicusquiyanki. Tsaynö rurayangayquim, tsay runacunapag juc señalnö canga Dios Yaya castigananpag.”

⁶Tsaypitanam discipuluncuna marcan marcan maytsay estanciacunapa aywar, Dios Yayapa mushog Alli Willacuyñinta

maytsaychö willacur
geshyagyashacunatapis cuticätsiyargan.

Rey Herodes
Señor Jesucristopag musyangan
(Mateo 14.1-12; Marcos 6.14-29)

⁷Tsay lllapan rurayangancunata rey Herodes musyasquirmi ni imanö cayta puedirgantsu. Tsaymi waquincag runacuna Señor Jesucristopag niyargan: “Juan Bautistam cawamushga.” ⁸Pero waquincagcunanam niyargan: “Dios Yayapa unay willacug profëtan Elíasmi yuricämushga puriycan.” Mas waquinnam niyargan: “Dios Yayapa unay tiempu profëtanchi maygancarpis wañunganpita cawamushga.” ⁹Pero Herodesnam nirgan: “Juan Bautistataga quiquimi umanta rogotsirnin wañutsitsirgä. ¿Pipagtan cayläya imaycacunata ruranganta wiyä?” nirmi, Señor Jesucristota alläpa regeyta munargan.

Pitsga waranga runacuna
micuyänanpag Señor Jesucristo
tantata miratsin
(Mateo 14.13-21; Marcos 6.30-44;
Juan 6.1-14)

¹⁰Tsaypitanam discipuluncuna puriycanganpita cutisquir, lllapan rurayangancunata willayargan. Tsaynam Señor Jesucristoga paycunallata pusharcur, Betsaida marcapa tsunyanchö quiquillancuna jamayänanpag aywargan. ¹¹Pero tsay maytsicag runacuna musyasquirmi, gatirnin aywayargan. Runacuna chäriyaptinnam Señor Jesucristo cushishga chasquirnincuna, Dios Yayapa Mandacuy Reynonpag yachatsicurnin geshyagyashacunatapis cuticätsirgan.

¹²Tardiycaptinnam, chunca ishca discipuluncuna Señor Jesucristoman witiycur niyargan: “Caychöga tsunya

mana ni imacagchömi caycantsic. Runacunata ‘Cuticuyay’ niyna, tsay uray marcacunapawan estanciacunapa aywar, micuynincunawan posädancuna ashicuyänanpag.”

¹³Señor Jesucristonam nirgan: “¡Gamcuna micuynincuna garayay!”
Discipuluncunam niyargan: “¡Pitsga tantawan ishca pescädollam capamantsic! Caytsicag runacunapagga rantimurpis, ¿imanörag pagtatsishwan?”
¹⁴Tsaychömi pitsga waranganö runacuna cayargan. Tsaynam Señor Jesucristo discipuluncunata nirgan: “Runacunata pitsga chuncapa patsaman jamacuyänanpag niyay.” ¹⁵Señor Jesucristo ningannöllum discipuluncuna lllapan runacunata patsaman jamatsiyargan. ¹⁶Tsaypitam pitsga tantatawan ishca pescädota aptarcur bendisarnin, Señor Jesucristo cieluman ricarcur Dios Yayata agradëciscuir, tantata paquin paquin discipuluncunata entregargan lllapan runacunata aypuyänanpag. ¹⁷Lllapan runacuna pacha junta teglla micusquiyaptinnam, sobrag tantacunata discipuluncuna goriyargan chunca ishca canastacuna juntatarag.

Pedro parlan Señor Jesucristota
Diospa Tsurin canganta
(Mateo 16.13-19; Marcos 8.27-29)

¹⁸Juc cutinam Señor Jesucristo discipuluncunawan caycar, Dios Yayaman japallan mañacuscuir discipuluncunata tapurnin nirgan: “¿Lllapan runacuna nogapag imaniyantän?” nir.

¹⁹Discipuluncunam niyargan: “Waquinmi niyan Juan Bautista cangayquita. Waquinnam Dios Yayapa unay profëtan Elías cangayquita yarpäyan. Waquincagcunanam Dios Yayapa unay tiempu profëtan cawamushga cangayquita niyan.”

²⁰Tsaynö niyaptinnam, Señor Jesucristo nirgan: “Gamcunaga, ¿Pi cangätan yarpäyanqui? ¿Pitan cä?” Pedronam nirgan: “Ganga Diospa Tsurin Cristom canqui” nir.

Señor Jesucristo wañutsiyánapag canganta willacun

(Mateo 16.20-28; Marcos 8.30-9.1)

²¹Pero Señor Jesucristoga alli yätsirmi alvertirgan, pitapis tsayta mana willacuyánapag. ²²Tsaypitanam nirgan: “Diospita Shamushga Runa captimi, tucuyläya imaycawan sufritsiyámar maltratayámanga. Autoridácunawan mayor sacerdotícuna y ley yachatsicugcunam chiquimarni wañutsiyámanga. Pero wañungäpita quimsa junagllatam cawamushag.”

²³Tsaynö nirmi runacunata yachatsirgan: “Pipis yachacugni cayta munarga, quiquinpa munayninta déjasquir, imayca cruzta wañunganyag apagnó cada junag nogaraycu sufrirpis gatimätsun” nir. ²⁴Pipis quiquinpa cawayllanpag yarpachacugga, cawaynintam ogranga. Pero pipis nogaraycu wañurga, wac vidachömi wiñaypa imayyagpis cawanga. ²⁵Dios Yaya pitapis infiernuman condenaptinga, cay patsachö lllapan goringancunapis, ¿imapagrag tsay runata servinga? ²⁶Sicush pipis nogapitawan yachatsicungäpita pengacunga, tsaynöllam nogapis Dios Yayapita Shamushga Runa cayniwan paypita pengacushag, Dios Yayapa y santo angelnincunapa chipacyag poderninwan cutimurnin. ²⁷Pero rasuncagtam niyag: Canan caychö caycagcunapitaga waquinllam manarag wañurnin, Dios Yayapa Mandacuy Reynonta ricáyanga.

Señor Jesucristo jircachö chipacyaycag ticran

(Mateo 17.1-8; Marcos 9.2-8)

²⁸Tsaynö willacusquirnam, pusag junagtana Pedrota, Juanta y Santiagota

pushacur, Dios Yayaman mañacug juc jircaman Señor Jesucristo aywayargan.

²⁹Dios Yayaman mañacuycaptinnam, Señor Jesucristopa gagllan jucläya shumag ticasquirgan. Tsaynöllam llatapanpis imayca illagonörag yurag chipacyagman ticasquirgan. ³⁰Tsay öram ishchag runacuna yurisquir, paywan parlayargan. Paycunam cayargan Moiséswan Elías. ³¹Tsayläya chipacyagchömi Señor Jesucristota parlaparnin niyargan: “Dios Yaya unay dispöningannömi, Jerusalénchö wañunqui” nir. ³²Pedronam ishcan yanagencunawan pasaypa puñunaywan caycar, puñuysä ricaycargan Señor Jesucristo Diospa poderninwan ishchag runacunawan chipacyarrag ichiraycäyagta. ³³Tsay ishchag runacuna aywacugnö cayaptinmi, Señor Jesucristota Pedro nirgan: “Maestru, alläpa allim caychö caycantsic. Quimsa tsucllata rurashun, junta gampag, junta Moiséspag y juccagtana Elíaspag.” Mana imanö cayta puedirmi, Pedro tsaynö nirgan.

³⁴Tsaynö nicaptinnam pucutay yurisquir, lllapanta tsapasquirgan. Pucutay rurinchö caycarmi discipuluncuna mantsacáyargan. ³⁵Pucutay rurinpitanam parlamugta wiyayargan: “Cayga nogapa acrashga cuyay Tsurimi. Payta wiyamin cäsuyay” nigta.

³⁶Tsaynö parlar ushasquiyaptinnam, discipuluncuna Señor Jesucristollatana ricaycuyargan. Pero tsay jircachö ricáyangantaga manam ni pitapis willacuyargantsu, Señor Jesucristo cay patsallachörög caycaptinga.

Señor Jesucristo supayyog ollgo wamrata cuticätsin

(Mateo 17.14-21; Marcos 9.14-29)

³⁷Tsaypitanam waränin jircapita cutiycäyämuptin, maytsicag runacuna

shuyaraycäyargan. ³⁸Tsay runacunapa rurinpitam juc runa gayaraypa nirgan: “Maestru, rugacullagmi, japallan tsurilläta ricaycullay. ³⁹Cay tsurillämi supay achcungan öra gayaraycachar ishquirnin ushacan. Tapsitsirnin garentätsirmi shiminchöpis pushugayta cachutsir, imaypis mana dējaypa alläpa maltratan. ⁴⁰Discipuluyquicunatapis rugacurgömi supayta gargoyänanpag. Pero paycunaga manam puediyantsu.”

⁴¹Señor Jesucristonam nirgan: “iAllau cay jutsasapacuna, manaran nogaman firmi criyicuyanragtsu! IImayyagrag gamcunawan pagta awantayarniqui caycäshag!” Tsaynö nisquirnam, runata nirgan: “Wamrayquita cayman apamuy” nir.

⁴²Wamranta taytan chaycatsiptinam, supay atäquiwan tsariscatsir patsaman ishquistsirnin garentätsir tapsitsirgan. Pero Señor Jesucristonam tsay supayta nirgan: “Cay wamrapita yargoy” nir. Tsaynö nirmi wamrata cuticashgatana, taytanta entregaycurgan. ⁴³Tsayta ricaycurnam, runacuna mantsacashganö niyargan: “Dios Yayaga alläpa poderösom” nir.

Señor Jesucristo wañutsiyänanpag canganta yapay willacun

(Mateo 17.22-23; Marcos 9.30-32)

Señor Jesucristo rurangancunapita llapan runacuna mantsacashganö caycäyaptinmi, discipuluncunata nirgan: ⁴⁴“Canan willayangagta wiyarnin, yarparäyanqui. Diospita Shamushga Runa captümi, traicionayämar chiquimagnicunapa maquinman entreyämanga.” ⁴⁵Pero discipuluncunaga manam ni juc entendiargantsu Señor Jesucristo tsaynö ninganta. Tsaynö ninganta mana juc entendiyananpagmi quiquin Dios Yaya permitirgan. Tsaynöllam Señor

Jesucristo esplicarnin yachatsinanpag tapucuytapis mantsapäyargan.

¿Pitan mas mandacug?

(Mateo 18.1-5; Marcos 9.33-37)

⁴⁶Tsaypitanam discipuluncuna quiquincuna pura piñanacuyargan, llapan mandacugnin mas importanti cayta munarnin. ⁴⁷Tsaynö yarpäynganta Señor Jesucristo musyasquirnam, juc wamrata puntanman ichiycatsir, ⁴⁸nirgan: “Pipis cay wamranö umilde runacunata cuyarnin, nogapa shutichö chasquirga, nogatapis chasquiyämanmi. Nogata chasquimarga cachamagnö Dios Yayatapis chasquiyänmi. Tsaymi gamcunapita umilde gollmi shongocag, llapayquiptapis mas mandacugga canga.”

Pipis mana contrantsic carga, nogantsicwanmi caycan

(Marcos 9.38-40)

⁴⁹Juannam nirgan: “Maestru, nogacunam ricäyargö juc runata shutiquichö supayyog runacunapita supaycunata gargogta. Pero mana nogantsicwan puriptinmi micharnin amatsayargö.” ⁵⁰Pero Señor Jesucristonam nirgan: “Ama michäcuyanquitsu. Pipis mana contrantsic carga, nogantsicwanmi caycan.”

Samaria marca runacuna Señor Jesucristota chasquiyantsu

⁵¹Cieluman Señor Jesucristo cuticunapag ichicllana faltaycaptinmi, Jerusalén marcaman alli valoracuyeur aywargan. ⁵²Tsaynö aywananpagmi puntata willacugninta mandargan. Paycunanam Samaria marcaman chaycur Señor Jesucristopag posädata ashiyargan. ⁵³Pero Samaria marca

runacunaga manam chasquiyargantsu, Jerusalénman aywanganta musyaycur.

⁵⁴Tsayta ricarmi discipuluncuna Santiagowan Juan niyargan: “Señor Jesús, ¿munanquicu Dios Yayaman mañacuyänäta cielupita nina shamurnin cay runacunata jancat rupar ushacascatsinanpag?”

⁵⁵Pero Señor Jesucristonam, pacyunaman tumaycur piñapargan.

⁵⁶Tsaypitanam juc marcapa aywacuyargan.

**Señor Jesucristota gatirayta
munarga, imaycatapis
dējashwanmi
(Mateo 8.19-22)**

⁵⁷Nänipa aywaycäyaptinnam, Señor Jesucristota juc runa nirgan: “Maestru, maypa aywaptiquipis nogaga gatihayquillam.”

⁵⁸Señor Jesucristonam nirgan: “Atogcunapapis machaynincuna canmi; pishgocunapapis geshuncuna canmi. Pero Dios Yayapita Shamushga Runapaga, manam iman cantsu ni maychö jamaycur shütaycunällapagpis.”

⁵⁹Juc runatanam Señor Jesucristo nirgan: “Gatimay.” Pero tsay runanam nirgan: “Tayta Jesús, gamwan aywanäpagga, puntataga taytätarag pampascamushag” nir.

⁶⁰Tsaynam Señor Jesucristo nirgan: “Imayca wañushganö mana criyimagcuna wañushgacunataga pampacuyätsun. Pero gamga aywarnin Dios Yayapa Mandacuy Reynon imanö canganta willacunqui.”

⁶¹Juccag runanam nirgan: “Tayta Jesús, noga gatiränapag, aywä wajichö familiacunatarag despeticascamushag.”

⁶²Pero Señor Jesucristonam nirgan: “Pipis imayca gepaman ricaraycar yapyacugnö carga, manam servintsu Dios Yayapa Mandacuy Reynonpag,

llapan jutsa rurangacunapag yarpararga.”

**Ganchis chunca ishchay
willacugcunata Señor Jesucristo
mandangan**

10¹Tsaypitanam Señor Jesucristo ganchis chunca runacunata

acrasquir, ishchay ishchaylla mandargan, pay chänancag maytsay estanciacunapawan marcacunaman.

²Tsaynö punta aywayänanpagmi nirgan:

“Imayca chacrachö maytsica micuy pogoshganömi, Dios Yayapa Mandacuy Reynonman runacuna goriypag caycäyan. Pero gorigpag peoncunaga alläpa wallcagllam cayan. Tsaymi duënon Dios Yayata mañacuyay cosëchanman arugunata cachamunanpag.

³Aywayay! Cananmi cachayag, imayca juc ashcash atogcunapa rurinman aywagtanö.

⁴Aywar ama alporjataan millcapata, gellayta ni llangeyquita apayanquitsu. Nänipa aywarpis ama ni pitapis ichiycur parlapäyanquitsu.

⁵“May marcaman chäyaptiqui wajincunaman chasquiyäshuptiquiga, rimaycucurnin niyanqui: ‘Caychö täcugcuna shumag alli päsacuychö cawacuyay.’ ⁶Si tsay marcachö patsatsiyäshogniqui runa alli päsacug captinga, saludacuyangayqui alli päsacuyimi rasumpa cumplinga. Mana tsaynö shumag päsacuptinga, alli cawacuyinpis manam cumplingatsu. ⁷Posadacurpis tsay wajichö garayäshungayquillata micuyanqui y upyayanqui. Tsaymi yachtaticug runaga imayca alli arupucugnö mallagga canmantsu. Pero ama wajin wajinga puriyanquitsu.

⁸“May marcaman chäyaptiquipis, wajiyog runa cushishga chasquiyäshuptiqui

garayáshungayquillata micucuyanqui.
⁹Tsay marcachö geshyagyashacunata cuticätsirmin runacunata willacur niyanqui: ‘Dios Yayapa Mandacuy Reynonpa Alli Willacuyinin gamcunaman chaycämunnam’ nir. ¹⁰Si juc marcaman chäyaptiqui mana chasquiyáshuptiquiga, cällicunapa aywarnin niyanqui: ¹¹‘Quiquiquicuna culpayog cayangayquita musyayanayquipagmi, marcayquicunapa polvun llangëcunachö lashtacashgatapis tapsicusquiyä. Pero musyayay: Dios Yayapa Mandacuy Reynonpa Alli Willacuyininmi gamcunaman chämurgon.’
¹²Gamcunatam niyag: Cay mundu ushacangan junagmi unay tiempu Sodoma marca runacuna castigashga cayanganpitapis, mas peor mantsacaypag tsay marcachö mana chasquiyáshugniqui runacuna castigashga cayanga.

Mana cäsucug marcacuna

(Mateo 11.20-24)

¹³‘¡Allau, Corazinwan Betsaida marca runacuna! Sicush gamcunapa marcayquicunachönö Tirowan Sidon marcacunachö milagrucunata ruranman cargan, tsay marca runacuna unaynam llaquicurnin jutsancunata dëjasquir alli ruragna cayanman cargan. ¹⁴Tsaymi cay patsa ushacangan juiciu final junagchöpis Tirowan Sidon marca runacuna castigashga cayanganpitapis, mas peor mantsaypag castigashga cayanqui. ¹⁵Capernaum marcachö pärag runacuna, gamcunagach yarpäyanqui cieluman aywayänayquipag. Pero gamcunaga infiernumanmi aywayanqui.’

¹⁶Tsaypitanam Señor Jesucristo nirgan: “Pipis gamcunata wiyarnin cäsür chasquiyáshurniquiga, nogatapis

cäsür chasquiyämanmi. Gamcunata mana cäsür chasquiyáshurniquiga, nogatapis manam chasquiyämantsu. Nogata mana cäsumar mana chasquimagcunaga, cachamagni Dios Yayatapis manam chasquiyantsu.”

**Ganchis chunca ishca
mandangancuna Señor
Jesucristoman cutiyangan**

¹⁷Tsaypitanam ganchis chunca aywagcuna alläpa cushishga cutisquirnin, Señor Jesucristota niyangan: “Señor Jesús, asta supaycunapis cäsuyámashgam shutiquichö mandayapti.”

¹⁸Señor Jesucristonam nirgan: “Aumi, imayca illagonöragmi altu cielupita Satanas jegamugta ricargö. ¹⁹Nogam podernita entregayargog culebracunatawan atog curucunatapis jarucachayänayquipag. Tsaynöllam entregashcag chiquiyáshugniquicunatawan Supaypa podernitapis vencyänayquipag. Nogapa poderniwan cayaptiquiga manam ni imapis päsayáshunquitsu. ²⁰Pero tsaynö supaycuna cäsuyáshungayquitaga, ama cushicuyaytsu. Mas bien cieluchö shutiquicuna apuntashga canganta masga cushicuyay.”

**Tsurinllam regernin musyan pi
taytan canganta**

(Mateo 11.25-27; 13.16-17)

²¹Tsay öra Espiritu Santopa poderninwan shongon alläpa cushicuptinmi, Señor Jesucristo nirgan: “Cieluchöpis patsachöpis Mandacug Dios Yaya, gamtam alläpa alabaycug. Gam rurangayquicunatam mana musyag wamranöcagcunata entenditsinqui. Pero yachagtucugcunatawan musyagtucugcunataga manam ni ima

entenditsinquisu, imayca pacashgatanö catsirnin. Aumi, Taytallä, tsaynö canantam gamga munargoyqui.

²²“Taytämi llapan imaycata entregamashga. Quiquin Dios Yayallam noga Tsurinta regeman, waquinga manam regeyämantsu. Tsaynö Tsuru captinmi, nogalla Taytätapis regë. Tsaymi noga regetsiptilla waquincagcunapis regeyan.”

²³Tsaypitanam discipuluncunaman witiycur paycunallata nirgan: “Nogapa ruraynicunata ricarmi alläpa cushishga cayanqui. ²⁴Tsaymi niyag: Dios Yayapa unay profëtancunawan reycuna cay ricäyangayquicunata ricayta munaycarpis manam ricäyargantsu. Canan wiyayangayquicunata wiyayta munaycarpis manam wiyayargantsu.”

Llaquipäcug Samaria runa

²⁵Tsaypitanam juc ley yachatsicug doctor, yachaycarnin yapta upatucur tapurgan: “Maestru, ¿imatatan rurashag wac vidachö wiñaypa cawanäpag?”

²⁶Señor Jesucristonam nirgan: “¿Imanötan Moisés gellangan ley yachatsicun? ¿Imatatan tsaychö tantianqui?”

²⁷Ley yachatsicugnam nirgan: “Tsaychöga caynömi yachatsicun: ‘Señorniqui Dios Yayata alläpa cuyanqui llapan shongoyquiwan almayquiwan, callpayquiwan y yachayniquiwanpis. Quiquiquitanölla runamajiquicunatapis cuyanqui’ nir.”

²⁸Tsaynam Señor Jesucristo nirgan: “Ningayquiga alläpa allim. Tsaycunata rasumpa cumplirnin rurarga wac vidachömi wiñaypa cawanqui.”

²⁹Pero ley yachatsicug doctornam quiquinchö allitucur tapurgan: “¿Pitan tsay runamajiga?”

³⁰Tsaymi Señor Jesucristo nirgan: “Juc runam Jerusalénpita Jerico marcaman uraycaptin, tsunya nänichö suwacuna llapan apangancunatawan asta llatapanacunatapis jancat gechusquir, alli magacachasquir wañuycagtana dëjasquir aywasquiyargan. ³¹Tsay nänipanam juc sacerdoti päsarnin runa wañuycagtana ricaycarpis, mana ricagtucurlla carullapa päsacurgan. ³²Tsaynöllam sacerdotipa yanapagnin levita niyangan runapis runa jitaraycagta ricaycur, carullapa päsacurgan. ³³Pero Israel runacunapa chiquiyangan Samaria runa tsaypa aywaycarnam, runa jitaraycagta tarisquir alläpa llaquipargan.

³⁴Puntanman witiycurmi eridancunata aceitiwan y winowan jampisquir, shumag watarcapurgan. Tsaypitanam ashnunta montarcatsir juc posädaman apaycur, tsaychö cuidargan. ³⁵Waränin allegnam ishcaj junag arupucur, gänangan gellayta posadatsicug runata pägar nirgan: ‘Cay runata shumag jampiyucullanqui, masta gastaptiquipis cutimurmi, pägallashayqui.’ Tsaynö nisquirmi aywacurgan.

³⁶“Canan tapushayqui: ¿Cay quimsanpita maygancag runatan runamajinta llaquipargan?”

³⁷Ley yachatsicugnam nirgan: “Tsay cuyarnin llaquipagcagmi.”

Tsaynam Señor Jesucristo nirgan: “Cananga gampis aywarnin tsaynöllam llaquipäcug canqui.”

Señor Jesucristo Martapawan Mariapa wajinman aywan

³⁸Tsaypitanam Señor Jesucristo discipuluncunawan aywaycarnin, juc marcaman chäyargan. Tsaychönam Marta shutiyog warmi wajinman

convidargan. ³⁹Martapa ñañan Maríanam Señor Jesucristo yachatsicungancunata wiyarnin, chaquin puntanchö jamaycargan. ⁴⁰Pero Martanam imayca ruraycunawan afanädu car, Señor Jesucristoman witiycur nirgan: “Señor Jesús ¿manacu llaquipämanqui caychö ñañä jamacunganyag japallä llapan imaycata ruraycagta? ¡Niyucuy yanapamānanpag!”

⁴¹Señor Jesucristoman nirgan: “Ä Marta, Marta. Tucuyläya ruraycunapag yarpachacurmi, gam tranquiolsu canqui. ⁴²Pero jucllayllam wanacan ruranayquipag. Tsay allicagtam ñañayqui Maríaga acrashga y manam ni pipis tsayta gechungatsu.”

Señor Jesucristo yachatsicun imanö mañacunapag

(Mateo 6.9-15; 7.7-11)

11 ¹Juc cutinam Señor Jesucristo Dios Yayaman mañacurган. Mañacur ushasquiptinam, juccag discipulun nirgan: “Señor, nogacunatapis yachaycätsiyämay Juan Bautista discipuluncunata yachatsingannö Dios Yayaman mañacuyänäpag.”

² Tsaymi Señor Jesucristo nirgan: “Dios Yayaman mañacur niyanqui:

Cieluchö caycag, Dios Yayalläcuna, Respetashga shutiqui cuyay catsun. Mandacuy Reynoyqui nogacunanaman shamutsun.

Munangayqui ruracätsun cay patsachö janag patsachönö.

³ Micuylläcuna llapan junagpag garaycayämay.

⁴ Jutsalläcunata gongaycuy, nogacunapis runamajicunapa jutsanta gongayangänö.

Tentacionman mana ishquiyänäpag tsaypaycayämay.

Llapan imayca mana allicunapitapis geshpiycatsiyämay.”

⁵Tsaypitanam Señor Jesucristo nirgan: “Masqui maygayquipis amigoyquicunapa wajinman pullan pagas aywar niyanqui: ‘Amigo, quimsa tantallata prestaycamay.

⁶Juc amigömi carupita chämushga y manam ni imalläpis cantsu garaycunäpag.’

⁷Pero wajin rurinpitanam contestayäshunqui: ‘Cay öra ¿magtan shamunqui puñuyñitapis chawätsimar? Puncütapis trancashcänam.

Wamräcunawan quiquipis puñuyashcänam. Imata prestanagpagpis manam shärimuyta pueditsu.’ ⁸Nogam niyag: Manam amigoyqui carpis, juc töcayllachöga prestashunayquipag shärimungatsu. Pero sicush yapay yapay tacacunqui, tsaymi siga prestashunayquipag shärimunga.

⁹“Tsaymi niyag: Dios Yayaman mañacuyaptiquiga garayäshunquim. Ashirga tariyanquim. Puncuta tacacuyaptiquipis quichayäshunquim. ¹⁰Tsaynöllam Dios Yayaman yapay yapay mañacucagga chasquina. Ashigcagga taringam. Puncuta tacacugtaga quichayäshunquim.

¹¹“Acäsü maygayquipis wamrayquicuna, ‘Pescädota garamay’ niyäshuptiqui, ¿culebratatagcu garaycuyanqui?

¹²Tsaynöllam ‘Runtuta garamay’ niyäshuptiquipis, ¿atog curutatagcu garaycuyanqui? ¹³Gamcuna mana alli rurag caycarpis, wamrayquicunata mas allicagtam garayanqui. Tsaynömi cieluchö caycag Taytayqui Dios Yayaga gamcunapitapis mas alli, mañacugcunataga Espiritu Santonta garanapanag.”

Señor Jesucristopa contran runacuna parlayan “Supaypa poderninwanmi caycan” nir

(Mateo 12.22-30; Marcos 3.20-27)

¹⁴Juc cutim, Señor Jesucristo mana parlag runapita supayta gargorgan.

Tsaynö supay yargosquiptinnam, tsay runa parlar gallaycuptin runacuna alläpa mantsacashga cayargan. ¹⁵Pero waquincagnam niyargan: “Cay runaga supaycunapa mandagnin Beelzebú niyanganpa poderninwanmi runacunapita supaycunata gargon.”

¹⁶Waquincagnam Señor Jesucristota pantatsiyta munar, cieluchöcag milagrucunata ruranta munayargan.

¹⁷Tsaynö yarpäyanganta musyasquirmam nirgan: “Si juc naciunchö runacuna quiquincunapura chiquinacurnin raquicar cayaptinga, tsay naciunchö runacunam raquicar ushacäyanga. Tsaynöllam juc wajichö täcugcunapis quiquincunapuralla chiquinacur cawarga, imayca tsay waji juchugnö jancat raquicar ushacasquiyanga. ¹⁸Tsaynöllam supaycunata runacunapita Satanas gargorga, quiquinpa contran car mandacuy reynontapis jancat ushacascatsinman. ‘Beelzebúpa poderninwanmi supaycunata gargon’ niyämaptiqui, caynö niyag: ¹⁹Satanaspa poderninwan supaycunata gargoptüga, çpipa poderninwantan gaträshugniquicuna supaycunata gargoyan? Paycuna rurayanganmi musyatsicur entenditsiyäshunqui mana allícunata parlayangayquita. ²⁰Pero quiquin Dios Yayapa poderninwan supaycunata noga gargoptimi, rasumpa musyayanqui Dios Yayapa Mandacuy Reynon gamcunaman chämushgana canganta.

²¹“Masqui juc alli callpayog runa gerunwan wajinta täpaptinga, manam ni pi imantapis suwangatsu. ²²Pero paypita mas alli callpayog suwa chärirmi, tsay täpacug runa gerunta yätsicuycaptin gechusquirmn magacachasquir imantapis gechungä. Tsaynö vencesquirmi lllapan

imaycantapis suwarnin munanganta ruranga.

²³“Tsaymi pipis nogapa faborni mana carga, conträ caycan. Nogawan pagta runacunata Diospa Mandacuy Reynonman mana gorigcagga, jancatmi witsisquingalla.

Supay cutin runaman

(Mateo 12.43-45)

²⁴“Supayyog runapita supay yargosquirmam tsunyacunapa aywar, mayllachöpis jamaycunanpag ashirmn purin. Tsaychö mana tarirnam yarpan: ‘Yargamungä runamanmi cuticushag päragnin.’ ²⁵Runaman cutirnam tarin, imayca shumag pitsapacushga jinallan jäcu wajitanö tsay runapa shongon caycagta.

²⁶Tsaynöta tarisquirmam, supayga aywarnin ganchis mas peor mana alli rurag supaycunata ashisquirmn pusharcu cutin. Tsaynö lllapan aywarmi runapa shongonman yaycusquir, tsaychö pärayan. Tsaynö atsa supaycuna shongonchö pärayaptinmi, tsay runaga punta canganpitapis mas peor mana alli rurag ticran.”

Rasumpacag cushicuy

²⁷Señor Jesucristo tsaynö yachatsicuycaptinmi, runacunapa rurinpita juc warmi gayaraypa nirgan: “iAlläpa cushishga catsun, wachagniqui y chuchushagniqui warmi!”

²⁸Señor Jesucristonam nirgan: “Tsaypitapis mas cushishgaga cayan, Dios Yayapa Palabranta wiyarmn rasumpa cäsucugcunam.”

Mana alli runacuna mañayan, Señor Jesucristo milagruta rurananpag

(Mateo 12.38-42; Marcos 8.12)

²⁹Tsaypitanam maytsicag runacuna goricar sigiyaptin Señor Jesucristo nirgan:

“Canan tiempu runacunaga alläpa mana alli ruragmi cayan. Milagruta ruranätam munayan, pero manam ni juc milagrullatapis rurashagtsu, unay Jonás niyangan runachö Dios Yaya rurangantanö. ³⁰Tsay unay Jonás runachö Dios Yaya imayca señaltanö juc milagruta rurur, Ninive marca runacunata ricätsingannömi, Dios Yayapita Shamushga Runapis, canan cay tiempu runacunata juc milagru señalta ricätsinga. ³¹Cay patsa ushacangan juiciu junagchömi, cay mundupa uraninpita shamug Sheba marcapa reynan warmi, Dios Yayapa puntanchö shimpiyashunqui. Tsay warmiga Salomón allish yachayninwan Diospag parlagta wiyagmi, alläpa caru marcapita shamurgan. Pero tsay unay Salomónpitapis mas yachayyog poderösom canan caychö caycag runaga.

³²Tsaynöllam cay patsa ushacangan juiciu junagchö, Ninive marca runacuna canan cay tiempu runacunata shimpir condenayashunqui. Tsay Ninive marca runacunaga Jonás willacunganta wiyar cäsucurmi, llapan jutsancunapita arepenticur dejayargan. Tsaynöllam tsay unay Jonás pitaga canan caychö caycag runa mas poderöso caycaptinpis, jutsayquicunata arepenticurnin dejayta munayanquitsu ni criyianquitsu.

**Ñawintsicga imayca juc actsinömi
cuerpuntsicpag**

(Mateo 5.15; 6.22-23)

³³“Manam ni pipis linternata sendircur, cajonpa gopinmansu ni maymanpis pacapanmansu churan. Mas bienmi mas altum churan, wajiman yaucugcunata shumag actsipänanpag. ³⁴Ñawiquicunaga imayca juc actsinömi cuerpuquicunapag. Tsaymi ñawiquicuna shumag alli ricaptinga, llapan cuerpuquicunapis imayca

actsichönö canga. Pero si ñawiquicuna mana alli ricaptinga, llapan cuerpuquicunapis imayca tutapaychönömi canga. ³⁵iCuidädu cayay, gamcunachö rasumpa firmi criyicuyniquicuna imayca actsi wañugnö tutaparnin mana ushacänanpag! ³⁶Tsaymi si gamcuna rasumpa imayca actsinö wiyayangayquita cäsucuyaptiquiga, manam tutapaychöga ni imaypis cayanquitsu. Sinöga alli actsichönömi cayanqui, imayca actsi llapanman atsicyangannö.”

**Señor Jesucristo fariseocunatawan
ley yachatsicugcunata
condenar piñapan**

*(Mateo 23.1-36; Marcos 12.38-40;
Lucas 20.45-47)*

³⁷Señor Jesucristo yachatsicur ushasquiptinnam, juc fariseo runa wajinpa pushargan micuyänanpag. Yaucusquirnam Señor Jesucristo mäsaman jamaycargan. ³⁸Pero costumbrincunamannö maquina mana mayllacur micuptinnam, tsay fariseo mantsacashga cargan. ³⁹Tsaynam Señor Jesucristo nirgan: “Gam fariseocunaga costumbriquicunata cumplirllam, täsacunatawan plätucunata mayllagnö janayquicunallata limpiapäcyanqui. Pero shongoyquicunachöga alläpa codiciösu tucuyläya mana alli rurag suwam cayanqui. ⁴⁰Ä upa runacuna, ¿manacu musyayanqui ricacag cuerpuquicuna rurag Dios Yayalla shongoyquicunatapis ruranganta? ⁴¹Wactsacunata llaquipar llapan shongoyquicunawan imallancunapis garaycuyay. Tsaynöpam llapan yarpayangayquiwan rurayangayquipis alli limpiu canga.

⁴²“iAllau, fariseocuna! Gamcunam mentapitawan rudapita y waquincag

gorapita chuncaman raquisquir juc chuncacagllata Diostaga garayanqui. Tsaynö carmi Dios Yayapa cuyapäcuyñintawan llaquipäcuyñintapis gongayashcanqui. Pero caycunapitapis masga mana gongarlla Dios Yayapag limushnata garayay.

⁴³“iAllau, gam fariseocuna! Dios Yayaman mañacuyänapag goricäyänan wajichöpis punta allicag jamacunachömi jamacuyta munayanqui. Cällicunachö purirpis runacuna ‘Señor, doctor’ nir, respetar saludar rimaycuyäshunayquitam munayanqui.

⁴⁴“iAllau! Mana ricacag sepultürachö ismuycag ayacunanömi gamcunaga cayanqui. Tsay sepultüra jananpa runacuna purirpis manam musyayantsu, rurinchöga ni ima cangantapis.”

⁴⁵Señor Jesucristo tsaynö niptinnam, ley yachatsicug runa nirgan: “Maestru, tsaynö parlarga, nogacunatapis ofendiycäyamanquim.”

⁴⁶Tsaynam Señor Jesucristo nirgan: “iAllau, gam ley yachatsicugcunapis! Alläpa aja mana ruraypagtanömi, runacuna rurayänanpag mandacuyanqui. Pero tsay aja mandacuyangayquita, quiqui quicunaga manam ni juc dëdullay quicunallawanpis yanapar yatarcuyanquitsu.

⁴⁷“iAllau, gamcuna! Unay aylluy quicunam Diospa willacug unay profëtancunata wañutsiyargan. Pero gamcunaga tsay pamparayangan sepultürancunatam alläpa shumag ruratsirnin adornayanqui. ⁴⁸Tsay rurayangayquiwan testigu carmi, unay aylluy quicuna rurayangantapis ‘Allim cagan’ niyanqui. Tsaynömi paycuna unay profëtancunata wañutsiyargan y gamcunanam sepultürancunata shumag ruratsir adornaycäyanqui. ⁴⁹Quiquin Dios Yayam alläpa poderöso cayninwan

nirgan: ‘Gamcunamanmi profëtancunatawan apostolñicunata mandamushag. Tsay mandamungäpitam waquincagta wañutsiyanga y waquincagcunatanam mana alli ruragtanö gaticachäyanga.’ ⁵⁰Tsaymi cay patsa gallanganpita Dios Yayapa profëtancunata, aylluncuna wañutsiyanganpita asta canan tiempu runacunam pägacuyanga, ⁵¹Abel wañungapita asta Zacarias wañunganyag. Unay Zacariastam santisimu niyangan altarpa puntanchö wañutsiyargan. Rasuntam niyag: Paycunapa yawarninta jichayanganpita asta canan tiempu runacunapis pägacuyanga.

⁵²“iAllau! Ley yachatsicugcuna, runacuna yachacuyta munayaptinpis gamcunaga manam yachatsicuyanquitsu. Gamcunaga rasumpacagta musyaycarpis manam rurayanquitsu. Pero waquincagcuna Dios Yaya manangannö rasumpacagta yachacurnin rurayta munayaptinpis, gamcunaga amatsacurmi michäcuyanqui.”

⁵³Señor Jesucristo tsaynö ningancunata wiyarmi, fariseocunawan ley yachatsicugcuna alläpa piñacuyargan. Präsu achcuyta munarmi, imaycallatapis tapucur ashiyargan, tucuyläyapa shimpiyänanpag.

⁵⁴Tsaynöllam pantatsiyta munar, imaycallatapis mana allita parlananta munayargan.

**Señor Jesucristo alverticurnin
consolacur yachatsicun**

(Mateo 10.26-27)

12 ¹Tsaypitanam alläpa maytsicag runacuna waranga warangapayag goricar, quiquincuna pura cunjanacur jarunacuyargan. Tsaychönam discipuluncunallata puntata yachatsirnin,

Señor Jesucristo nirgan: “Tsay allishtucug fariseocunapita cuidacuyay. Paycunaga rasumpacagta musyaycarpis manam cumpliyantsu. ²Tsaymi canan pacayllapanö imapis rurayangan jancat ricacashga canga. Tsaynöllam canan mana regeshga caycagcunapis, jancat musyacanga. ³Tutapaychö pacayllapa parlayangayquitam, junagpa llapan wiyayanga. Tsaynö pacayllapa waji rurinchö parlayangayquitapis, wagtachömi gayacur mas jinchi willacuyanga llapan runacuna musyayänanpag.

**Pipitapis mana mantsacunapag
Señor Jesucristo willacungan**
(Mateo 10.28-31)

⁴“Amigocuna, gamcunatam niyag: Ama wañutsicugcunata mantsayanquitsu. Tsaynö wañushgatanaga mananam ni imanaytapis puediyëshunquinatsu. ⁵Pero nogam rasumpa yachatsiyashayqui pipita mantsacuyänayquipag canganta. Rasumpaga mantsacuyanqui, wañuscatsiyëshurniqui poderöso cayninwan infiernuman garpur ushacätsiyëshugniqui Dios Yayapita. Tsaymi canan willayag paypita rasumpa mantsacuyänayquipagga.

⁶“Tsay ichishag pitsga pishgopa channinga, ¿manacu ishca y gellaylla? Tsaynö alläpa ichiclla chanin caycaptinpis, Dios Yayaga paycunapag siemprim imaypis yarparaycan. ⁷Pero gamcunaga tsay atzca ichishag pishgocunapitapis masmi väleyanqui. Ama ni imapitapis mantsacuyaytsu, Dios Yayaga asta umayquicunachö ayca agtsayquicuna cangantapis musyanmi.

**Pimaypa puntanchösi Señor
Jesucristopa favornin
parlagcunapag willacungan**
(Mateo 10.19-20,32-33; 12.32)

⁸“Tsaymi niyag: Pipis runacunapa puntanchö faborní parlaptina, Diospita

Shamushga Runa cayninwanmi angelcunapa puntanchöpis tsay runapa fabornin parlashag. ⁹Pero pipis runacunapa puntanchö mana regemagtucur nëgamaptinga, nogapis Dios Yayapawan angelnincunapa puntanchö mana regegtucurmi nëgashag. ¹⁰Si pipis Diospita Shamushga Runa contran parlaptina, Dios Yaya perdonangam. Pero pipis Espiritu Santopa contran parlaptinmi sïga, Dios Yaya manana ni imaypis perdonangatsu.

¹¹“Si Dios Yayaman mañacuyänanpag goricayänan wajimanwan juezcunaman o maygan autoridäcunamanpis demandayëshuptiqui, ama llaquicuyanquitsu: ‘¿Imanörag parlashag? O ¿Imanörag defendicushag?’ nirga. ¹²Tsaycunachö parlayänayqui öram, Espiritu Santo imatapis allillata parlayänayquipag yachatsiyëshunqui.”

**Shumag alli cawacuyga manam
imayca riquësaragtsu**

¹³Tsaypitanam atscag runacunapa rurinpita, Señor Jesucristota juc runa nirgan: “Maestru, waugëta niycuy töcamangan erenciäta raquipamänanpag.”

¹⁴Señor Jesucristonam nirgan: “Amigo, nogaga manam jueztu cä, tsay erenciayquicunata raquipuyänagpag.”

¹⁵Tsaypitanam llapan runacunata nirgan: “Cuidädu cayay, alläpa ambriento mallagashga codiciösutag cayanquiman. Juc runa shumag alli cawanapanpagga, manam imayca riquësayog rïcu caytaragtsu wanan.”

¹⁶Tsaynö parlarmi, juc capugyog rïcu runawan iwalatsicuyya yachatsicur nirgan: “Unaymi juc capugyog rïcu runapam chacranchö alläpa atzca cosëchan cargan. ¹⁷Tsaymi yarpachacur

nirgan: ‘¿Caytsica cosëchäwanga imatarag rurashag? ¿Maymanrag churashagpis? Mananam wajïpis cay lllapanpagga pagtantsu.’

¹⁸“Tsaynö yarpachacusquirmi, ‘Caynömi rurashag’ nirgan: ‘Gollgäcunata pascasquirninmi mas jatusagta ruratsishag, tsayman lllapan cosëchäcunatawan lllapan capamagnïcunata churanäpag.’
¹⁹Tsaypitanam shongöllachö nishag: ‘Atsca watapagmi imaycäpis capaman. Cananga mananam arur afanacushagnatsu. Micucur, upyacur, cushishgallanam imaypis cawacushag.’

²⁰“Pero Dios Yayanam nirgan: ‘iGamga alläpa upa runam canqui! iCanan pagasmi wañunqui! ¿Tsay afanacur lllapan churangayquicunapis pipagrag quëdanga?’

²¹“Tsaynömi päsan cay patsallachö imayca riquesacunata gorig runataga. Tsaymi Dios Yayapa puntanchö mana ni imayog wactsapitapis mas peor llaquipaypag canga.”

Dios Yayam wamrancunata cuidan

(Mateo 6.25-34)

²²“Tsaypitanam Señor Jesucristo discipuluncunata nirgan: Ama yarpachacuyaytsu. ‘¿Imanörag cawashag? o ¿llatarag micushag? ¿llatarag upyashag? ¿llatarag cuerpüman shucucushag?’ nirga. ²³Tsay micuypitaga caway vidayquicunam mas välen y lllatapayquicunapitapis gamcunam mas väleyanqui. ²⁴Canan shumag entendir tantiyacuyay. Pishgocunaga manam murucuyantsu ni micuynincuna goriyantsu ni churacuyänapis cayäpuntsu. Pero tsaynö cayaptinpis, quiquin Dios Yayam pachancuna junta wätan. ¿Acäsu gamcunaga manacu tsay pishgocunapitapis mas väleyanqui?

²⁵Mayjina yarpachacurpis, ¿maygayquitan tsay yarpachacuyacunawan juc öra masllapis cawayanqui? ²⁶Tsaynö mana ni ima ichicllatapis rurayta pueidiycarga, ¿imapagtan cay vidachöcagcunallapag yarpachacuyanqui?

²⁷“Masqui jircacunachö waytacuna wiñagta ricäyay. Paycunaga manam arucuyantsu ni putscacuyantsu. Tsaymi niyag: Waytacunapa alläpa shumag tuctuyninwanga, manam unay ricu rey Salomónpa chipacyag lllatapanllapis waytacuna alläpa cuyacuypag canganwanga iwalargantsu. ²⁸Tsaynömi canan shumag jircacunachö gewacuna wiñayan. Pero warayga ninawan ruparmi jancat ushacasquiyanga. Dios Yayaga tsaynö ichishag goracunata lllatapatsinganpitapis, mas shumagmi gamcunataga lllatapatsiyäshunqui, iDiosman mana criyig runacuna! ²⁹Tsaynö caycappinga ama yarpachacur, llaquishga puriyanquitsu: ‘iImatarag upyashun o micushun!’ nirga. ³⁰Tsaynö yarpachacurmi Dios Yayaman mana criyicugcunaga cawayan. Pero gamcunataga cieluchö caycag Taytayquicunam imayquicuna faltangantapis musyarnin yanapayäshunqui. ³¹Tsaymi gamcunaga Dios Yayapa Mandacuy Reynonta ashiyay, pay munanganllata rurarnin. Tsaynö cawayaptiquim, Dios Yaya garayäshunqui lllapan wanayangayquicunatapis.

Cieluchö mana ni imay ushacag riquësacunapag yachatsicucuna

(Mateo 6.19-21)

³²“Gatirämagnicuna wallcaglla carpis, ama mantsacuyanquitsu. Quiquin Taytayqui Dios Yayam Mandacuy Reynonman gamcunataga cushishga churayäshunqui paywan pagta

mandacuyänayquipag. ³³Imayquicunatapis ranticusquir, wactsacunata gellaynincuna raquipuyay. Tsaynö wactsacunata imaypis mana ajayaypa generöso cayniquiwän yanapar, cieluchö mana ushacag fortünayquicuna ashiyay. Tsaymanga manam suwapis chantsu ni puyupis manam ushangatsu. ³⁴Tsaymi maychö fortünayqui canganchö shongoyquipa yarpayninpis caycanga.

Listo prevenicushga caycäshun

³⁵“Gamcunaga imayca shumag llatapayquicunawan listo wiyag wiyag, actsiquicunapis sendicushganö caycäyanqui. ³⁶Imayca servicug runacuna patronnin casaray fiestapita cutinanta shuyarar cayanganö caycäyanqui. Tsay runacunagam patronnin chärir tacacusquiptin, jina öra puncta quichayang. ³⁷Tsaynö listo prevenicushga shuyaycag wätaycuna alläpa cushishga cayätsun, patronnin chärir shuyaycagta taringanpita. Rasuncagtam niyag: Tsaynöta tarirga quiquin patronmi alläpa cushishga mandilnin churacurcur, tsay servignincunata jamaycätsir micuynincuna garanga.

³⁸Pullan pagastsurag o madrugädutsur patronninga chärir wiyag wiyag caycagta taringa. Tsaynö shuyaycag servicugcuna alläpa cushishga cayätsun. ³⁹Masqui cayta shumag entendiyay: Si juc wajiyog runa imay öra suwa shamunanta musyarga, manam imantapis suwananta deñanmantsu. ⁴⁰Tsaynölla gamcunapis wiyag wiyag shuyäyämänqui, mana musyayangayqui öram cay patsaman Diospita Shamushga Runa cayniwan cutimushag.”

**Alli confiacuy servicugwan mana
alli confiacuy servicug**
(Mateo 24.45-51)

⁴¹Tsaynö Señor Jesucristo niptinnam, Pedro tapurgan: “Señor, ¿tsay

iwalatsicuywan yachatsicungayquiga nogacunallapagcu o llapan runacunapagpiscu?”

⁴²Señor Jesucristonam nirgan: “¿Pim tsay alcäbu alli confiacuy pag servicug? Tsaycagtam patronnin confiacur wajinman churanga, tsaychö servignincunata alli örachö micuynincuna garanapag. ⁴³Tsay confiädu servicugga alläpa cushicutsun, patronnin char imaycatapis allillata ruraycagta tariptin. ⁴⁴Rasuncagtam niyag: Tsay confiädu servignintam, llapan imaycanmanpis patronnin confiacur mandacunanpag churanga. ⁴⁵Pero si tsay servignin quiquinllanchö yarpay ‘Patronni cutimunanpag unayragmi demoramunga’ nir, servicugmajincunata warmitapis ollgotapis magarnin allgotsacur micucur y upyacur machashga cacunga, ⁴⁶tsaynö mana allincunata ruray shuyänanpag manarag alistacugta tarisquirmi, patronnin mana musyangan öra illagpita chaycur, tsay mana alli rurag servigninta mana criyicug runacunatawan iwal alläpa mantsacaypag castiganga.

⁴⁷“Si maygan servicugpis patronnin munanganta musyaycar, mana cäsucurnin mana wiyag wiyag captinga, tsay wätaynintaga alläpa magarmi mantsacaypag castiganga. ⁴⁸Pero mandacungancunata mana musyar, mana allincunata rurapintinmi siğa llaquipaycarlla castigarnin magangapis. Tsaymi pitapis atscata entregarga, tsaynö atscata cutitsinanta munanga. Tsaynölla pitapis mas confiacurga, tsay confiacungan runapita mas confiansan cananta mañanga.

**Señor Jesucristoraycum
runacuna raquicäyang**
(Mateo 10.34-36)

⁴⁹“Nogagam cay munduman shamushcä, imayca nina rupaycagnö llapan mana allicagcunata

ushacätsinäpag. iTsaymi nogaga imanö munaycü, mayna lunyar ruparnin ushacaycäyananta! ⁵⁰Pero nogaga obligädum alläpa sufrirnin wañunä. iTsaytam alläpa llaquicur, asta cumplinganyag shuyaraycä! ⁵¹¿Gamcunaga cay patsaman alli päsacuyta apamur shamungätacu yarpäyanqui? Manam tsayga tsaynötsu. Nogaraycum runacuna quiquincunapura raquicäyanga. ⁵²Cananpitagam juc wajichö pitsgag caycar raquicäyanga. Quimsagcagmi, ishcgapa contran y ishcgacannam quimsanpa contran cayanga. ⁵³Tsurinpa contranmi taytan, taytanpa contranmi tsurin, wawanpa contranmi maman, mamanpa contranmi wawan, llumtsuyninpa contranmi suegran y suegranpa contranmi llumtsuynin nogaraycu piñanacur raquicäyanga.”

Shamug tiempucunapag señalcuna
(Mateo 16.1-4; Marcos 8.11-13)

⁵⁴Caytapis Señor Jesucristo maytsicag runacunata nirganmi: “Rupay jeganan lädunchö pucutay shärigta ricarmi ‘Tamyamunganam’ niyanqui. Tsay niyangayquinöllum rasumpa tamyán. ⁵⁵Urappa wayrämuptinnam ‘Usyar achämunganam’ niyanqui. Tsay niyangayquinöllum rasumpa usyar achämun. ⁵⁶Tsaytaga rasumpa allishmi musyayanqui ialläpa yachagtucugcuna! Pero manam tantiyar musyayanquitsu canan tiempu caychö ima päsayangantaga.

Chiquiyäshugniquicunawan shumag päsacuyta ashiyay
(Mateo 5.25-26)

⁵⁷“¿Imanirtan mana tantiyacuyanquitsu allita o mana allita ruraycayangayquitapis? ⁵⁸Si pipis demandar juezman apatsiyäshuptiquiga,

nänita aywaycarlla manarag juezpa puncunman char, demandashugniquiwan amistayta ashiyanqui. Tsaynö mana amistayta ashiptiquiga, juezman chaycatsishuptiquim wardiacunaman päsatsishunqui. Wardiacunanam carcelman apar gaycuyäshunqui. ⁵⁹Nogam niyag: Tsay carcelpitaga llapan débecungayquita manarag pägacurga, manam ni imanöpa yargamunquitsu.”

Dios Yaya mana castigashunayquipag arepenticuyay

13 ¹Tsaypitanam Señor Jesucristota ricagnin shamug runacuna, Galilea runacunata Pilato wañuscatsir Dios Yayata ofreceyangan wätacunapa yawarninwan, tsay wañug runacunapa yawarminta tallunganta willayargan. ²Tsayta willayaptinnam, Señor Jesucristo nirgan: “¿Gamcunaga yarpäyanqui tsay wañug runacunata tsaynö päsanganga, llapan marcama jincunapitapis mas alläpa jutsasapa cayangantacu? ³Pero nogam niyag: Manam tsayga tsaynötsu. Si llapayqui jutsayquicunata déjasquir arepenticurnin Dios Yayaman mana cutirga, tsay runacunanöllum sufrir llapayqui wañuyanqui. ⁴O ¿Gamcunaga yarpäyanqui Jerusalénchö Siloé niyangan tórré juchur, chunca pusag runacuna (18) marcama jincunapitapis mas alläpa jutsayog cayanganpita wañuyangantacu? ⁵iManam tsayga tsaynötsu cargan! Pero si gamcuna jutsayquicunata déjasquir arepenticurnin Dios Yayaman mana cutirga, paycuna wañur ushacäyangannöllum llapayqui wañur ushacäyanqui.”

Señor Jesucristo yachatsicun mana wayug igoswan iwalatsicuyya

⁶Tsaynö nisquirnam, iwalatsicuyya yachatsicurnin Señor Jesucristo nirgan:

“Juc runapam ñgos jachan chacranchö capurgan. Juc cutinam tsay runa ‘Ïgosni mä wayuncush’ nir, ricag aywargan. Pero manam ni juclayllatapis wayuynintaga tarirgantsu. ⁷Tsaynam chacranchö cuidag runanta chacrayog nirgan: ‘Quimsa watanam cay ñgosman shamü wayuyninta pallas, pero manam ni jucta taritsu. iWallusquiy! iImapagnatan mana wayuycar chacrachö canga!’

⁸“Pero chacran cuidag runanam nirgan: ‘Mä, cay watallana caycutsun. Allpata cuyutsipasquir, chapanman wanun wiñarcushag. ⁹Tsaynö abonarcupti cay wata wayuptinga allishmi canga. Pero tsaychö mana wayuptinmi siga, wallusquir jitasquishag.’”

**Señor Jesucristo curmu wagta
warmita cuticätsin**

¹⁰Tsaypitanam sabado jamay junag goricäyänen wajichö caycäyaptin, Señor Jesucristo yachatsicurgan. ¹¹Tsaynö yachatsicuycaptinmi, chunca pusag watana curmuyashga warmi tsaychö caycargan. Tsay warmiga manam derechacayta puedirgantsu, paychö supay päraptin. ¹²Señor Jesucristo tsay warmita ricaycurmi, gayasquir nirgan: “Warmi, curmu cangayquipita cuticashganam canqui.”

¹³Tsaynö nir, warmipa jananman maquina churarcuptinmi, derechacasquir jina öra Dios Yayata agradëcicir alabargan.

¹⁴Tsay sabado jamay junagchö Señor Jesucristo cuticascatsiptinmi, tsay goricäyänen wajichö mandacug piñacurnin runacunata nirgan: “Sogta junagllam aruntsicga. ðImanirtan jamay sabado junagchörag

cuticätsiyäshunayquipag shayämunqui? ðManacu tsay arungantsic junagchö shayämunquiman?”

¹⁵Tsaynam Señor Jesucristo nirgan: “iJanan shongo washarimacuna! ðManacu maygayquipis jamay sabado junagchö bueyisniquicunatawan ashnuyquicunata pascasquir, yacutsigllapis apayanqui? ¹⁶Cay warmiga unay Abrahampa ayllun shamugpitam. iAllau! Chunca pusag watanam Satanas caynö geshyatsir imayca watarätsignö sufritsishga. Tsaynö caycaptinga ðManacu jamay sabado junagchöga imayca pascagnö geshyanganpita cuticätsiman?”

¹⁷Señor Jesucristota tsaynö niptinnam, chiquignincuna pengacuyargan. Pero waquincag runacunanam mantsacashganö alläpa cushishga cayargan, Señor Jesucristo llapan rurangancunata ricar.

**Señor Jesucristo yachatsicun
mostäzapa murunwan iwalatsicun**
(Mateo 13.31-32; Marcos 4.30-32)

¹⁸Tsaynöllam Señor Jesucristo nirgan: “¿Dios Yayapa Mandacuy Reynonga imawanrag iwalanman? ¿Imallatawanrag iwalatsimanpis? ¹⁹Dios Yayapa Mandacuy Reynonga, imayca mostäza muruta juc runa chacranman murungannömi. Mostäzapa ichic murun jegarcamurnam wiñarnin imayca jachanö ticran. Tsay imayca jachanö captinmi pishgocunapis shamurnin, rämanacunachö geshuncuna rurayan.”

**Señor Jesucristo yachatsicun
levadürawan iwalatsicun**
(Mateo 13.33)

²⁰Tsaynöllam yapay nirgan: “¿Dios Yayapa Mandacuy Reynonta imawanrag

Lc 13.7 Tsaynömi Señor Jesucristo israelcunata ñgos jachatawan iwalatsir yachatsirgan.

iwalatsïman? ²¹Tsay Mandacuy Reynonga imayca juc warmi levadürata quimsa almun jarinaman wiñarcur, tsay llapan mäsaata pogotsinanpag pichungannömi.”

Quichqui punco

(Mateo 7.13-14,21-23)

²²Tsaypitanam Jerusalénman Señor Jesucristo aywarnin marcacunapawan estanciacunapa päsar llapanta yachatsicurgan. ²³Tsaychönäm juc runa tapurgan: “¿Señor, wallcagllacu runacuna salvacuyanga?”

Señor Jesucristonam contestargan: ²⁴“Gamcunaga imaycanöpis quichqui puncupa yaucugnörac cieluman salvarcayaycuyänayquipag ashiyay. Nogam niyag: Atscagmi yaycuyta munar ashiyanga, pero manam pueidiyangatsu. ²⁵Wajiyog runa sharcur wajinpa puncunta wichgasquiptinmi, wagtachö quédasquir tacacuyanqui: ‘Señor, quichaycayällamay’ nir.

Pero wajiyognam ruripita ‘iManam regeyagtsu, maypitarag cayanquipis!’

²⁶Tsaynam niyanqui: ‘Gamwanmi micurgä y upyargä. Marcacunapa cällincunachömi yachatsicurgayquipis.’

²⁷‘Pero wajiyognam niyëshunqui: ‘iNogapita nogapita witiyay, manam gamcunata regeyagtsu!’ ²⁸Tsaynö infiernuman gargoyäshuptiquim quiruncunatapis regochyätsirrag wagarnin sufriyanga, cieluchö Dios Yayapa Mandacuy Reynonchö Tayta Abrahamwan Isaac, Jacob y Dios Yayapa unay profëtancuna caycäyagta ricarnin. ²⁹‘Pero cay mundupa uranincaglöpitanan janagnincaglöpita y rupay yargamunancaglöpitanan rupay jeganancaglöpita juclä runacunam shayämunga, Dios Yayapa Mandacuy

Reynonchö pagta juc mäsallachö micupacuyänanpag. ³⁰Tsaymi canan waquincag gepachöcagcuna puntachö cayanga. Tsaynöllam canan puntachöcagcunapis gepachöna cayanga.”

Señor Jesucristo Jerusalénchö runacunata llaquicur wagan

(Mateo 23.37-39)

³¹Tsaypitanam fariseocuna Señor Jesucristoman chaycur niyargan: “Rey Herodesshi wañutsishuyniquita munan, caypita jucläman aywacuy.”

³²Señor Jesucristonam nirgan: “Gamcuna canan aywar, tsay atognö sabiduta willayay: ‘Canan warayga runacunapita supaycunata gargormi, geshyagyashacunatapis cuticätsishagrag. Warantinran llapan ruranäpagcagcunata cumplishag.’ ³³Imanö captinpis Jerusalénman aywayta sigishagmi, canan, waray y warantinpis. Rasuncagtaga Dios Yayapa profëtancunaga manam Jerusalénpita juclächöga ni jucpis wañuyanmantsu.

³⁴‘iAy Jerusalén, Jerusalén marca runacuna! Gamcunam Dios Yayapa profëtancunata wañutsir, Alli Willacuyñinta willacuyänanpag cachamungancunatapis sagmayargayqui. Nogam yapay yapay munargä, imayca wallpa chipshancunata ripran gopinman gorisquir ogllagnö catsiyayniquita. iPero manam gamcunaga munayargayquitsu! ³⁵Ricar tantiyacuyay, Dios Yaya gamcunapita raquicasquiptinmi, imayca mana imannag jäcu wajinö abandonädo quédayanqui. Tsaymi canan niyag: Gamcunaga mananam ricäyämanguninatsu asta llapayqui, ‘iAlläpa cushicuypagmi Dios Yaya cachamungan Cristo’ niyangayquiyag!”

**Señor Jesucristo sacsapäcushga
runata cuticätsin**

14 ¹Tsaypitanam jamay sabado junagchö Señor Jesucristo mandacug fariseopa wajinman micug aywargan. Tsaychö caycagcunanam Señor Jesucristota gawaräyargan, “Mä, canan ñimatash ruranga?” nir. ²Señor Jesucristopa puntanchönam jancat sacsapäcuywan geshyagyasha runa caycargan. ³Señor Jesucristonam fariseocunatawan mas allish ley yachatsicugcunata tapurgan: “Canan jamay sabado junagchö ¿geshyaycag runata alli cuticätsiman o manacu? Leynintsicga ñimanötan mandacun?” nir.

⁴Pero fariseocunaga upällallam cayargan. Tsaymi sacsapäcuywan geshyaycag runata Señor Jesucristo achcurcurnin cuticascatsir, “Aywacuyna” nirgan.

⁵Tsaypitanam fariseocunatawan ley yachatsicugcunata Señor Jesucristo nirgan: “Jamay sabado junagchö wamrayquicunawan bueyisniquicuna sanjaman jegasquiptin, ñmanacu maygayquipis jina öra jorgoyanquiman?”

⁶Pero fariseocunaga manam contestayargantsu.

**Casamientu fiestaman
convidashgacuna**

⁷Tsaypitanam convidädocuna mas allicag sillitacunata jamayänanpag acragta ricaycur, Señor Jesucristo iwalatsicuyapa yachatsicurgan:

⁸“Casamientu fiestaman convidayäshuptiqui, ama importanticag runacunapa jamacuyänanman jamacuyanquitsu. Talbesga gampita mas importanticag runacunatapís convidashga canman. ⁹Tsay

jamacunacunaman jamacuptiquiga, wajiyoq runam shamuycur niyäshunqui: ‘Shäriy, cay mas importanticag runa tsayman jamacananpag.’ Tsaynö gargoyäshuptiquim pengacurnin, gepaman aywar jamacunqui. ¹⁰Tsaymi imamanpís convidayäshuptiqui aywarga, gepamanpalla jamacunqui. Tsaynöta ricaycuyäshurniquim, wajiyoq runa shamuycur niyäshunqui: ‘Amigo, cay puntaman aywacamuy jamacallämunayquipag’ nir. Tsaynöpam llapan convidashgamajiquicunapa puntanchö mas respetashga alli runa cangayquita musyayanga. ¹¹Tsaynö licachaycachar allishtucug runaga pengacushgam canga. Pero umilde gollmi shongo runaga mas importantim canga.”

¹²Tsaypitanam convidagnin fariseota Señor Jesucristo nirgan: “Gampis, wajiquichö ima banquëtita rurarpis, ama mas importanticag amigoyquicunallatawan, waugeyquicunallataga y ayluyquicunallatawan capuyog marcamajiquicunallataga convidanquitsu. Paycunallata convidaptiquiga, rantintanam gamtapis, paycunaga convidayäshunqui. ¹³Tsaypa rantinga mas bien wajiquichö ima banquëtita rurarpis, convidarnin gayatsinqui wactsacunatawan inväliducunata y wishtucunatawan gapracunata. ¹⁴Tsaynö llapanta convidasquirmi shongoyquichö cushishga canqui, tsay wactsacuna mana cutitsiya puediyäshuptiqui. Pero tsaynö mana imannagcunata garaycungayquipitam quiquin Dios Yaya cutitsishunqui, alli rurag runacuna cawayämungan junagchö.”

**Juc banquëti meriendaman
convidashgacuna
(Mateo 22.1-10)**

¹⁵Tsaynö Señor Jesucristo yachatsicunganta wiayacurnam mësa lädunchö jamaycag runa: “iAlläpa

cushishgach cayanga Dios Yayapa Mandacuy Reynonchö banquëtita micugcuna!” nirgan.

¹⁶Señor Jesucristonam nirgan: “Juc runam, atscag runacunata wajinman convidargan banquëtita rurar alli micuycunata micupacuyänapag. ¹⁷Meriendayänan öranam, juc servigninta mandargan convidangan runacunata ninanpag: ‘Llapanpis listunam jina örash aywacayällämunqui.’

¹⁸“Pero tsay llapan convidangan runacunam disculpata mañacurnin gallaycuyargan. Tsaymi juccag nirgan: ‘Disculpaycayämay manam shamuyta puedillätsu. Chacratam tsayrag ranticurgö, tsaymanmi canan ricag aywä.’

¹⁹“Juccag convidashganam nirgan: ‘Disculpaycayämay pitsga yuntatam tsayrag ranticurgö. Canan ricagnin aywarmi shamuyta puedillämütsu.’

²⁰“Juccagnam nirgan: ‘Tsayragmi casaracurgö, tsaynöpam shamuyta puedillätsu.’

²¹“Servignin cutisquirnam, patronninta willargan convidädoncuna tsaynö niyanganta. Patronninnam alläpa piñacur servigninta nirgan: ‘Jina öra cällicunapawan pläzacunapa aywar, wactsacunatawan gapracunata y ratacunatawan inväliducunata sas cayman pushamuy.’

²²“Servigninnam patronnin mandangannö rurasquir nirgan: ‘Mandamangayquinöllam rurargö, pero wajiga jäcunragmi.’

²³“Tsaynam servigninta patronnin yapay nirgan: ‘Nänicunapawan washacagcunapa aywar, maypitapis runacunata pushamuy waji junta cayänapag.’ ²⁴Rasuncagtam niyag: Puntata invitashgacunaga mananam wajichö ni ichicllatapis micuyta yawayanganatsu.”

**Señor Jesucristopa discipulun
cayga alläpa ajam
(Mateo 10.37-38)**

²⁵Tsaypitanam Señor Jesucristo nänipa aywaycaptin, maytsicag runacunata gatirnin aywayaptin tumaycur nirgan: ²⁶“Pipis gatirämayta munarga, taytanta, mamanta, warminta, tsurincunata, waugencunata, panincunata y quiquinpa cawayninta cuyanganpitapis mas cuyamätsun. Si tsaynö rasumpa mana cuyamarga manam discipulütsu canga. ²⁷Tsaymi pipis nogaraycu imayca cruzta apagnö wañunanpag sufrirpis, gatirämätsun. Mana tsaynö sufrigcagga manam discipulütsu canga.

²⁸“Si gamcuna juc jatun torreta shäratsiyta munarga, ¿manacu jamaycur manarag gallatsirnin ayca gellayniquicuna canganta calculayanquiman, ‘Mä pantangacush ushatsinäpag?’ nir. ²⁹Tsaynö puntata mana yarpar calcularga, cimientuta quichasquirllam ushatsiyta pueidiyanquitsu. Tsaynö mana ushatsiyaptiquim, runacunata musyapar asipäyashunqui: ³⁰‘iCay runaga torreta gallaycurlla, ushatsiyta pueidintsu!’ nir.

³¹“Tsaynölla masqui juc rey jucpa contran guerrata rurananpag aywatsun. Manarag guerraman aywarmi, jamaycurnin yarpachacunga: ‘Soldädücunaga chunca warangallam, pero chiquignipaga ishcay chunca warangam. ¿Tsay wallcaglla soldädücunawan contrata venceshagtsurag?’ ³²Tsaynö mana vengegnö carga contran rey carullachörag caycaptinmi, willacugcunata mandanga manana peleayänapag. ³³Tsaynöllam maygayquipis imaycayquicunata mana välegpagnö churar, munayniquicunata

mana dējarga, manam discipulütsu cayanqui.

Cachipa puchgoynin gamyangan

(Mateo 5.13; Marcos 9.50)

³⁴“Cachiga micuyta mishquitsinanpagmi. Pero tsay cachi gamyasquirga, ¿manörög micuyta mishquitsinanpag alli canman? ³⁵Tsay cachiga mananam ni imapag servinnatsu, allpapagwan wanupagpis. Tsaynö mana servigtaga jitasquintsicllanam. Rinriyogcagcunaga shumag rasumpa entendicuyay.”

Señor Jesucristo yachatsicun juc üsha ogracashgawan iwalatsicur

(Mateo 18.10-14)

15 ¹Tsaypitanam Señor Jesucristo caycanganman, contribucion cobragcunawan jutsasapacuna, wiyayta munarnin goricäyargan. ²Tsayta ricaycurnam, fariseocunawan ley yachatsicugcuna musyapâyargan: “iCay runaga jutsasapacunata chasquirmi paycunawan micunpis!”

³Tsaypitanam cay ejempluwan iwalatsiycuypa Señor Jesucristo willacurgan: ⁴“Masqui, maygayquipapis juc pachac üshayquicuna cayâpushuy. Tsaypita juccag ogracasquiptinga, ¿manacu isgon chunca isgoncagta (99) mitsiyangayquichö dējaycur, tsay ogracashgacagta ashignin tariyangayquiyag aywayanquiman? ⁵Tarisquirnam alläpa cushishga matancarcun apayâmunquiman. ⁶Wajiquiman châratsirnam, amigoyquicunatawan vecinuyquicunata gayasquir niyanqui: ‘Llapantsic cushicushun, ogracashga üshätam tarimurgö.’ ⁷Tsaymi niyag: Tsay cuentanoëllam juc runalla jutsancunata dējasquir arepenticurnin, Dios Yayaman cutiptinga, cieluchöpis masmi

cushicuyanga tsay isgon chunca isgon (99) alli rurag runacunapag cushicuyanganpitapis.

Señor Jesucristo yachatsicun juc warmi ograngan gellayta taringanwan iwalatsicur

⁸“Masqui, juc warmipa chunca väleg gellaynincuna catsun y juccagta ograsquitsun. ¿Manacu actsita tsarircatsir, wajintapis shumaglla pitsapacurnin ashinman taringanyag? ⁹Tarisquirnam, yanasancunatawan vecinuncunata gayasquir ninga: ‘Nogawan shamur cushicuyay: Cay ograngä gellaynitam tarirgö.’ ¹⁰Tsay cuentanoëllam juc runa arepenticur jutsanta dējasquiptinga, cieluchö Dios Yayapa angelnincunapis alläpa cushicuyanga.”

Señor Jesucristo yachatsicun taytan wamranta perdonanganwan iwalatsicur

¹¹Tsaypitanam caynöpis nirgan: “Juc runapam ishchay tsurincuna cargan. ¹²Gepacagmi taytanta nirgan: ‘Taytay, llapan töcamangancag erenciäta entregaycamay.’ Tsaynam taytan ishcan tsurincunata chacrantawan erenciancuna raquipurgan. ¹³“Tsaynö ishchanta raquipunganpita ishchay quimsa junagllatanam, gepacag tsurin llapan erencianta gorisquir, caru marcapa aywacurgan. Tsay marcaman chaycurnam, imayca mana allicunallachö llapan apanganta pasaypa ushasquirgan. ¹⁴Tsaynö ushacâpucusquiptinnam, tsay marcacunachö alläpa mallagäcuy wata cargan. Tsaynam tsay jövenga mallagaywan alläpa sufrirgan. ¹⁵Aruyta ashirmi chargan, tsay marcachö täcug runaman. Tsay runanam chasquirgan cuchincunata mitsinanpag. ¹⁶Tsaychö

cuchicunata mitsir alläpa mallagarnin, cuchicunata garayangan äbaspá garanllatapis micuyta munapaptinpis, manam ni pillapis pachan garaycургantsu.

¹⁷“Tsaynö alläpa mallagarnin yarpachacur juiciunman churacasquirmi nirgan: ‘Taytäpa wajinchö atscag servignincunaga canan örach pachancuna junta micur caycäyan, inoga caychö mallagaywan wañuycaptina!’ ¹⁸Cananmi sîga, taytäman cutiycur nishag: Taytay, alläpa mana alli jutsatam Diospawan gampa contrayqui rurargö. ¹⁹Amana tsuriqitanöga ricämaytsu, sinöga juc servicug wätayniqitanöllana chasquiycallämay.’ ²⁰Tsaynö yarpasquirmi arepenticurnin, tsay jöven wajinchö taytan caycanganman cuticurgan.

“Pero wajipita carullachörag caycaptinmi, taytan ricasquir alläpa llaquipargan. Tsaynam cörrilla aywar abrasacurcur mutsaycur chasquirgan.

²¹“Tsurinnam nirgan: ‘Taytay, alläpa jutsatam rurargö, Diospa contran y gampa contrayqui. Ama tsuriqitanöga ricämaynatsu.’

²²“Pero taytannam servignincunata nirgan: ‘Jina öra isas! Mushog mas allicag llatapan apamur, cay tsurita shucutsiyay. Tsaynöllá shumag sortijata shucutsir mushogcag alli llangeta llangetsiyay. ²³Alli weracag mallwa törruta apamur pishtayay, llapantsic cushishga fiestata rurar micupacunapag. ²⁴Cay tsurîga wañushga cuentam cargon, pero cananmi sîga cutimur cawamushga cuentanö caycan.

Ogracashgam cargon, pero cananga yurimurunmi.’ Tsaynö nirmi fiestata rurar gallaycuyargan.

²⁵“Tsaynö fiestachö llapan cushishga caycäyaptinmi, mayorcag tsurin chacrachö caycargan. Wajiman cutir chaycarnam, cantapacurnin

tushupacuycagta wiyargan. ²⁶Tsaynam taytanpa juc servigninta gayasquir, wajichö ima päsanganta tapurgan.

²⁷Tsay servicug wätayninnam nirgan: ‘Waugeyquim cutimushga. Tsayta taytayqui cushicurmi, mas weracag törruta pishtatsishga, yamaylla chämunganpita.’

²⁸“Tsayta wiyaycurnam, mayorcag waugen alläpa rabiarnin wajiman yaycuytapis munargantsu. Tsaynam taytan yargosquir, wajiman yaycunanpag rugargan. ²⁹Pero taytantanam nirgan: ‘iMasqui ricay, gamga musyanquim atscá watana alläpa arurnin servirniqui, imayca esclävunö llapan mandamangayquicunata cumplir rurangäta! iTsaynö servirniqui caycaptipis, manam ni juc cabritullayquitapis nogataga garaycamashcanquitsu amigöcunawan micusquiyänäpag!’ ³⁰Pero cay tsuriquiga llapan entregangayquitam chipyat ushashga, lluta puricug warmicunawan y tucuyläya mana allicunachö gastarnin. iTsaynö imaycachö gastanin ushasquir cutiscamuptincu, gamga mas allicag wera törrutarag pishtatsirgoyqui!’

³¹“Taytannam contestargan: ‘ÿju, gamga nogawan pagtämi imaypis caychö caycanqui. Tsaymi llapan imayca capamanganpis gampag. ³²Pero cay waugeyqui cutimungantaga alläpa cushicurmi fiestata ruranantsic; wañushga cuentam cargon y canan cutimurga cawamushganömi caycan. Ogracashgam cargon y cananga ashwanmi tarirgontsic.’”

Señor Jesucristo yachatsicun juc sabïdu mayoralwan iwalatsicur

16 ¹Señor Jesucristom discipuluncunata caytapis cuentargan: “Juc ricu runapam mayoralnin cargon. Tsay mayoralpagmi

patronninta willayargan lluta imaycantapis ushanganta. ²Tsaynam mayoralninta gayasquir: ‘Gampagmi runacuna willayámashga imaycätapis mana allícunata rurangayquita. Cananpitaga mananam mayoralnínatsu canqui. Llanan cuentata entregamánayquipag prevenicuy.’

³“Mayoralnam shongollanchö ‘Cananga iimatarag rurashag! Patronnîmi trabäjüpita gargaman. Manam callpä cantsu chacrachö arunäpag y limushnata mañacuytaga pengacîmi. ⁴¡Ajä! ¡Patronnî gargamaptin runacuna wajincunaman alli chasquiyámánapagmi caynö rurashag!’

⁵“Tsaypitanam patronninta débegnincunata juc jucllapa gayasquir puntacagta nirgan: ‘Patronnîta ¿aycatatan débénqui?’

⁶“Tsay runanam ‘Pusag pachac (800) galon aceitínmi.’

“Mayoralnam nirgan: ‘Cayman jamaycur, cay recíbochö churay chuscu pachac (400) galonllata páganayquipag.’

⁷“Juccag débécugtanam tapurgan: ‘Gamga, ¿aycatatan débénqui?’

“Tsay runanam ‘Ishcay pachac ganchis chunca (270) säcu trîgunmi’ nirgan.

“Mayoralnam nirgan: ‘Cay recíbochö ishchay pachac säcullapag (200) churay.’

⁸“Tsaynö sabîdu suwa mayoral cangantam patronnin alábargan. Pero Dios Yayaman criyicug runacunapitaga, mayan criyicug runacunam alläpa sabîdu cayan quiquincuna pura imayca negociucunata rurayta musyarnin.

⁹“Nogam niyag: Cay patsa cawayangayquichö mana alli ruratsicug gellayniquicunawan imatapis allícunallata ruray, amîgoyquicuna mas cananpag ashiyay. Tsaynö allícunallata rurarnin gellayniquicuna

ushayangayquipitam, Dios Yayawan y yanapayangayqui runacunapitapis wac vida cieluchö mas allish chasquishga cayanqui.

¹⁰“Si pipis ichicllachö onrädo carga, tsaynölla onrädollam mas atscachöpis canga. Pero pipis ichicllachö suwacurga, tsaynöllam mas atscachöpis suwacunga. ¹¹Si cay patsachö llanan mana alli ruratsicug riquésacunachö mana onrädo caycâyaptiquiga ¿imanörög Dios Yayapis rasumpacag imayca riquésatanö atscag runacuna salvacâyánapag confiacushunquiman? ¹²Jucpa imaycanchöpis mana onrädo caycâyaptiquiga, ¿pirag imaycantapis confiacuyáshunquiman?

¹³“Pipis manam ishchay patronta servinmantsu. Juccagta chiquirmi, juccagta mas cuyanga. Juccagta cäsürmi, juccagtaga cäsungatsu. Tsaynöllam gellayta alläpa cuyarga, Dios Yayatapis servinrin cäsungatsu.”

¹⁴Tsaynö Señor Jesucristo parlanganta wiyarimi, gellayta alläpa cuyarnin ayrajag fariseocuna burlacur asipâyargan. ¹⁵Señor Jesucristonam nirgan: “Gamcunaga runacunapa puntallanchömi allitucuyanqui, pero Dios Yayam shongoyquicunata regen. Runacuna cay patsachö imatapis alläpa väleppag churayangantam, Dios Yayaga melanan.

Dios Yayapa Mandacuy Reynonwan Moiséspa leynin

¹⁶“Dios Yayapa unay profétancuna gellgayanganwan Moiséspa leyninga asta Juan Bautista willacur gallanganyagmi cargan. Tsaymi cananga nogana Dios Yayapa Alli Willacuyñintawan shumag Mandacuy Reynonpag willayag. Dios Yayapa Mandacuy Reynonmanga atscag runacunam imaycanöpis yaycuyta

munayan. ¹⁷Mas fácilmi cieluwan cay patsapis jancat ushacanman, Diospa Palabran leycuna ni juc letrallapis mana faltar llapan cumplinganpitapis.

**Señor Jesucristo yachatsicun
casarashgacuna mana
raquicäyänanpag**

(Mateo 19.1-12; Marcos 10.1-12)

¹⁸“Si juc runa warminpita raquicasquir jucwan casararga, adulterio niyangan jutsatam rurán. Tsaynöllam tsay gojanpita raquicashga warmiwan pipis casararga, paypis adulterio niyangan llutan mana alli jutsata ruraycan.

Juc rícu runawan wactsa Lazaro

¹⁹“Unaymi juc alläpa rícu runa, llatapanpis alläpa chaniyogcagllata shucushga waran waran fiestata rurarnin, wajinchöpis banquetillachö cargan imayca munanganpa jananchö car. ²⁰Tsaynöllam juc wactsa Lazaro niyangan runapis, entëru cuerpun jancat gerishga tsay rícupa puncunman churayanganchö imaypis jamaräcug. ²¹Paymi alläpa mallagarnin, tsay rícu runapa mäsanpita micuy shicwagllatapis micuyta munapag. Tsaynö jancat gerishga jamacuptinmi, asta allgocunapis gerinta lagwayag.

²²“Tsaynö caycarnam tsay wactsa Lazaro wañusquiptin, almanta angelcuna cieluman apayargan, unay Abrahampa puntan paraisoman. Tsaynöllam tsay rícu runatapis wañusquiptin pampayargan.

²³“Tsaynam llapan mana alli ruragcuna aywayangan infiernuchö alläpa sufrirnin caycar witsaypa ricasquirgan, unay Abrahamwan Lazaro lädunchö caycagta. ²⁴Tsaynam jinchi gayaraypa gayacurgan: ‘Tayta Abraham, llaquipaycallämayri. Cayman Lazarota

cachaycallämuy, dëdunta yacuman tullpurcur gallulläta gajarcatsimunapag, cay lunyaycag ninachömi alläpa sufricyällä.’

²⁵“Pero Abrahamnam contestargan: ‘Ïju, yarpay cawayniquichöga alläpa allishmi aywashurgayqui, llapan imaycayog cushicuyllochö cawanayquipag. Pero cay Lazaroga cawayninchö wactsa cayninwanmi alläpa sufrirgan. Tsaynö wactsa cayninwan cawayninchö sufringánpitan cananga caychö alläpa cushishga caycan. Cawayniquichö alläpa imaycayog cushishga cangayquipitam cananga gamtana caychö sufriy töcashunqui. ²⁶Caycuna llapanpitapis nogacunapita gam caycangayquiman alläpa jatun feo sanjam. Tsaymi caypita tsimpayämuyta puediyätsu ni gampis cayman tsimpamuyta pueদিনquitsu.’

²⁷“Tsaynam capugyog rícu nirgan: ‘Tayta Abraham, tsaynö captinga, alläpam rugag Lazarota taytäpa wajinman cachaycunayquipag.

²⁸Tsaychö pitsgan waugëcunata willaycamutsun cay sufricyangäman paycunapis mana shayämunanpag.’

²⁹“Abrahamnam contestargan: ‘Moiséswan Dios Yayapa unay profëtancuna gellayangancunata paycuna musyayanmi, tsayta wiyarnin cäsucuyätsun.’

³⁰“Capugyog rícu nam contestargan: ‘Tayta Abraham, manam cäsucuyangatsu. Pero wañushgapita cawascamur juc runa paycunaman cutiycur willaptinga, paypis jutsancunata dejasquir arepenticuyanman.’

³¹“Abrahamnam nirgan: ‘Moisés gellgangancunatawan Diospa unay profëtancuna gellayangancunata wiyarnin mana cäsucurga, wañunganpita cawasquir runa willacuptinpis, manam cäsucuyangatsu.’”

Jutsa ruray alläpa mana alli cangan

(Mateo 18.6-7,21-22; Marcos 9.42)

17 ¹Tsaypitanam Señor Jesucristo discipuluncunata nirgan: “Runamajinta jutsaman ishquitsinanpag invitagcunaga imaypis cayangam. Pero iallau, tsaynö pitapis jutsaman ishquitsig runa! ²Mas allim canman tsay runapa cuncanman jatun molinu rumita watarcur, lamarman jitarpuyapтин, gollmi shongo imayca wamranö tsayrag criyicuycag runacunata jutsaman manarag shicwatsinganyag. ³iTsaymi cuidädu cayay! Si runamajiqui jutsata ruraptinga piñaparnin plëtunqui. Tsaynöllam mana alli ruraynincunata dëjasquir arepenticuptinga perdonaycunqui. ⁴Si juc junagchö ganchis cuti contrayqui mana allita rurasquir, ganchis cuti ‘Perdonaycällamay mananam yapaywanga rurallëshagtsu’ nir, shamuptinga perdonaycunqui.”

Rasumpa firmi criyicuycag alläpa poderyogmi

⁵Tsaypitanam apostolnincuna Señor Jesucristota mañacuyargan: “iYanapaycayällamay mas firmi criyicayämünäpag!” nir.

⁶Señor Jesucristonam contestargan: “Si gamcunapacush criyicuyñiquicuna canman cay ichic mostäzapa murunnöllapis, tsayga cay sicomoro niyangan jachata: ‘Caypita tiracasquir aywarnin lamarman jawicay’ niyaptiquipis, tsay jacha rasumpam cäsuyëshunquiman.

Juc servicugpa obligacionincuna

⁷“Si maygayquipapis servigniquicuna chacrayquicunachö yapyacur o wätayquicunata mitsisquir wajiman chaycamuptin, ¿Acäsu ‘Päsacamuy

jamaycur micusquinayquipag’ niyanquicu? ⁸Mas bienmi gamcunaga niyanqui: ‘Meriendä prevenimur garamay, micur upyar ushangäyag servimay. Tsaypitanam gamga micunqui’ nir. ⁹Tsaynöllam llapan mandangayquita ruray ushasquiptinpis, tsay servigniquitaga ni agradëcicunquillapistsu. ¹⁰Tsaynöllam gamcunapis Dios Yaya mandayëshungayquicunata ruray, cumplisquir niyanquiman: ‘Nogantsicga mana musyag servicugcunanö carmi, apënas mandamangantsicllata cumplitsic.’”

Señor Jesucristo cuticätsin juc chunca runacuna wicuwan geshyagyashacunata

¹¹Señor Jesucristo Jerusalénman aywaycarnam, Galileapawan Samaria provinciacunapa mujunnin nänipa päsgan. ¹²Tsaypitanam juc marcaman chäriptin, wicuwan geshyagyasha chunca runacuna Señor Jesucristota tincug aywayargan. Pero manarag payman charmi, carullachö ichisquiyargan. ¹³Paycunanam gayaraypa jinchi niyargan: “iMaestru Jesús, llaquipaycayällamayri!”

¹⁴Paycunata ricaycurnam Señor Jesucristo nirgan: “Sacerdötöcunaman aywayay cuticashga cayangayquita ricayëshunayquipag.” Tsaynö aywaycarnam, jancat limpiu tsay melanaypag geshyaynincunapita cuticasquiyargan.

¹⁵Tsaynö jancat limpiu cuticashgana canganta tantiyasquirmi, juccag runaga Señor Jesucristoman jinchi gayaycachar, Dios Yayata alabarnin cutirgan. ¹⁶Señor Jesucristopa puntanman chaycurnam gagllanpis patsaman changanyag gongorpacuycur agradëcicurgan. Tsay cutimug runaga Samaria marcapitam

cargan. ¹⁷Señor Jesucristonam nirgan: “¿Manacu chuncag runacuna geshyaynincunapita jancat limpiu cuticäyargon? ¿Maytan waquincag isgon cuticashgacunaga? ¹⁸¿Cay juclä marcapita mana regeshga runallam, Dios Yayata agradëcurnin alabar cutimushga?”

¹⁹Tsay runatanam nirgan: “Sharcur, aywacuy. Rasumpa firmi criyicuyniquiwanmi cuticargoyqui.”

Dios Yayapa Mandacuy Reynon imanö chämunanpag cangan
(Mateo 24.23-28,37-41)

²⁰Tsaypitanam fariseocuna tapuyargan imay Dios Yayapa Mandacuy Reynon chämunanpag canganta. Señor Jesucristonam contestargan: “Dios Yayapa Mandacuy Reynonga manam ricaraycäyaptiquitsu chämunga. ²¹Manam niyangatsu: ‘Caychönam’ o ‘Washachönam’ caycan nir. Dios Yayapa Mandacuy Reynonga shongoyquicunachö pagtayquicunam caycan.”

²²Tsaypitanam discipuluncunata nirgan: “Chämungam junagcuna, Diospita Shamushga Runata juc junagcunallapis ricayta munayänayquipag, pero manam ricäyanquitsu. ²³Waquinam niyëshunqui: ‘Washachömi o caychömi caycan’ nir. Pero ama ricagnin cörrilla aywayanquitsu ni paycunata gatiyanquitsu. ²⁴Imayca illaga cieluchö juc lädupita wac läduman chilapyar atsicaygnömi canga, Diospita Shamushga Runaga cay patsaman cutimungan öraga. ²⁵Pero tsaynö cutimunanpag canganpita mas puntataga cay tiempu runacunam chiquirnin alläpa sufritsiyanga.

²⁶“Imanömi unay Noé niyangan runapa tiempunchö päsargan,

tsaynöllam Diospita Shamushga Runa cutimunan öra päsanga. ²⁷Büquiman Noé yaucungan junagyagmi, runacuna micupacur, upyapacur, casaracur caycäyargan. Tsaymannam apäcuypa tamyä chaycur, llapan runacunata wañutsir jancat ushacascatsirgan.

²⁸“Tsaynöllam unay Lot runa niyanganpa tiempunchöpis päsargan. Runacunam micupacur, upyapacur, imatapis rantipacurnin ranticur, murupacur y wajicunata rurar caycäyargan. ²⁹Pero Sodoma marcapita Lot yargosquiptinnam, tsay junag cielupita asufrintin nina runtu tamyamur, llapan runacunata wañutsir jancat ushacascatsirgan.

³⁰“Tsaynöllam canga Diospita Shamushga Runa cay patsaman cutimungan junagpis. ³¹Tsay junagchö pipis wagtachö caycarga, ama waji rurinman yaucutsuntsu imantapis jurgog. Ni pipis chacranchö caycar, ama wajinman imantapis jipig cutitsuntsu. ³²¡Yarpäyay Lotpa warminta ima päsanganta! ³³Cay patsachö cawayllanta cuidar tsapayta munagcagga, jancatmi ogranga. Pero cay patsachö cawayninta mana cuidar tsapayta munagcagga, janag patsa cieluchömi wiñaypa cawanga.

³⁴“Nogam niyag: Tsay pagasmi juc puñunallachö ishcag puñuycagpita, juccagllata apanga y juccagtaga dejangam. ³⁵Ishcag warmicuna agacuycäyanganpitam juccagta apar juccagtaga dejanga. ³⁶[Ishcag runacuna chacrachö arucäyanganpitam juccagllata apar juccagtaga dejanga.]”

³⁷Tsaynam tapuyargan: “Señor ¿maychötan tsaynöga päsanga?”

Señor Jesucristonam contestargan: “Maychöpis wañushga cuerpuçuna jitaragcunamanmi wisculcuna goricäyanga. Tsaynöllam nogaman

criyicugcuna goricâyämunga maychöpis caycangäman.”

Juc viuda juezman aywan justiciata rurananpag mañacug

18¹Tsaypitanam Señor Jesucristo yachatsicurgan, imaycawan iwalatsiyuypa paycuna imaypis, mana gelanar Dios Yayaman mañacuyänanpag.²Tsaynam nirgan: “Juc marcachömi Dios Yayatawan runamajincunatapis mana cäsug ni respetag juc juez cargan.³Tsay marcachönam juc viuda warmi juiciuchö cargan. Tsay viuda warmim waran waran tsay juezman aywargan: ‘Demandamagnimi alläpa allgotsäcaman justiciata ruraycallämay’ nir.

⁴“Tsaynö yapay yapay aywaptinpis, unaynam tsay viudata juezga cäsurgantsu. Tsaypitanam yarpargan: ‘Nogaga manam Diostawan runacunatapis caychöga respetar mantsätsu.⁵Pero cay viudataga justiciata rurar atendiycushag, imanana yapay yapay shamurnin rabiatsimar umäta nananpag!’”

⁶Tsaypitanam Señor Jesucristo yapay nirgan: “¿Entendiargoyquicu caynö tsay mana alli juez ninganta? ⁷Tsaynö caycaptinga, ¿Manatsurag Dios Yaya cäsunga llapan acrangancag runacunata, pagasta junagta mañacuyaptin? ¿Dios Yayaga manam shuyarätsingatsurag mañacuyanganta atendienanpag?

⁸Tsaymi niyag: Dios Yayaga mana juc shuyarätsicurmi, justiciata ruranga. Pero Dios Yayapita Shamushga Runa cay patsaman cutimurga, ¿Cay patsachö runacunapa criyicuyinincunata taringaragtsurag?”

Señor Jesucristo yachatsicun juc fariseowan contribucion cobragman iwalatsicur

⁹Tsaymi quiquincunallachö orgullöso allitucur, runamajincunata despreciar

chiquigcunapag Señor Jesucristo cay iwalatsicuywan yachatsicur nirgan:¹⁰“Ishcag runacunam templuman Dios Yayata mañacug aywayargan: Juc fariseowan Romapag contribucion cobrag runa.¹¹Tsay fariseonam ichiyurnin quiquillanpag mañacurgan: ‘Dios Yaya, alläpam agradëcicug nogaga mana waquincag runacunano cangäta. Waquincagga suwa jutsasapam, jucnin jucninwan llutan mana alli jutsata rurar täcuyan. Nogaga manam ni tagay contribucion cobragnötsu cä.¹²Nogaga cäda semänachö ishca cuti ayunarmi micütsu. Llapan gänangäpitanam juc chuncaman raquisquir, juccag partita garaycug.’

¹³“Pero Romapag contribucion cobrag runanam carullachö ichiyur, umantapis cieluman manana pallarir alläpa llaquicurnin pëchuntapis cutarrag nirgan: ‘Dios Yayallä, llaquipaycallämay. Nogalläga alläpa jutsasapa runam callä’ nir.

¹⁴“Tsaymi niyag: Contribucion cobrag runam jutsanpita perdonashga wajinman cuticurgan. Pero tsay fariseotaga Dios Yaya manam jutsanpita perdonargantsu. Tsaynö pipis allitucugga, pengacushgam canga. Pero umilde gollmi shongoyocagga, mas väleg runam canga.”

Señor Jesucristo cuyan wamracunata

(Mateo 19.13-15; Marcos 10.13-16)

¹⁵Tsaypitanam Señor Jesucristomannam asta pishi wamracunatapis apayargan, yatarnin bendisananpag. Pero tsayta ricaycurnam discipuluncuna piñacur, Señor Jesucristoman witiyänanta mana munar amatsayargan.¹⁶Tsaynam wamracunata gayasquir, Señor Jesucristo nirgan: “iNogaman wamracuna shayämunanta

ama michäyaytsu! Cay wamracunanö umildecagcunapagmi Dios Yayapa Mandacuy Reynonga. ¹⁷Rasuntam niyag: Si cay umilde gollmi shongo wamracunanö Dios Yayapa Mandacuy Reynonta mana chasquirga, manam Dios Yayapa Mandacuy Reynonman yaycuyanquitsu.”

Jur rïcu runawan

Señor Jesucristo parlan

(Mateo 19.16-30; Marcos 10.17-31)

¹⁸Tsaypitanam tsaychö mandacuy runa Señor Jesucristota tapurgan: “Alläpa alli Maestru, wac vidachö wiñaypa cawanäpag, ¿imatatan rurashag?”

¹⁹Señor Jesucristonam contestargan: “¿Imanirtan ‘Alli Maestru’ nimanqui? Jucllayllam alliga, tsayga quiquin Dios Yayallam. ²⁰Musyanquinam cay mandamientuncunata: ‘Ama jucnin jucninwan mana alli jutsata rurur täcunquitsu. Runamajiquita ama wañutsinquitsu. Ama suwacunquitsu. Ama llullacunquitsu. Taytayquitawan mamayquita respetar cäsunqui.’”

²¹Tsay runanam nirgan: “Wamra caynïpitam tsaycunataga llapanta cumplishcä.”

²²Tsaynö niptinnam, Señor Jesucristo nirgan: “Pero juc cösaragmi faltäshunqui: Llapan imaycayquitapis ranticusquir, wactsacunata garaycuy. Tsaynö rurangayquipitam cieluchöpis mana ushacag fortunayqui canga. Tsaynö rurasquirnin, shamur gatimay.”

²³Tsayta wiyaycurnam yarpachacur llaquicurgan, alläpa capugyog rïcu car. ²⁴Tsay runa llaquishga caycagta ricaycurmi, Señor Jesucristo nirgan: “¡Alläpa ajam canga, capugyog rïcucuna Dios Yayapa Mandacuy Reynonman

yaycuyänapag! ²⁵Mas fäcilmi juc jatun ‘camëllo’ niyangan wäta aujapa uchcunpa päsanman, juc capugyog rïcu runa Dios Yayapa Mandacuy Reynonman yaycunganpitaga.”

²⁶Tsayta wiyagnincagcunanam, Señor Jesucristo tapuyargan: “Tsaynö captinga, ¿pitan salvacuyta puedinga?” nir.

²⁷Señor Jesucristonam contestargan: “Runacunapag imayca aja carpis, Dios Yayapagga manam ajatsu.”

²⁸Tsaynam Pedro nirgan: “Señor, nogacunaga llapan imaycäcunata dejasquirmi, gamta gatiyämushcag.”

²⁹Señor Jesucristonam contestargan: “Rasuntam niyag: Pipis wajinta, warminta, waugencunata, taytanta, mamanta, tsurincunata, Dios Yayapa Mandacuy Reynonraycu dejangantam, ³⁰cay patsachöpis mas imaycan Dios Yaya garaycunga. Tsaynöllam wac vidachöpis Dios Yayawan imayagpis wiñaypa cawanga.”

Señor Jesucristo yapay willacun wañutsiyänapag canganta

(Mateo 20.17-19; Marcos 10.32-34)

³¹Tsaypitanam chunca ishcaj discipuluncunallata juc läduman gayasquir, Señor Jesucristo nirgan: “Cananmi Jerusalénman aywashun. Tsaychömi llapan cumplinga, Dios Yayapa unay profëtancuna Diospita Shamushga Runapag gellgayangannö. ³²Juclä mana regeshga runacunapa maquinmanmi, marca majincuna entregayanga. Tsaymi insultarnin burlacur togapurin ushayanga. ³³Tsaynö alläpa astarnin magarmi wañutsiyanga. Pero wañutsiyanganpita quimsa junagllatam cawamun.”

³⁴Tsaynö niptinpis, discipuluncunaga manam ni imata entendiargantsu ni

musyayargantsu imapag parlangantapis. Paycunapagga mana juc tantiyaypagmi cargan.

Señor Jesucristo Jericó marcachö gaprata cuticätsin

(Mateo 20.29-34; Marcos 10.46-52)

³⁵Señor Jesucristo Jerico marcaman chaycaptinnam, nani cuchunchö juc gapra limushnata mañacur jamaycargan. ³⁶Tsaypa maytsicag runacuna päsagta tantiyasquirmi, tsay gapra “Imatan päsaycällan” nirgan.

³⁷Runacuna “Nazaretpita Jesúsmi caypa päsaycan” niyaptinnam,

³⁸jinchicuycur garaypa nirgan: “iDavidpa ayllun Jesús, llaquipaycallamayri!”

³⁹Tsaynö niptinnam, puntata aywagcuna, “iUpalla cay gapra!” nir, piñapayargan. Pero tsaynö piñapayaptinpis mana cäsucurmi, mas jinchi gayarayparag nirgan: “iDavidpa ayllun Jesús, llaquipaycallamayri!”

⁴⁰Tsayta wiyasquirmam Señor Jesucristo ichisquir, apayämunanpag mandargan. Puntanman chaycatsiyaptinnam, Señor Jesucristo tapurgan:

⁴¹“¿Gampag imata ruranätatan munanqi?”

Gapranam contestargan: “Señor, ñawillä ricänantam munallä.”

⁴²Señor Jesucristonam nirgan: “Ricayna. Rasumpa firmi criycuyniquiwanmi cuticargoyqui.”

⁴³Tsaynö jina öra cuticasquirmam, Señor Jesucristopa gepanta gatir aywargan, Dios Yayata alabarnin. Tsayta llapan ricagnin runacunapis Dios Yayatam alabayargan.

Señor Jesucristoman criycun Zaqueo

19 ¹Tsaypitanam Señor Jesucristo Jerico marcaman chaycur, tsay marca pullanpa päsaycayargan. ²Tsay

marcachömi Romapag impuesto cobragcunapa mandagnin juc ricu Zaqueo shutiyog runa täcurgan. ³Tsay runam Señor Jesucristota alläpa regeyta munargan. Pero ichiclla carmi, maytsicag runacuna tsapäyaptin ricayta puedirgantsu. ⁴Tsaynö ricayta mana puedirmi, cörrilla puntasquir Señor Jesucristo päsanancag juc igosnö sicomoro niyanga jachaman lätagan ricänanpag. ⁵Tsay jachacagpa Señor Jesucristo päsaycar ricarcurnam nirgan: “Zaqueo, jina öra yarpamuy, cananmi wajiquichö quëdanä.”

⁶Zaqueonam sas jachapita yarpascamur, alläpa cushishga Señor Jesucristota wajiman pushargan.

⁷Tsayta ricaycurnam, runacuna Señor Jesucristota musyapayargan: “iJutsasapa runapa wajinman posadacug aywan!” nir. ⁸Pero Zaqueonam ichircuy, Señor Jesucristota nirgan: “iSeñor, ricay! Llapan capamanganpa pullancagtam wactsacunata caychö canan garashag. Si pitapis suwapushga carga, chuscu cuti mastam entregar cutiycatsishag.”

⁹Señor Jesucristonam nirgan: “Cananmi cay wajiman salvaciun chämushga nogaman criycur, paypis unay awiluntsic Abrahampa ayllun shamugpita captin. ¹⁰Tsaymi Diospita Shamushga Runaga, cay patsaman shamushga ogradashganö jutsasapacunata ashirnin salvananpag.”

Señor Jesucristo yachatsicun gellaywan iwalatsicuypa

¹¹Señor Jesucristo tsaynö parlanganta wiyarmi, runacuna shongoncunachö yarpayargan: “Cananchi Dios Yayapa Mandacuy Reynon nogantsicpag gallanga.” Jerusalénman yaycuycarnam, tsayta musyasquir Señor Jesucristo iwalatsicuypa yachatsicur, ¹²nirgan:

“Juc runam alläpa importanti runapa tsurin cargan. Tsay runam caru marcata aywacurgan, rey churasquiyapinrag cutimunanpag. ¹³Tsaynö carupa aywacunanpagnam chunca servignincunata gayascatsir, atasca gellaynincunata paytargan: ‘Cay gellayniwan negociuta ruraycäyay cutimungäyag’ nir.

¹⁴“Pero tsay runata marcamajincuna alläpa chiquirmi, gepanta willacucunata mandayargan niyänanpag: ‘Cay runa mandayämagnü rey cananta manam munayätsu’ nir.

¹⁵“Pero tsaynö caycaptinpis, paytaga mandacug rey cananpagmi churayashgana cargan. Tsaypita marcanman cutiycurnam, atasca gellaynin paytangan servignincunata gayatsirgan, cada ünu aycata gänayanganta musyananpag.

¹⁶“Tsaynam puntata chagcag nirgan: ‘Señor, gellayniquiwän chunca cuti mastam gänallashcä’ nir.

¹⁷“Tsaynam rey contestargan: ‘Allishmi. Gamga alli servignimi canqui. Wallcallachöpis onrädo cangayquipitam, canan churag juc chunca marcachö runacunapa mandagnin canayquipag.’

¹⁸“Tsaypitanam juccag servignin chärir nirgan: ‘Señor, gellayniquiga pitsga cuti mastam gänashga.’

¹⁹“Tsaycagtapis rey contestargan: ‘Gamtam churag pitsga marcachö runacunata mandacunayquipag.’

²⁰“Pero juccagnam caynö nir yurisquirgan: ‘Señor, caychömi caycan gellayniqui. Juc pänuwan alli pituycurmi churarätsishcä, ²¹alläpa yaga mana llaquipäcug captiqui mantsacurnin. Gamga mana churangayquipitawan mana murungayquipitam imaycatapis gorinqui.’

²²“Tsaypitanam rey nirgan: ‘iGamga mana ima väleg servicugmi canqui! Quiquiquipa palabrayquillam juzgar condenashunqui. Ningayquinömi noga yaga mana llaquipäcug cä, mana churangäpitawan mana murungäpitam imatapis gori. ²³Tsaypunga iImanirtan mana bancuman gellayniita apar churaycugayquitsu, wajiman cutimurnin wachaynintawan chasquinäpag?’

²⁴“Tsaynö nisquirnam, tsaychö caycagcunata nirgan: ‘Tsay gellayta gechusquir, tsay chunca cuti mas miratsigcagta entregaycuyay’ nir.

²⁵“Paycunanam niyargan: ‘Señor. iPero paypaga chunca masnam gellaynin can!’

²⁶“Reynam contestargan: ‘Atasca capugyogcagmi masta chasquina. Pero mana capugyogcagtaga, ichiclla capungantapis jancatmi gechuyanga. ²⁷Pero tsay marcamajincuna chiquimar rey canäta mana munagcunataga, canan cayman apaycamur puntächö wañutsiyay.’”

**Señor Jesucristo Jerusalénman
ashnun montashga yaycun**
(Mateo 21.1-11; Marcos 11.1-11;
Juan 12.12-19)

²⁸Tsaynö yachatsicusquirnam, Señor Jesucristo Jerusalénman aywar sigirgan. ²⁹Betfagewan Betania marcacunaman chaycarnam, Olivos niyangan jircaman chäyargan. Tsaypitanam ishcag discipuluncunata mandargan: ³⁰“Tagay tsimpa marcaman aywarnin yaycurmi, manarag ni pi montashga mallwa ashnu wataraycagta tariyanqui. Tsay ashnuta pascasquir apayämunqui. ³¹Si pipis ‘iImapgtan ashnuta pascayanqui?’ niyashuptiquiga, ‘Señor Jesúsmi wanan’ niyanqui.”

³²Tsaypita discipuluncuna aywarnam, Señor Jesucristo ningantanölla llapanta

tarisquiyargan. ³³Ashnuta pascaycäyaptinnam, ämuncuna tapuyaran: “¿Imapagtan pascayanqui?”

³⁴Paycunanam contestayargan: “Señor Jesúsmi wanan.”

³⁵Punchuncunawan ashnuta carunarcu aparmi, Señor Jesucristota montatsiyargan.

³⁶Señor Jesucristo tsaynö aywangallanmanmi, punchuncunatawan jacuncunata llushtisquir, puntanman päsananpag mashtayargan. ³⁷Olivos niyangan jircapita urämur chaycarnam, llapan gatignincuna alläpa cushishga gayaycachar Dios Yayata alabayargan, Señor Jesucristopa llapan milagruncunata ricashga car.

³⁸Tsaymi niyargan: “iAlläpa cushicuypag catsun, Dios Yayapa shutinchö poderöso Mandacug Reynintsic shamug! iCieluchöwan maytsaychöpis alli päsacuywan alläpa shumag cushicuy catsun!”

³⁹Tsaynam maytsicag runacunapa rurinchö aywag fariseocuna niyargan: “iMaestru, gatishugniquicunata piñapay upälla cayänapag!”

⁴⁰Señor Jesucristonam contestargan: “Niyagmi, si paycuna upällayaptinga, rumicunapis gayaycachäyangam.”

⁴¹Jerusalénman yaycuycarnam, tsay marcata ricasquir llaquirnin wagar, ⁴²nirgan: “iJerusalénchö täcugcuna, imanömi munä gamcuna canan junagllapis Dios Yayawan alli päsacuychö cayänayquipag canganta musyayänayquita! Pero tsay alli päsacuyta mana ricarmi imayca pacaragnö captin tantiyayanquitsu. ⁴³Mana alli tiempucuna gamman chämuptionmi, chiquishugniquicuna shamuycur, altu pergayquicuna wactanman allpata parijasquir entërupa tumat cunchawar,

llapan lädupa atacagniqui yaycapuyäshunqui. ⁴⁴Tsaynö atacarmi llapan wamrayquicunatawan patsachö rumicunaman sagmar pasaypa jancat ushacätsiyäshunqui. Tsaynöllam pergayquicuna rurinchö täcugcunatapis jancat wañutsir ushacätsiyaptin manam ni juc rumillapis pergaranganchö quédangatsu ni juccag rumipa jananllachöpis. Tsaynö jancat ushacätsiyäshunqui, Dios Yaya salvayäshunayquipag tiempu chaycämuption despreciarnin mana chasquiyangayquipitam.”

Señor Jesucristo templuchö ranticugcunata gargon

(Mateo 21.12-17; Marcos 11.15-19; Juan 2.13-22)

⁴⁵Tsaypitanam Señor Jesucristo Jerusalénchö templuman yaycusquir, tsaychö ranticuycag runacunata gargar, ⁴⁶nirgan: “Diospa Palabanchömi gellgashga cayan: ‘Wajjiga Dios Yayaman mañacunallapagmi.’ iPero gamcunaga ‘suwacunapa machayninmanmi’ ticsratsiyashcanqui!”

⁴⁷Señor Jesucristonam waran waran templuchö yachatsicurgan. Pero sacerdotícunapa mandagnincunawan ley yachatsicugcuna y tsay marcachö mas mandacug autoridäcunam imaycanöllapis Señor Jesucristota wañutsiyta munayargan. ⁴⁸Pero manam ni imanöpa wañutsiyänanpag tariyargantsu, Señor Jesucristo yachatsicunganta llapan runacuna alläpa cushishga wiyayaptin.

Señor Jesucristopa mandacuynin
(Mateo 21.23-27; Marcos 11.27-33)

20 ¹Tsaypitanam juc junag templuchö Señor Jesucristo yachatsicurnin, shumag Alli Willacuyta

willacuycargan. Tsaymannam sacerdotícunapa mandagnincunawan ley yachatsicugcuna y mas mandacug auquincunawan chaycur, ²niyargan: “¿Ima mandacuyñiquiwantan caycunata rurargoyqui? ¿Pitan mandacuyñinta entregashushcanqui caycunata ruranaquipag?”

³Señor Jesucristonam contestargan: “Nogapis jucta tapuyáshayqui. Mä, niyámay: ⁴¿Pitan mandamurgan Juan Bautista runacunata bautizananpag, Dios Yayacu o runacunallacu?”

⁵Paycunanam quiquincuna pura discutir ninacuyargan: “¿Si Dios Yayam cachamushga nishgaga, ‘Imanirtan mana criyiyargayquitsu?’ nimáshunmi. ⁶Pero manam puedintsicstu ‘Runacunam cachamushga’ niytaga. Si tsaynö nishaga llapan runacunam sagmar wañuscatsimashwan. Paycunaga rasumpam musyayan Juan Bautista Dios Yayapa willacug profétan canganta.”

⁷Tsaynö yachatsinacusrinam niyargan: “Manam musyayátsu ni pi cachamungantapis.”

⁸Tsaynam Señor Jesucristo contestargan: “Tsaynömi nogapis willayagtsu ni pipa mandacuyñinwan caycunata rurangátapis.”

**Señor Jesucristo yachatsicun mana
alli arupucugcunawan iwalatsicur**
(Mateo 21.33-44; Marcos 12.1-11)

⁹Tsaypitanam runacunata cay iwalatsicuyta cuentarnin gallaycargan: “Juc runam chacranchö üvata plantascatsir, tsay chacranta pullan pura cuidayäpunanpag arugnincunata entregaycur caru marcapa aywacurgan. ¹⁰Cosécha tiempu chäriptinnam, chacran tsaragcunaman juc servigninta mandargan töcangancagta

entregayänapag. Pero chacran tsaragcunanam alläpa magasquirnin, jinallanta gargosquiyargan. ¹¹Tsaynam chacrayog runaga juccag servigninta mandarga. Pero paytapis allgotsacurnin pengacuypag magarnin alläpa maltratasquirmi jinallanta gargosquiyargan. ¹²Tsaypitanam chacrayog runaga juccag servignintana mandargan. Tsaycag servignintanäga alli magacachasquirmi yawar püruta gargosquiyargan.

¹³“Tsaynam chacrayog nirgan: ‘Cananga ¿imatatan rurashag? Alläpa cuyay tsurítam cachashag. Paytaga maypis respetayanga.’

¹⁴“Pero chacrayogpa tsurinta ricasquirnam, pullan pura tsarag runacunata yachatsinacur niyargan: ‘Caymi llapan chacracunawan eredëru quëdanga, wañuscatsishun chacranwan nogantsic quëdanapag’ nir. ¹⁵Tsaynö yarpami chacranpita jucläman jorgosquir wañutsiyargan.

“Tsaynö wañuscatsiyaptin, üva murutsig chacrayogga ¿imata rurangantatan gamcuna yarpäyanqui? ¹⁶Aywarnin chacran tsarag runacunata wañuscatsirmi, juccunatana chacranta entregaycunga.”

Tsayta wiyaycurnam niyargan: “iAma tsaynöga ni imaypis caycullanmantsu!”

¹⁷Pero Señor Jesucristonam ricapaycurnincuna nirgan: “¿Tsaypunga ima ninantan Diospa Palabran caynö gellgashgachöga caycan?

‘Waji ruragcuna despreciar jitariyangan mana alli rumim, cananga mas allcag maestru rumi tigrashga.’

¹⁸Tsaymi cay rumi jananman pipis shicwarga, jancat ñutusquina. Pero tsay rumi pipa jananmanpis jegarga, jancat polvutam rurasquina.”

¹⁹Tsaynam sacerdotícunapa mandagnincunawan ley yachatsicugcuna, jina öra prësu achcuyta munayargan, paycunapa contran cay iwalatsicuywan Señor Jesucristo parlanganta tantiyasquir. Pero runacunapita mantsacurmi mana achcuyargantsu.

**Señor Jesucristota
impuestupag tapuyan**

(Mateo 22.15-22; Marcos 12.13-17)

²⁰Tsaypitanam yachayllapa musyapacugcuna mandayangan ricaraycäyargan Señor Jesucristoman alli onrädotucurnin aywaycur tapuyänanpag. Tsaynö tapupar llutanta parlascatsir acusarnin, Roma gobernadorman entregayänanpag.

²¹Tsaynam yachayllapa musyapacugcuna tapuyargan: “Señor, rasumpam musyayä yachatsicungayquiwan parlangayquipis rasumpacaglla canganta y runacuna alläpa allish cayaptinpis paycunawan mana juntacangayquita. Gamga yachatsicunqui Dios Yaya munangannölla rasumpa alli cawacuyänäpagmi. ²²¿Allicu Romachö mandacug gobierno Cesarman impuestuta pägashwan o manacu?”

²³Señor Jesucristonam yapta tapuyanganta musyar nirgan: ²⁴“Mä, juc gellayta ricätsiyämäy. ¿Pipa reträtunwan shutintan caychö gellgashga caycan?” Tsaynam contestayargan: “Emperador Cesarpam.”

²⁵Señor Jesucristonam nirgan: “Cesarpacagtaga, Cesarta entregaycuyay. Pero Diospacagtaga, Diosta entregaycuyay.”

²⁶Atsca runacunapa jananchö Señor Jesucristo tsaynö niyauptinnam, tsay

yachayllapa musyapacugcuna ni imanö pantatsiyta pueidir, mantsacashga upällalla quëdayargan.

**Señor Jesucristota saduceocuna
tapuyan wañushgacuna
cawayämunanpag**

(Mateo 22.23-33; Marcos 12.18-27)

²⁷Tsaypitannam waquincag saduceocuna Señor Jesucristota ricagnin shayämurgan. Tsay saduceocuna runacuna wañusquir cawayämunananta manam criyirmi, Señor Jesucristota caynö tapuyargan:

²⁸“Maestru, unay Moisésmi gellgashga leyninchö dejapamashcantsic, si juc casädo runa tsurin manarag captin wañuptinga, viudanwan gepancag waugen casarananpag. Tsaynö casarasquir tsurin captinga, tsay wañushgacag waugenpa tsurin cuenta cananpag. ²⁹Unayshi ganchis waugecuna cayargan. Tsayshi mayorcag casarasquirnin manarag tsurin captin wañusquinag. ³⁰⁻³¹Tsayshi gepancag waugenwan mas gepancagpis tsay viudanllawan casarashga cayänag. Paycunapis manarag tsurincuna captinshi wañusquinag. Tsaynöllash ganchis waugentin tsay warmillawan casarasquir, manarag tsurincuna captin llapanpis wañusquiyänag.

³²Tsaypitanash warmipis wañusquinag.

³³Tsaypunga cawamuy junagchöga ¿maygancag waugeparag warmin canga, ganchisnintinwan casarashga caycaptinag?”

³⁴Señor Jesucristonam contestargan: “Ollgopis warmipis cay patsallachömi casarayan. ³⁵Pero wac vidaman chäyänanpag acrashgacuna cawascamurga mananam warmipis ollgopis casarayanganatsu. ³⁶Tsaychöga

mananam wañuyanganatsu. Llapanpis angelcunanölla carmi, Dios Yayapa wamrancuna cayanga, pay cawatsimushga captin. ³⁷Pero unay Moiséspis quiquinmi musyatsimantsic wañushgacuna rasumpa cawayämunganta. Paytam shiraca casha lunyagchö yuripur, Dios Yaya nirgan: ‘Nogaga Abrahampa, Isaacpa y Jacobpa Diosninmi cä.’ ³⁸Tsaymi Dios Yayaga manam wañushgacunapa Diosnintu, sinöga lllapan cawagcunapa Diosninmi. Tsaymi Diospagga lllapanpis cawaycäyan.”

³⁹Tsaynö niptinnam, waquincag ley yachatsicugcuna niyargan: “Maestru, ialläpa allitam niyämargoyqui!”

⁴⁰Tsaypitaga mananam yapay ni imatapis tapuyninta valorayargannatsu.

¿Pipa ayllun shamugpitan Cristoga?

(Mateo 22.41-46; Marcos 12.35-37)

⁴¹Tsaypitanam Señor Jesucristo runacunata tapurgan: “¿Imanirtan niyanqui Cristoga unay rey Davidpa ayllun shamugpita cangata? ⁴²Quiquin Davidpis Salmo librunchö gellgargan:

‘Señormi Señornita nirgan:

Cay deréchucag lädüchö jamacamuy

⁴³ lllapan chiquishugniquicunata chaquiquipa gopinman churamungäyag.’

⁴⁴Tsaynö David ‘Señornimi’ nicaycaptina, ¿Imanöpatan Davidpa miragnin ayllunpa tsurin Cristo canga?”

Señor Jesucristo ley

yachatsicugcunata acusangan

(Mateo 23.1-36; Marcos 12.38-40;

Lucas 11.37-54)

⁴⁵Lllapan runacuna wiyaycäyaptinmi, Señor Jesucristo discipuluncunata nirgan: ⁴⁶“Ley yachatsicugcunapita

cuidacuyay, paycunaga chaquincuna puntanyag alli lllatapashgam, pläzacunachöwan mercädocunachöpis runacuna shumag alläpa respetar saludayänanta munar puriyan. Dios Yayaman mañacuyänanpag goricäyänan wajicunachöpis allicag jamacunamanmi jamacuyta munayan. Banquëti fiestacunachöpis punta punta jamacunachömi jamayta gustayan. ⁴⁷Viudacunapa wajincunatapis gechusquirmi, disimularnin alli tucur unayyag resacur cayan. Tsaynö rurayanganpitam, paycunataga Dios Yaya mas mantsacaypag castiganga.”

Wactsa viudapa garaynin

(Marcos 12.41-44)

21 ¹Tsay templuchönam Señor Jesucristo ricaraycargan, capugyog rücu runacuna gellay wiñäyänan cäjaman Dios Yayapag wiñäyagta. ²Tsaynöllam ricargan juc wactsa viudapis ishca y ichishag wallcalla väleg gellayninta wiñagta. ³Tsaynam Señor Jesucristo nirgan: “Rasuncagtam niyag, cay wactsa viudam lllapancunapitapis mas atscata Diospag wiñashga. ⁴Waquincunaga atscä cayäpuptinpis ichic sobragllatam churayashga. Pero cay wactsa viudaga pachanpagwan janapagpis faltapucuyarmi lllapanta capunganta Dios Yayapag churashga.”

Señor Jesucristo willacun templu

jancat juchur ushacänanpag

(Mateo 24.1-2; Marcos 13.1-2)

⁵Waquincagcunanan parlaycäyargan tsay templu shumag rumicunawan adornashga y Diospa garaynincunawan allish alajashga canganta. Pero Señor Jesucristo nirgan:

6“Chämungam junagcuna cay ricaycayangayqui shumag adornashgacunawan llapan rumincunapis juccag rumipa jananchö manana quëdanapag. Tsaynömi jancat juchur ushacanga.”

**Cay patsa ushacänanpag ima
señalcuna cananpagcag
willacucuna**

(Mateo 24.3-28; Marcos 13.3-23)

7Tsaynam tapuyargan: “Maestru, ¿imaytan tsaynöga canga? ¿Ima señaltatan ricayashag cay llapan ningayqui cumplinapagga caycanganta?”

8Señor Jesucristonam contestargan: “¡Cuidädu cayanqui pipis mana engañayashunayquipag! Atscagmi nogatucur shamurnin niyanga: ‘Nogam cä.’ ‘Dios dispöningam tiempo chämunganam’ nir. Pero gamcunaga ama criyirnin paycunata gatiräyanquitsu. 9Si guerracunapagwan juc marca runacuna maganacugta wiyarpis ama mantsacäyanquitsu. Tsaynömi rasumpa tsaycunaga päsaंगा. Pero tsaycuna päsapinpis cay patsaga manaragmi ushacangaragtsu.”

10Tsaynöllam nirgan: “Juc naciunmi juccag naciunwan peleyanga y juclä marcacunawanmi guerracunata rurayanga. 11Maytsaychöpis matsacaypagmi patsa cuyunga, alläpa mallagacuywan y pesti geshyaycunawanmi wañur ushacäyanga. Gieluchöpis alläpa mantsacaypag jatusag señalcunatam ricäyanga.

12“Pero caycuna manarag päsapinmi, gaticachäyashurniqui achcuyashunqui. Goricäyänan wajicunaman apaycur juzgayashurniquim, carcelman gaycatsiyashunqui. Tsaynöllam mas mandacug autoridäcunapawan reycunapa puntancunaman nogaraycu

apayashunqui. 13Tsaycuna päsayashungayquiwanmi nogapag rasumpa willacur musyatsicuyanqui imayca testigünö. 14Pero gamcuna ama yarpachacuyanquitsu imanö defendicuyänayquipag cangata, 15nogam alli yachayniquicuna garayashayqui parlayänayqui öra. Tsaynö alli yachayta parlayaptiquim chiquiyashugniquicunapis ni imapita acusayashunquitsu y manam ni imanö contradecitapis puediyashunquitsu. 16Pero gamcunataga traicionayarniquim autoridäcunaman quiquiucunapa taytayquicunawan mamayquicuna, waugeyquicuna, aylluyquicunawan amigoyquicunalla apayashunqui y waquiquitaga wañutsiyashunquim. 17Tsaynömi nogaraycu llapan runacuna chiquiyashunqui. 18Pero tsaynö chiquiyashuptiquipis yamayllam caycäyanqui, manam ni juc agtsayquicunallapis ogracangatsu. 19Tsaymi firmi criyicuyniquicunawan alli tsaracuyänayqui almayquicuna salvacänanpag.

20“Jerusalén marcata soldäducuna tumat täparagta ricarmi, Jerusaléna ushacaynin junag chämunganta musyayanqui. 21Tsayta ricarga Judeachö täcugcuna jircacunapa geshpicur aywacuyätsun. Patsan Jerusalénchö päragcunapis tsaynö geshpicuyätsun y yargoshgacagcunaga ama cutiyätsuntsu. 22Tsaynömi alläpa mantsacaypag castüga canga, Diospa Palabran gellgashgachö willacungannö llapan cumplinganyag. 23¡Allau, tsay junagchö geshyag warmicunawan chuchuycag llullu wamracuna! Tsaynö alläpa sufriymi tsay naciunchö canga y alläpa mantsacaypag castigum canga tsay Israel runacunapag. 24Waquintam espädawan wañutsiyanga; waquincagtanam maytsay

naciuncunapa prësu apayanga. Dios Yayaman mana criyig caru marca runacunam Jerusalénta jarutäcuyanga asta Dios Yaya dispöningan tiempuyag.

Diospita Shamushga Runapa cutimuynin

(Mateo 24.29-35,42-44;

Marcos 13.24-37)

²⁵“Señalcunam canga rupaychöwan quillachö, goyllorcunachöpis. Lamar alläpa mantsacaypag gayarar lagchicaptinmi, maytsay naciuncunachö runacuna mantsacaywan llaquicur ni imanö cayta puediyangatsu. ²⁶Tsaynam runacuna mantsacaywan desmayäyanga cay patsa ushacasinganta yarpar. Tsaynöllam cieluchö caycagcunapis llapan cuyupacuyanga. ²⁷Tsay öram ricäyämanga Diospita Shamushga Runa pucutay rurinchö poderöso cayninwan alläpa chipacyarrag shamuycagta. ²⁸Caycuna llapan niyangagcuna päsahta ricar, alli valoracurnin cushishga cayay. Tsaymi librar salvayänagpag ichicllana faltaycanga.”

²⁹Señor Jesucristo cay iwalatsicuywan yachatsicur niran: “Ígos jachapitawan waquincag jachacunapita yachacuyay. ³⁰Jachacunapa rapran tsegllimugta ricarmi, achay tiempu chämunanna canganta musyayanqui. ³¹Tsaynöllam llapan willayangagcuna päsahta ricar, Dios Yayapa Mandacuy Reynon chämunanpag ichiclla faltanganta musyayanqui.

³²“Rasuntam niyag: Canan tiempu runacuna manarag wañuyaptinmi, caycuna llapan cumplinga. ³³Cieluwan cay patsapis ushacangan, pero nogapa palabräga mana juc faltarmi llapan cumplinga.

³⁴“Cuidacuyay, shongoyquicuna munangan mana alli viciucunapitawan

machaycunapita y cay vidachö imaycapagpis yarpachacuycunapita. Tsaynö mana cuidacur caycäyaptiquitag tsay junagcuna, ³⁵imayca trampa achcugnö achcuyäshunquiman. Tsaynöllam entëru munduchö llapan runacunamanpis chämunga. ³⁶Pero gamcunaga Dios Yayaman mañacur imaypis shuyaycäyay, mana alli tiempucunachöpis firmi criycuyniquicunawan alli tsaracurnin salvacäyänayquipag. Tsaynö alli tsaracurmi Diospita Shamushga Runapa puntanchöpis mana mantsacurnin ichiraycäyanqui.”

³⁷Señor Jesucristoga junagpam templuchö yachatsicug y pagaspanam Olivos niyangan jircachö cargan.

³⁸Tsaca tsacallanam llapan runacuna templuman aywayag, Señor Jesucristopa yachatsicuyñinta wiyag.

Señor Jesucristota prësu achcuisquir wañutsiyänanpag yachatsinacuyan

(Mateo 26.1-5,14-16;

Marcos 14.1-2,10-11; Juan 11.45-53)

22 ¹Levadürannag tantata micuyänan semäna Pascua fiestapag ichicllanam faltaycargan. ²Mas mandacugcag sacerdotícunawan ley yachatsicugcunam, runacunapita mantsacurnin imaycanöllapis ashiyargan Señor Jesucristota wañutsiyänanpag.

³Tsaypitanam Señor Jesucristopa chunca ishca discipuluncunapita Judás Iscarioteпа shongonman Satanasa yaycargan. ⁴Tsaymi sacerdotícunapa mandagnincunamanwan templuchö wardiacunapa mayornincunaman aywaycur parlargan, Señor Jesucristota traicionarnin imanöllapis entregananpag. ⁵Paycunanam alläpa

cushicushga gellayta pägayänapag äniyargan. ⁶Judásga änisquirnam runacuna mana cayangan örata ashirgan, Señor Jesucristota entreganapag.

**Señor Jesucristo ultimu vez
discípuluncunawan micungan**
(Mateo 26.17-29; Marcos 14.12-25;
Juan 13.21-30; 1 Corintios 11.23-26)

⁷Levadürannag tantata micuyänan junagchömi, costumbrincunamannö imaypis juc mallwa üshata pishtayag Pascua fiestapag. ⁸Tsaynam Pedrotawan Juanta Señor Jesucristo mandargan: “Aywayay Pascua micuyta llapantsic micunapag alistag” nir.

⁹Paycunanam tapuyargan: “¿Maychö alistayänätatan munanqui?”

¹⁰Señor Jesucristonam contestargan: “Jerusalénman chaycurmi juc runa puyñuwan yacuta apaycagta tariyanqui. Tsay runata asta wajinman yaucungayag gatirnin, ¹¹tsay wajiyocta niyanqui: ‘Maeströcunam nin: ¿Maygancag cuartuyquichötan discípulücunawan Pascua micuyta micushag?’ ¹²Wajiyognam ricätsiyäshunqui altuschö juc jatun cuarto alistashgata. Tsaychö micunapag alistayanqui.”

¹³Paycuna aywarnam, Señor Jesucristo ningannölla tarisquir, Pascua micuyta micuyänapag alistayargan.

¹⁴Merienday öranam discípuluncunawan Señor Jesucristo micuyänapag mäsaman jamaycuyargan. ¹⁵Tsaynam Señor Jesucristo nirgan: “Ilmanömi munargä, celebrarin Pascua fiesta meriendata gamcunawan pagta manarag wañucurnin micuyta! ¹⁶Tsaymi niyag: Mananam cay micuytaga micushagnatsu asta cieluchö gamcunawan Dios Yayapa Mandacuy Reynonchö yapay micungantsicyag.”

¹⁷Tsaypitanam cöpachö caycag vñota achcurcur, Dios Yayata agradëcicusquir

discípuluncunata nirgan: “Cayta llapayqui yawatsinacur upyatsinacuyay. ¹⁸Rasuntam niyag: Mananam üvapita vñota yapayga upyashagnatsu asta Dios Yayapa Mandacuy Reynon chämuptin goricangantsicyag.” ¹⁹Tsaynöllam tantata achcurcur Dios Yayata agradëcicusquirnin ishcayman paquisquir discípuluncunata macyar nirgan: “Cayga nogapa cuerpümi. Gamcunaraycum chiquimagnïcunaman entregashga canga. Tsaymi nogata yarpäyamar imaypis caynö rurayanqui.”

²⁰Tsaynöllam micur ushasquiypatin, cöpachö caycag vñota achcurcur nirgan: “Cay cöpachö caycagmi imayca juc señalnö Dios Yaya gamcunawan juc mushog conträtuta änicurnin yawarniwan rurangan. Tsaymi gamcunaraycu yawarni jichashga canga. ²¹Pero tsay traicionar ranticamag runapa maquina cay mësachömi nogapawan pagta caycan. ²²Diospita Shamushga Runaga quiquin Dios Yaya dispöningannömi wañutsag. Pero iallau tsay traicionarnin ranticug runa!”

²³Discípuluncunanam quiquincuna pura tapunacuyargan: “¿Maygantsictan tsay traicionero cantsic?” nir.

Pitan mas mandacug

²⁴Tsaypitanam discípuluncuna mas mandacuyog cayta munarnin piñanacuyargan. ²⁵Tsaynam Señor Jesucristo nirgan: “Dios Yayaman mana criyicugcunawan cay patsachö mandacug reycunaga, podernincunachö runacunatam alläpa allgotsacur mandayan ‘Alläpa alli mandacugmi cayan’ niyänapag. ²⁶Pero gamcunaga manam tsaynötsu cayänayqui. Mas bien maygayquipis mayor mandacug cayta munarga, pishi wamranö umilde gollmi shongom cayänayqui. Tsaynöllam mas importanti mandacug cayta munarga,

waquincagcunapa servignin cayänayqui.
²⁷Tsaypunga ¿maygantan mas importanti mandacug canman, mäsachö jamaycagcu o micuynin servigcagcu? ¿Acaso manacu mas importanti mandacuyyog mäsachö jamaycag, tsay servigninpitapis? Tsaynö caycaptinpis, nogaga imayca servicugnömi gamcunachö caycä.

²⁸“Gamcunaga nogawan pagtam imayca sufrimientücunachöpis cayashcanqui. ²⁹Tsaymi Dios Yaya nogata mandacunäpag churamangannölla, gamcunatapis mandacuyänayquipag churayag. ³⁰Gamcunaga nogapa Mandacuy Reynö mäsachömi micuyanqui y upyayanqui. Tsaynö mandacuyniquicunawanmi nogapa puntächö alli jamacunacunaman jamaycur, chunca ishca Israel casta runacunata juzgayanqui.”

**Señor Jesucristo willacun
 discipulun Pedro
 nëganapag canganta**

*(Mateo 26.31-35; Marcos 14.27-31;
 Juan 13.36-38)*

³¹Tsaynöllam Señor Jesucristo nirgan: “Simón, Simón, Satanasmi mañacushga, imayca trīguta wayragnö jutsaman ishquitsishunayquipag. ³²Pero nogam Dios Yayaman gampag mañacurgö mana gelanar, nogaman firmi criyicamunayquipag. Tsaynam nogaman yapay firmi criyicamurnin, criyicugmajiqui llapan waugeyquicunata yanapaycunqui nogaman firmi criyicur alli tsaracuyänanpag.” ³³Pero Simón Pedronam nirgan: “Señor, nogaga gamwan pagtayquim carcelmanpis aywashag. Tsaynöllam mana dējarniqui pagtayqui wañushagpis.”

³⁴Señor Jesucristonam nirgan: “Pedro, rasuntam nig: Canan pagasmi gällu manarag ishca cuti cantaptin, quiquiqui quimsa cuti ‘Manam regëtsu’ nimar nëgamanqui.”

**Ichicllanam faltaycan pruebacuna
 chämunan tiempupag**

³⁵Tsaypitanam Señor Jesucristo tapurgan: “Puntata gellayninnagtawan millcapannagta y llangennagta mandayangagchö, ¿imayquicunallaga faltargancu?”

Paycunanam contestayargan: “Manam ni imäcunapis faltargantsu.”

³⁶Tsaypitanam Señor Jesucristo nirgan: “Cananmi siga gellayniquicunatawan alporjayquicunatapis apayay. Si espädayquicuna mana captinpa, punchuyquicunata ranticusquir justa rantiyay. ³⁷Niyangagnömi nogapag Diospa Palabran gellgashgachö ningan cumplinga: ‘Mana alli ruragcunapa rurinchömi jutsasapacunawan yupashga cargan.’ Tsaynö rasumpam Diospa Palabrancho nogapag llapan gellgayangancunaga cumplinga.”

³⁸Tsaynam discipuluncuna niyargan: “Señor, caychö ishca espädallam cayäpaman.”

Señor Jesucristonam contestargan: “¡Tsayllapagnam!”

**Getsemani niyangan wertachö
 Señor Jesucristo Dios
 Yayaman mañacun**

(Mateo 26.36-46; Marcos 14.32-42)

³⁹Tsaypita yargosquir costumbrinmannö Olivos niyangan jircaman aywaptinmi, discipuluncunanam gatiyargan.

⁴⁰Tsayman chaycurnam nirgan: “Dios

Yayaman mañacuyay Supay tentayāshurniqui jutsaman mana ishquitsiyāshunayquipag.”

⁴¹Tsaynō nisquirnam ichic mas washalānincunaman witisquir, gongorpacuycur Dios Yayaman quiquillan mañacur, ⁴²nirgan: “Taytallā, gam munarga cay sufrir ñacanāpagcagpita salvaycamay. Pero noga munangānōga ama catsuntsu, sinōga gam munangayquinōlla callātsun.”

⁴³[Tsaymannam cielupita juc angel yurisquir, Señor Jesucristota mas callpata gorgan. ⁴⁴Tsaynō shongonchō allāpa llaquicurmi, Dios Yayaman mas jinchi mañacurrgan jumpinpis yawarnōrag patsaman shutunganyag.]

⁴⁵Mañacunganpita sharcurnam discipuluncuna caycāyanganman aywar, puñucāyashgata tarirgan. Llaquicuywan pishipashga cayaptinmi, puñuy allāpa vencergan. ⁴⁶Tsaymi Señor Jesucristo nirgan: “¿Imanirtan puñucāyanqui? Sharcur riccharnin Dios Yayaman mañacuyay, Supay jutsaman mana ishquitsiyāshunayquipag.”

**Señor Jesucristota
achcusquir prēsu apayan**

*(Mateo 26.47-56; Marcos 14.43-50;
Juan 18.2-11)*

⁴⁷Señor Jesucristo parlar manarag ushaptinmi, atscag runacuna chāyargan. Tsay atscag runancunapa puntantam aywargan chunca ishcaypita juccag discipulun Judās niyangan. Tsaynō atscag runancuna pushashga chaycurmi, Señor Jesucristoman witiycur gagllanchō mutsaycurgan. ⁴⁸Pero Señor Jesucristonam nirgan: “Judās, ¿mutsayquiwancu Diospita Shamushga Runata traicionarnin ranticunqui?”

⁴⁹Señor Jesucristowan caycag discipuluncunam, tsaycuna pāsagta ricar tapuyargan: “Señor, ¿cay espādācunawan wallucachascayāmushag?”

⁵⁰Tsaynam juccag discipulun mas mandacugcag sacerdotipa servigninpa derēchucag rinrinta jipicat wallusquirgan. ⁵¹Señor Jesucristonam nirgan: “¡Dējaycuyay! ¡Tsaynōllana!” Tsaypitanam servicugpa rinrinta yataycurlla cuticascatsirgan.

⁵²Tsaypitannam sacerdotīcunapa mandacugnincunatawan templuchō wardiacunapa mayornincunata y mandacug auquincuna Señor Jesucristota prēsus apagnin shamushgacunata Señor Jesucristo nirgan: “¿Imanirtan gamcunaga espādayquicunawan y tucruyquicunawan shayāmurgoyqui, runacunata timpullyātsir imayca mana alli ruragmannō? ⁵³Waran waran gamcunawan pagta templuchō caycaptīga, ¿manam ni yatayāmargayquillapistsu? Pero cananmi siga, ōra chāmushga Supaypa munayninta rurar achcuyāmānayquipag.”

**Señor Jesucristota discipulun Pedro
mana regegtucur nēgan**

*(Mateo 26.57-58, 69-75;
Marcos 14.53-54, 66-72;
Juan 18.12-18, 25-27)*

⁵⁴Tsaypitanam Señor Jesucristota prēsus achcusquir mas mandacugcag sacerdotīpa wajinman apayaptin, Pedro caru gepallanta gatinrin aywargan. ⁵⁵Tsay wajipa patiunchōnam runacuna ninata sendircur mashacurnin caycāyargan. Tsaynam Pedropis paycunaman witiycur mashacuyargan. ⁵⁶Nina atsciyagwanmi

mandacug sacerdotipa servignin warmi, Pedro jamaycagta alli ricapaycur nirgan: “Cay runapis tagay runawanmi purishga.”

⁵⁷Pero Pedronam nêgarmin nirgan: “Warmi, paytaga manam regetsu.”

⁵⁸Tsaypita unay rätutanam juccag ricaycur nirgan: “Gampis tagay runawanmi purishcanqui.”

Pedronam contestargan: “Manam. Runa, paywanga manam purishcätsu.”

⁵⁹Tsaypita yapay juc ôratanönam juc runa nirgan: “Rasumpam cay runaga paywan purishga. iPypis Galilea runam!”

⁶⁰Pedronam nirgan: “iRuna, manam musyâtsu ni imata parlangayquitapis!”

Pedro tsaynö parlar manarag ushaptinmi, gällu cantasquirgan.

⁶¹Tsaynam Señor Jesucristo Pedroman tumaycur ricasquiptin yarpasquirgan: “Canan pagasmi manarag gällu cantaptin quimsa cuti, regemangayquita nêgamanqui.” ⁶²Tsaypita wagtaman yargosquirmi, pêsacurnin alläpa llaquicur wagargan.

**Señor Jesucristota cuidagnin
runacuna allgotsäcur burlacuyan**
(Mateo 26.67-68; Marcos 14.65)

⁶³Tsaypitanam Señor Jesucristota prêsusquir cuidag runacuna allgotsäcur burlacurnin alli magayargan. ⁶⁴Nawinta tsaparcurmi tapuyargan: “Mä ¿pi magashungayquitapis? iAdivinay!” nir.

⁶⁵Tsaynöllam tucuyläya imaycawan insultarnin allgotsäcur burlacuyargan.

**Llapan autoridäcuna
goricashgapa puntanman
Señor Jesucristota apayan**
(Mateo 26.59-66; Marcos 14.55-64;
Juan 18.19-24)

⁶⁶Patsa warasquiptinnam judiucunapa mandagnin respetashga auquincunawan

sacerdotícunapa mas mandacugnincuna y ley yachatsicugcuna goricäyargan. Tsaynö llapan goricashgapa puntancunaman Señor Jesucristota apaycurmi tapuyargan:

⁶⁷“Niyämay: ¿Gamcu Diospita Shamushga Runa canqui?”

Señor Jesucristonam contestargan: “Rasumpa nogam cä niyaptigpis, manam criyiyämanquitsu. ⁶⁸Y gamcunata tapuyaptigpis, manam contestayämanquitsu. ⁶⁹Pero cananpitam Diospita Shamushga Runaga, Poderöso Dios Yayapa derêchucag lädunchö jamanga.”

⁷⁰Tsaynam llapan tapuyargan: “¿Tsaypunga Diospa rasumpa Tsurinchi canqui?”

Señor Jesucristonam contestargan: “iQuiquiquicunam, rasumpa noga cangäta niyargoyqui!”

⁷¹Tsaypitanam paycuna niyargan: “¿Imapagnatan mas testígucunatapis wanantsic? iLlapantsicmi wiyargontsic quiquinpa shimínwan nimangantsicta!”

**Señor Jesucristota gobernador
Pilatomam apayan**
(Mateo 27.1-2, 11-14; Marcos 15.1-5;
Juan 18.28-38)

23 ¹Tsaypitanam llapan autoridäcuna sharcur, gobernador Pilatomam Señor Jesucristota apayargan. ²Pilatopa puntanchönam Señor Jesucristopa contran parlar acusarnin niyargan: “Cay runatam tariyargö marcantsicchö runacunata contrantsic willapar caycagta. Tsaynöllam Romachö mandacug Cesarman impuestuta päganatapis amatsacur, ‘Diospita Shamushga Reymi cä’ nin.”

³Tsaynam Pilato tapurgan: “¿Gamcu Israel runacunapa mandacug reynin canqui?”

Señor Jesucristonam contestargan:
“Aumi, gam ningayquinöllum cá” nir.

⁴Tsaynam mandacug
sacerdötícunatawan llapan runacunata
Pilato nirgan: “Manam ni ima
jutsantapis cay runachöga taritsu.”

⁵Tsaynö niptinnam, paycunaga
obligarnin mas jinchi niyargan:
“Yachatsicuyninwanmi runacuna
piñacatsir, autoridácunapa contran
sháritsin. Galileapitam yachatsicur
gallarimushga, cananga cay
Judiachönám yachatsicur sigiycañ.”

**Pilato Señor Jesucristota
Herodesman apatsin**

⁶Tsayta wiyarmi, Pilato tapucurcan:
“¿Cayga runaga Galileapitacu?”

⁷“Aumi” niyaptinnam, Pilatoga
Galileachö mandacug Herodesman
apatsirgan. Tsay junagcunam
Jerusalénchö rey Herodespis caycargan.

⁸Señor Jesucristota
cháratsiyaptinnam, rey Herodes alläpa
chushicurgan. Payga unaypitanam Señor
Jesucristota ricayta munargan, imayca
milagru rurangancunapag runacuna
parlagta wiyashga car. Tsaymi ricayta
munargan ima milagrullatapis
puntanchö rurananta. ⁹Tsaymi
imaycacunata tapurgan. Pero Señor
Jesucristoga manam ni imata
contestargantsu. ¹⁰Tsaychö caycag mas
mandacugcag sacerdötícunawan ley
yachatsicugcunanam, alläpa chiquirnin
tucuylyäpapa acusar Señor Jesucristopa
contran parlayargan. ¹¹Tsaynam
Herodes soldáduncunawan
allgotsacurnin burlacur, chipapag
mantuta ashgotsirgan imayca juc
reytanö. Tsaynö ashgorcatsirnam
gobernador Pilatoman yapay
cutitsiyargan. ¹²Tsay junagmi

Herodeswan Pilato amigota rurar
amistayargan, unayga chiquinacur
piñashgam cayanganpita.

**Señor Jesucristota
wañutsiyáñanpag Pilato
runacunata entregan**

(*Mateo 27.15-26; Marcos 15.6-15;
Juan 18.39-19.16*)

¹³Tsaypitanam sacerdötícunapa mas
mandacuginincunatawan autoridácunata
y tsay marcachö llapan runacunata
gayascatsir, ¹⁴Pilato nirgan:

“Gamcunam cay runatam nogaman
apayámurgoyqui: ‘Runacunatam
llutanta yapätsirnin piñanacatsin’ nir.
Pero llapayquipa puntayquicuna
tapurnin, manam ni ima jutsanta
acusayangayquinöga taritsu.

¹⁵Tsaynöllum Herodespis jutsanta mana
tarir, nogaman cutitsimushga. ¡Cay
runaga manam ni ima mana allitapis
rurashgatsu wañunanpagnöga! ¹⁶Tsaymi
canan alli astaycatsirlla déjaycushag.”

¹⁷[Pilatom cada wata Pascua fiestachö
costumbrincunamannö juc prësuta
gargog.]

¹⁸Pero llapan runacunam juc shimilla
gayaycachäyargan: “¡Cay runaga
wañutsun! ¡Barrabasta gargoycuyla!”
nir.

¹⁹Tsay Barrabastaga Roma gobiernopa
contran runacunata Jerusalénchö
peleatsir wañutsicushga captinmi,
gaycatsishga cayargan.

²⁰Tsaynam Señor Jesucristota
déjaycuyta munar, Pilato yapay
runacunata tapurgan. ²¹Pero
runacunanam mas jinchi
gayaycachäyargan: “¡Cruzchö
wañutsun! ¡Cruzchö wañutsun!”

²²Tsaypitanam yapay quimsa cutina
Pilato nirgan: “¿Ima mana allitatan

rurashga? Wañunanpagga manam ni ima jutsantapis taritsu. Tsaymi alli astaycatsirlla dējaycushag.”

²³Pero runacunam Señor Jesucristota cruzman crucificätsinanpag mas jinchi yapay yapay gayaycachar alläpa büllata rurarnin obligayaptin, ²⁴Pilato mañayangannö cruzchö wañuntsiyänapag änirgan. ²⁵Tsaymi peleatsicur wañuntsicunganpita gaycuraycag Barrabasta munayangannö gargosquir, Señor Jesucristotaga wañuntsiyänapag entregargan.

Señor Jesucristota juc jircaman crucificag apayan

(Mateo 27.32-44; Marcos 15.21-32; Juan 19.17-27)

²⁶Tsaypitanam Señor Jesucristota crucificag apaycar, chacrapita shamuycag Simón shutiyog runata achcuyargan. Payga Cirene marcapitam cargan. Tsay runatam mandayargan Señor Jesucristo apaycangan cruzta matancarcur, Señor Jesucristopa gepanta aywananpag. ²⁷Maytsicag runacunawanmi warmicunapis Señor Jesucristopa gepanta wagarnin alläpa llaquicur gatiyargan. ²⁸Pero Señor Jesucristonam ricaycurnincuna nirgan: “Jerusalén marcapita shamushga warmicuna, ama nogapagga wagayaytsu, quiquiquicunapagwan wamrayquicunapag wagayayga. ²⁹Chämungam junagcuna niyänanpag: ‘iChushicuychö cayätsun mana wawa tarig gollog warmicunawan mana llullu chuchugcuna!’ ³⁰Tsay junagcunam runacuna mantsacaywan jircacunatawan jancacunata niyanga: ‘iJuella janäcunaman jegamur

gopiscayämay cay alläpa sufriycunawan mana alli ñacay tiempu chämugta mana ricäyänäpag!’ nirnin. ³¹Si caynö cawaycag jachatanö rurarga; ¿Allau, gamcunata imatarag rurayäshunqui, Israel runacuna imayca tsaquishga jachanö fácil rupaypag caycagta?”

³²Tsaynöllam Señor Jesucristotapa pagtan ishcag llutan mana alli rurag runacunatapis cruzchö wañuntsiyänapag apayargan. ³³Tsay Calavera niyangan jircaman chaycatsirnam, Señor Jesucristota Roma soldäducuna cruzman clävayargan, ishcay mana alli ruragcunapa pagtan juccata derëchucag lädunman y juccagtana itsogcag lädunman. ³⁴[Señor Jesucristonam nirgan: “Taytallä, cay runacunata perdonaycuy, manam ni imata rurayangantapis musyayantsu.”]

Tsaypitanam soldäducuna Señor Jesucristopa llatapanta sortiyayargan raquipunacur apayänanpag. ³⁵Atscag runacunam tsaychö ricaray shaycäyargan. Autoridäcunanam Señor Jesucristota burlacurnin niyargan: “Juccunataga salvashgam. Mä canan salvacutsun, Diospa acrashgan rasumpa Cristo carga.”

³⁶Tsaynöllam soldäducunapis witiycurnin, Señor Jesucristota alläpa burlacuyargan. Puchgog vïnota upyatsirmi,

³⁷niyargan: “iSi rasumpa israelcunapa mandacug reynin carga, mä quiquiqui salvacuy!”

³⁸Cruzpa puntanchömi juc letrëro gellgashgachö nirgan:

“CAYMI ISRAELCUNAPA REYNIN” nir.

³⁹Tsaynöllam lädunchö juc mana alli rurag clävashga warcaraycagpis yapay

Lc 23.30 Os 10.8. **Lc 23.34** Cay versiculocuna manam cantsu puntacag waquin librucunachöga. **Lc 23.38** Griegocunapawan romänocunapa y hebreocunapa parlaynincunachömi gellgashga cargan.

yapay insultayargan: “Si Diospa Tsurin rasumpa Cristo carga, mä quiquiquipis salvacuy. Tsaynö salvacusquir inogacunatapis salvayämay!”

⁴⁰Pero juccagnam mana alli ruragmajinta piñapargan: “¿Manacu Diospita mantsacunqui, gampis cayläya castiguwan sufrir caycar? ⁴¹Nogantsicga rasumpa mana allita rurangantsicpitam caychö castiguta sufriyantsic. Pero cay runaga manam ni ima mana allitapis rurashgatsu caynö sufrinanpagga.”

⁴²Tsaypitanam nirgan: “Señor Jesús, Mandacuy Reynoyquichö mandacuyta gallaycur yarpaycallämanqui.”

⁴³Señor Jesucristonam contestargan: “Rasuntam nig: Cananmi nogawan paraiso niyangan shumag cawaychö canqui.”

Señor Jesucristo cruzchö wañungan

(Mateo 27.45-56; Marcos 15.33-41; Juan 19.28-30)

⁴⁴Pullan junagpitam asta las tresyag patsa jancat tutapashga cargan.

⁴⁵Rupaypis manam atsicyargantsu. Templu rurinchö shumag awashga cortünapis, janagpita uraypam ishchayman rachisquirgan. ⁴⁶Señor Jesucristonam gayaraypa nirgan: “Taytallä, gamtam almälläta entregaycug.” Tsaynö nisquirnam wañusquirgan.

⁴⁷Roma soldäducunapa capitanninam, tsaycuna päsagta ricaycur Dios Yayata alabar nirgan: “Cay runaga rasumpa jutsannagmi cashga.” ⁴⁸Tsayman llapan goricashga runacunanam, tsaycuna päsagta ricar, alläpa llaquicuywan pëchuncunatapis cutarrag cuticuyargan. ⁴⁹Pero Señor Jesucristota regegnin runacunawan Galileapita gatirnin shamushga

warmicunanam, carullapita tsaynö llapan päsanganta ricaraycäyargan.

Señor Jesucristota pampayangan

(Mateo 27.57-61; Marcos 15.42-47; Juan 19.38-42)

⁵⁰⁻⁵¹Tsaychömi José shutiyog runa Judeachö caycag Arimatea marcapita, llapan judiucuna goricäyangan wajichö mas mandacug autoridä cargan. Cay runaga alläpa alli cawacurmi, Dios munangannö imaycatapis allicunallata rurag. Tsaymi autoridämajincuna Señor Jesucristota wañutsiyänanpag parlayaptinpis, payga acuerdutsu cargan. Tsay runaga Dios Yayapa Mandacuy Reynontam shuyarargan. ⁵²Pilatoman aywaycurnam Señor Jesucristopa ayanta pampananpag mañargan. ⁵³Tsaynam Señor Jesucristopa ayanta cruzpita bájascatsir, juc fino säbanaswan piturcur gagachö uchcushga sepultüraman pampag apargan. Tsay sepultürachöga manaragmi ni pitapis pampayashgaragtsu cargan. ⁵⁴Tsay viernes tardiga, jamay sabado junagpag gallaycargannam.

⁵⁵Galileapita Señor Jesucristota gatirnin shamushga warmicunanam, Josépa gepanta aywar ricäyargan, sepultüraman cuerpunta imanö churanganta. ⁵⁶Tsaypita wajincunaman cutisquirnam, shumag alläpa mushcug perfümita preveniyargan Señor Jesucristopa ayanta shupayänanpag. Tsay warmicuna ley mandacungannö, sabado jamay junag captinnam jamayargan.

Señor Jesucristo cawamungan

(Mateo 28.1-10; Marcos 16.1-8; Juan 20.1-10)

24 ¹Pero domingo allegnam warmicuna tsaca tsacallana preveniyangan mushcug perfümita

aparcur, Señor Jesucristota pampayanganman aywayargan. ²Tsayman chärirnam sepultüra tsaparag jatun parara rumi wititsishgatana tariyargan. ³Ruriman cörrilla yaycusquirmi, pero Señor Jesucristota ayantaga manam tariyargantsu. ⁴Tsaynö mana ni imanö cayta puedir caycarmi, ishcag runacuna atsicyarrag imayca illagonö llatapashga puntancunachö shaycäyagta ricaycuyargan. ⁵Tsaymi alläpa mantsacaywan tsay warmicuna asta patsayag umpucuycuyargan. Tsay chipacyag runacunanam niyargan: “¿Imanirtan cawaycag runata wañushgacuna pamparäyangancho ashianqui? ⁶Manam caychönatsu. iCawamushganam! ¿Yarpäyay Galileachö gamcunawan caycar niyashungayquita? ⁷Diospita Shamushga Runatam jutsasapacunapa maquinman entregayanga cruzchö wañutsiyänanpag. Pero wañutsiyanganpita quimsa junagllatam cawamunga.” ⁸Tsaynö niyaptinnam Señor Jesucristo tsaynö willacunganta warmicuna yarpasquiyargan. ⁹Tsaypita cutisquirnam, chunca juc discipuluncunata tsay sepultürachö ricäyanganawan wiyayanganta willayargan. ¹⁰Tsay apostolcunata willagnin warmicunaga María Magdalena, Juana, Santiagopa maman María, mas juc warmicunawan cayargan. ¹¹Pero apostolnincunaga tsaynö willacuyanganta wiyar, “¿Imatachari parlayanpis!” nir, manam criyiyta munayargantsu. ¹²Pero Pedroga imanö captinpis sas sharcurmi cörrilla aywargan, Señor Jesucristota pampayanganman. Sepultüraman chärirnam gawaycurgan piturangan säbanasllana caycagta. Tsayta ricaycurnam, yarpachacur alläpa mantsacashganö cuticurgan.

**Señor Jesucristo yuripun Emaus
marcaman aywagcunata
(Marcos 16.12-13)**

¹³Señor Jesucristo cawamungan junagmi, ishcag gatragnincuna Emaus niyangan marcaman aywaycäyargan. Tsay marcaga Jerusalénpita chunca ishca kilometrom cargan. ¹⁴Ishcan gatragnincunam Jerusalénchö llapan pásangancunata parlar aywaycäyargan. ¹⁵Tsaynö parlarnin entenditsinacur aywaycäyaptinmi, Señor Jesucristo yurisquir paycunawan pagta aywargan. ¹⁶Pero ricaycarpis imayca imapis tsaparagnömi Señor Jesucristo canganta regeyargantsu. ¹⁷Tsaynam Señor Jesucristo tapurgan: “¿Imata parlartan nänita aywaycäyanqui?”

Paycunanam llaquishga ichisquiyargan. ¹⁸Tsaynam Cleofas shutiyogcag contestargan: “¿Gamllach Jerusalénchö patsacushga caycarpis, cay junagcuna ima pásanganta mana musyanquitsu?”

¹⁹Señor Jesucristonam tapurgan: “¿Imatan pásashga?”

Paycunanam niyargan: “Juc runam Nazaret marcapita Jesús shutiyog cargan. Paymi Diosnintsicpa profëtan car, rurayninwan y parlayninwanpis alläpa poderöso cargan, Dios Yayapawan runacunapa puntanchöpis. ²⁰Paytam sacerdotícunapa mas mandagnincunawan autoridänicuna condenarnin cruzman clävar wañutsiyänanpag entregayashga. ²¹Pero nogacunaga imanömi payman criyicuyargä, ‘Paychi Israel naciunta libramäshun’ nir. Tsaynö rasumpa criyicuycäyaptipis, quimsa junagnam payta wañutsiyangan. ²²Pero waquincag warmicunam canan tsaca tsacallana Señor Jesucristo pamparanganman aywar, mantsacaypagta

willacayämushga. ²³Señor Jesucristopa cuerpunta mana tarirnin wajiman cutiscamurmi, niyämargon angelcunash yuripusquir, ‘Señor Jesucristoga cawanmi’ niyargon. ²⁴Tsaynö niyämaptinmi waquincag yanagëcuna sepultüraman aywayargon y warmicuna willacuyangannöllash Señor Jesucristotaga tariyargontsu ni ricäyargontsu.”

²⁵Tsaynam Señor Jesucristo nirgan: “iGamcunaga imayca upanö mana musyag chucru shongom cayanqui, Dios Yayapa unay profëtancuna willacuyanganman mana criyiyänayquipag! ²⁶¿Manacu Cristoga tsaynö sufrir wañunan cargan, manarag glorianman cuticur?”

²⁷Tsaynö nirmi, paycunata esplicargan Diospa Palabranchö paypag willacunganta. Moisés gellanganpita gallaycur, asta Diospa profëtancuna gellayanganyag, quinquinpag parlar aywaycayanganta entenditsir.

²⁸Emaus marcaman yaycuycäyaptinnam, Señor Jesucristoga nänipa päsäracugnölla aywargan. ²⁹Pero paycunanam quëdananpag obligar niyargan: “Nogacunawan quëdacushun alläpa tardinam. Patsapis goyaycannam.” Tsaynam Señor Jesucristo yaycurgan paycunawan quëdacunanpag.

³⁰Micuyänanpag mësaman jamaycuyaptinnam, Señor Jesucristo tantata achcurcur bendisarnin Dios Yayaman mañacusquir, ishçayman paquisquir discipuluncunata macyargan.

³¹Tsay öram imayca ñawincuna quichasquignö Señor Jesucristo canganta regesquiyargan. Pero tsaypitam illacasquirgan. ³²Tsaymi ishcan quiquincunapuralla ninacuyargan: “Tsaynö Jesús captinchi çnänita shamushga shongontsic manacu

alläpa cushicurgon, Diospa Palabranta willacur entenditsimashga?”

³³Tsaypita sharcurnam pagas jina öra Jerusalénman cutiyargan. Chärirnam chunca juc apostolcunatawan waquincag compañeruncuna goricashga caycagta tarisquir, ³⁴willarnincuna niyargan: “Rasumpam Señor Jesucristoga cawamushga. Simóntam yuripushga.” ³⁵Tsaynam Emauspita ishcan cutigcunapis nänichö ima päsayangantawan tantata paquingan öra regeyanganta willacuyargan.

**Señor Jesucristo
discipuluncunata yuripun**
*(Mateo 28.16-20; Marcos 16.14-18;
Juan 20.19-23)*

³⁶Tsaynö parlaycäyaptinmi, puntancunaman yurisquir Señor Jesucristo saludacur nirgan: “Alli päsacuychö cayay.”

³⁷Tsaynam llapan alläpa mantsacar yarpäyargan: “iCayga, almacu o imatan!”

³⁸Pero Señor Jesucristonam nirgan: “¿Imanirtan mantsacashga caycäyanqui? ¿Imanirtan shongoyquicunachö firmi mana criyicuyanquitsu? ³⁹Ricäyay maquítawan chaquítapis. iQuiquimi cä! iMasqui yatayämay! Ricäyämay, almapaga manam aytsan ni tullun cantsu. Pero nogapaga ricäyämangayquinömi aytsäwan tullü can.”

⁴⁰Tsaynö nirmi maquincunatawan chaquincunata ricätsicurgan.

⁴¹Cushicuyntinwan mantsacashganö carmi, criyiyarganragtsu Pay rasumpa canganta. Tsaynam Señor Jesucristo nirgan: “iCaychö imallayquicunaga cancu micunäpag?” ⁴²Paycunanam juc pescädo cancashgatam garaycuyargan. ⁴³Chasquicusquirnam llapan puntancunachö micurgan.

⁴⁴Tsaypitanam nirgan: “Caynö päsamänapagga gamcunawan caycarmi willayargag: Moisés gellgangan leycunawan Dios Yayapa profêtancuna y Salmo libruçhöpis nogapag gellgashga caycag cumplinanpag canganta.”

⁴⁵Tsaynö Diospa Palabran gellgashgata entenditsirmi, ⁴⁶nirgan: “Gellgashgam caycan Diospita Shamushga Runata sufritsir wañuscatsiyaptin, quimsa junagllata cawamunanpag. ⁴⁷Paypa shutinchö Jerusalénpita gallaycur, maytsay naciuncunapa aywar willacuyätsun, jutsa rurayangancunata dëjasquir arepenticurnin Dios Yayaman cutiyay perdonashga cayänayquipag.” ⁴⁸Gamcunam llapanta ricashga car, rasumpa testigüga cayanqui. ⁴⁹Gamcunamanmi cachamushag Taytä änicungan Espiritu Santota. Pero cay

Jerusalénllachörag caycäyanqui, paypa podernielupita chämugta chasquiyangayquiyag.

Señor Jesucristo cieluman cuticun

(Marcos 16.19-20)

⁵⁰Tsaypitanam Señor Jesucristo discipuluncunata, Betania marcachö juc jircaman pushargan. Tsaychönam maquina altupa pallarcu paycunata bendisargan. ⁵¹Tsaynö bendisaycarnincunanam, paycunapita raquicarnin pallaricar altu cieluman aywacurgan. ⁵²Discipuluncunanam gongoricuycur Señor Jesucristo aywacuptin adorarnin, Jerusalénman alläpa cushishga cuticuyargan. ⁵³Tsaypitanam paycunaga imaypis tsay templuchö Dios Yayata alabarnin adorayargan.

Tsaynö catsun.